

Basef Ifimba Bu'wafi Jon Nanda'afi

Basef bandafi Joni

1:1-18 Jisas Kraiss agol wa'agol Basef nataga epen

1:19-51 Jon nagapisi'as embeli nawalipa basefa Jisas nagafi'i. Ea' Jisas nali' nogofala alipumi ananiami biamibiam.

2:1-12:50 Jisas nawalipasa basef Godi nanda' hiahaom banagami 7-pelaim si'i Ahamana God nanda'ami

13:1-19:42 Jisas nafe' Jerusalem nawalipasa basef bu'wafi owa' sanda' kotimana sandolona lawag usi'igai ti'wanaegai ma nagaga'

20:1-31 Jisas nosafel wapani nandawalapa alipisi ananisi

21:1-25 Jisas nafe' Galili nandawalapa alipumi ananiami 7-pelaim

Basef afataga epen anen Jisas

¹ Fowa' gani dambadamba anif Basef epen nape. Ea' Basef epen anamba nape naloma God. Ea' epen anamba agilinama Basef anen atona God.* ² Fowa' dambadamba epen anamba agilinama Basef naloma God nape. * ³ Anen nanda' hiahaom hiami. Owa' anin mae atitin netaga ano'w ufa'wa, owa'atin. Hiahaom magatagai hiami anen atona nanda'am mataga. * ⁴ Ambal namili lagapaunai lape epen anamba ea' ambal alol logogala'ma esis epesi. * ⁵ Mogogala'i amamba mogogala'ma akuti. Ea' akot ina taofana anen, owa' atin endilisi. Anen nogogala'ma esis

* 1:1: Jo 17:5; 1 Jo 1:1-2; Re 19:13

* 1:2: 1 Ko 8:6; Kl 1:16-17; Hi 1:2

* 1:3: Jo 5:26 * 1:4: Jo 3:19

amam nematawa hiasii, anen ea' nafi'i itap apa'e ma dei' nogota ata'e.*

⁶ Anona aman daiana nataga, agilinama Jon, God nas-apa'ana nagafi'ii. ⁷ Anen nafi'i ma nogowalapa basef. Dei' nawalapa basefa nogogala'i anamba ma epes hiasi sogame' basef ananifi sogahapifana. * ⁸ Jon nawalapa basef ifimba na'i anen ina nagwapin inimba nigigala'i, owa'. Anen nali' nafi'ima nogawalapa basef alihifa nagwapin anamba endilisinai nogogala'i.*

⁹ Nagwapin anamba nogogala' endilisii, anen nogogala'ma esis amam nematawa hiasii, ea' nafi'i itap apa'e ma dei' nogota ata'e. * ¹⁰ Fowa' gani anen nanda' itap apa'e pataga, dei' nafi'i nape itap apa'e. Apa' esis amam nematawa sagape itap apa'ii ina sogawana, owa'. ¹¹ Anen nafi'i nataga kofagama itap lu'upa esis Juda, owa' esis mini'ap ananisi ina sogawana sa'i aho' sofa'ana sahapifana, owa'atin. * ¹² Apa' esis mamahisa sogawana si'i aho' sogahapifanai, noso'asa anin ametala sogataga awasi Godi. * ¹³ Esis ina sataga awasi Godi ma waf bu'wafi mamasas sogolasi, owa'atin. Esis ina sataga awasi Godi si'i ukup mamasas pa'i ma sogolas, owa'atin. God atona nanda'as sataga awasi ananisi.*

¹⁴ Basef fataga epen ea' nape la'afena afa', ea' wati glori mogogala'i banagami ananiami. Glori amamba mogogala'i banagami nogamanai atom, ahamana nasapa'ana nagafi'ii. Anen natopalopapa dowaf nowa' banagapa ma nigihimba'mapa waf endilisifi fape si'ifa anen.*

* 1:5: Mt 3:1; Lu 1:13-17,76 * 1:7: Jo 1:20 * 1:8: Jo 8:12; 1 Jo 2:8

* 1:9: Jo 1:3, 17:25 * 1:11: Ga 3:26 * 1:12: Jo 3:3-6; Je 1:18; 1 Pi 1:23

* 1:13: Ais 60:1-2; Ga 4:4; Fl 2:7; Hi 2:14; Lu 9:32; Jo 2:11 * 1:14: Jo 1:27,30; Mt 3:11

¹⁵ Jon nawalapa basefa anen na'amba na'i, "Anen aman anamba fowa' a'ipipana aga'i. Aman nigi'ma ae' nogafi'ii, anen nape nagali'ma ae'i. Anen fowa'inai nagapan na'ambai, nape nali'ma ae'."*

¹⁶ Apa' hiapai mofa' hiahawes fasisi sagape si'isa anini. Waf afamba natopalopapa dowaf nogowa' banagapa nanda'as sandape na'amba atin nimaguf hiafi. * ¹⁷ God naso'ana mu'uli ananini Mosesa nagawalipapa. Apa' Jisas Krai natopalopapa dowafa waf endilisifi. * ¹⁸ Owa' anona aman atotona nili' niti God kwasakwasalaia, owa'atin endilisi. Nogamana anamba Godi atotona nape felefele' endilisi naloma anen ahamana ea' nawalapa basef kofagefa ma apa' nihimba'mapa God.

*Jon aman nagapisi'as embeli a' nawalapa basef
(Mt 3:1-12; Mk 1:7-8; Lu 3:15-17)*

¹⁹ Anom amam dembami Judaimi mapani Jerusalem masapa'i anom amam mafe' mahali' Jon. Anom pris maloma anom Livai mugumafi ipat Godii, amom mapani Jerusalem mafi'i mahali' Jon ma'i, "Ina' aman mamahinama?"*

²⁰ Ea' Jon ina nambaho' basef, owa'. Anen nagwamam nawalapa basef na'ipam na'i, "Ae' ina Krai God nandan-depe nasapa'e agafi'ii, owa'."*

²¹ Ea' mahali'ana ma'i, "Dei' ina anina profet fowa'inai agilinama Elaija?"

Owa' anen na'i, "Ae' owa'."

Ea' ma'i, "Dei' ina' aman anamba profet apa' mape mogohafana'i?"

Owa' nagwamama basef na'i, "Owa'."

* 1:15: Kl 2:10 * 1:16: Eks 34:28; Ro 6:14, 10:4 * 1:17: Eks 33:20; Jo 6:46; 1 Ti 6:16; 1 Jo 4:12; Mt 11:27 * 1:19: Jo 3:28 * 1:20: Diu 18:15,18; Mt 11:14; Jo 6:14, 7:40

²² Ea' ma'ipana ma'i, "Dei' ina' ami? Ama afa' utanima ofe' uga'ipa dembami masapa'afa wagafi'ii. Ina' na'i ina' atina na'i basef maif, ina' ami?"*

²³ Ea' Jon nagwa basef si'i fowa' profet Aisaia naga'i na'i, "Ae' anagol malogol dowaf goga ga'i anep itap fa-taupigima gaga'ias na'amba ga'i, 'Pendomba ufia'w Dembinai!'"*

²⁴⁻²⁵ Ea' amom Farisi dembami Judai masapa'am mafi'i mogahali' anini mahali'ana ma'i, "Ina' Kraisa God nandan-depena nasapa'ena nagafi'ii a'a, ina' Elaija a'a, ina' anona profet dembinai? I'i ina' owa' Kraisa, a owa' Ilaijaia, anona profeta, dei' ina' napisi'asa main?"

Jon nagwamam na'ipam na'i, ²⁶ "Ae' agapisi'as embel atembeli, apa' anona aman anamba nape la'afena ipa', ipa' ina pegawana. * ²⁷ Aman anamba nagi'ma ae' nagafi'ii. Ae' ina ambo'owe a'owa' egatagwaha mandalefa su ananiami, owa'atin. Anen dembinai a'owa', nikila' ae'."*

²⁸ Basef ifimba fataga anambel wambel Betani walemb Jordan fisanamb, Jon nagapisi' esis amam nematawama.*

Jisas nogamana Godi si'i anin mafin sipsip

²⁹ Wafilu owa', Jon nati Jisas nafi'mai anen na'ipas na'amba na'i, "Ipa' piti aman anamba anen si'i mafin sipsip noganai Godi, anamba esis sanda' ofa anai. Anen si'i sipsip nogakwaha waf awafi esis amam nematawa hiasi sagape itapi sanda'afi. * ³⁰ Anen ma'una apamba ea' nafi'i. Anamba fowa' ae' a'ipipa aga'i, 'Anona aman nigi'ma ae' nogafi'ii, anen nagali'ma ae'i. Anen a' nali' nape apa' ae' selai agi' ataga.' ³¹ Ae' ina a' egawa anen epen mamahonama, ata' owa'atin. Ae' afi'i apisi'ipa

* 1:22: Ais 40:3 * 1:23: Mt 21:25; Jo 1:33 * 1:26: Jo 1:15; Ap 13:25

* 1:27: Mt 3:6; Jo 10:40 * 1:28: Ais 53:6-7; Jo 1:40; 1 Pi 1:18-19 * 1:29:

embela egawalapa aman anamba dembinai ma apa' amam nematawa Israel.”*

³² Ea' Jon nawalapa basef alihif na'i, “Ae' ea' ati Ambal bu'unai Godi nakwaha heven nisila'i si'i amil alamba apa' maga'i ma'unai nisila'i ea' nafe' nape nomona anen. *

³³ Ae' ina egawa anen, owa'. Apa' God nasapa'e afi'i ma igapisi'as embel ea' na'ipi na'i, ‘Ina' niti Ambal bu'unai Ae'anai nisila'o ma nogapaunai aman anamba, ea' ma'una ea' aman anamba. Anen atiasi nogaso'as Ambal Ae'anai bu'unai nogape opalef asasilifi nomoni.’*

³⁴ Ae' ea' atolona endilisi awalapa basef alihifa anen a'if a'i, Anamba anen Nogamana Godi endilisi.”

Jisas nofala alipumi biamibiam

³⁵ A'i owa' wafilu Jon a nafe' nalutu wapani na'amba ea' alipumi ananiami biam malomana mape. * ³⁶ Ea' nati Jisas nafo'o, na'ipa alipumi ananiami nihimba'mama Jisas na'i, “Piti, anen si'i sipsip noganai Godi.”

³⁷ Ea' alipumi ananiami mame' na'ipas na'amba, maila Jisas. ³⁸ Jisas nandambema owa' nati amom mailana na'ipam na'i, “Ipa' pa'i pifi'i pelaoma main?”

Owa' ma'ipana ma'i, “Rabai, ina' nagapoma ipat ati?” Agol agalemba “Rabai” apa' mombomagol mi'i, “Dembinai Tisa.”

³⁹ Ea' anen na'ipam na'i, “Ipa' fi'i ma ata' petologon.”

Ea' mafe' ipat anen nagapautai. Nema' afamba atef wambomota awin nandambema napani gani wa'ol 4 klok, ea' malomana mapani. * ⁴⁰ Amom mame' basef ifimba Jisasi Jon naga'iefi mailana. Amom agufuma Andru Saimon Pita, amom atom sahomana owamana. * ⁴¹ Andru

* 1:31: Mt 3:16 * 1:32: Lu 3:2-3 * 1:33: Mt 3:17, 17:5; Mt 27:54

* 1:35: Jo 1:29 * 1:39: Mt 4:18-20 * 1:40: 1 Sml 2:10; Sam 2:2; Jo 4:25

a' ata' usi'ina notanima nali' nafe' nowando'ma Saimon, ama ni'ipana niga'i, "Afa' wati Dembinai Mesaia ea'."

Apa' dei' mambema agol agalemba Mesaia ma'i Kraiss, God nandandepana nasapa'ana nagafi'ii.*

⁴² Ea' Andru nao'wa Saimon nafi'mai Jisas natolona na'i, "Ina' Saimon nogama Joni. Anaf agol ine'igili a' nendefala Sifas."

Agol kofagogola agalemba "Pita" ga'i otam.*

Jisas nofala Filipi Nataniel

⁴³ Wafilu wapani Jisas na'i nefe' itap apamba lu'upa Galili. Ea' nowando'ma Filip natolona na'ipana na'i, "Ina' fi'i nigil'ma basef ae'afi nila ae'."

⁴⁴ Filip nafi'i wambel ambalemba atembel Pitai Andru magafi'ima, Betsaida. * ⁴⁵ Ea' Filip nafe' nolaoma Nataniel na'ipana na'i, "Aman anamba fowa' Moses nanda' basefa mu'uli God naga'ianai, ea' amom profet wapani manda' basef maga'ianai, aman anamba ma'una afa' ea' watolona. Anen aman Nasaretinai, Josep nogamana."*

⁴⁶ Ea' nahali' Filip na'i, "Dei' anis hiahawes fasisi sataga safi'i Nasaret?"

Filip na'ipana na'i, "Ina' fi'i netelona."

⁴⁷ Ea' Jisas nati Nataniel nafi'mai anen na'ipana na'i, "Niti aman anamba Israelinai endilisi, aman bu'unai. Anen owa' niga'i anif basef baso'asefia."*

⁴⁸ Ea' Nataniel na'ipana na'i, "Dei' ina' negawe na'i-mama?"

Ea' Jisas nagwamana na'ipana na'i, "Doko' Filip ina dei' nofalena, ata' owa'atin, ae' ali' atilina nagape lawag fik kofagegama. Nogota atamba atilina."*

* 1:41: Mt 16:18; Mk 3:16 * 1:42: Mt 8:22; Mk 2:14 * 1:44: Diu 18:18;

Ais 7:14, 9:6; Jer 23:5; Esi 34:23 * 1:45: Jo 7:41,52 * 1:47: Sam 32:2

* 1:48: Mt 14:33, 16:16; Mt 27:42; Mk 3:11

⁴⁹ Nataniel nagwamana na'i, "Tisa Dembinai, ina' Noga-mana Godi endilisi. Ina' dembinai King apa' Israeli."

⁵⁰ Ea' Jisas nagwa basef na'i, "Ae' doko' ea' ali' atilina egawena nagape lawag kofagegama. Isimba atis dei' ina' nahapifi. Endilisi anaf ina' a' niti anom hiahaom banagami mikila' dei' atilina nagape laogon."*

⁵¹ Ea' Jisas na'ipana wapani na'i, "Ae' a'ipipa endilisi atis, anaf ipa' piti heven nundausi' nogal ea' amom ensel Godi lota sila'mima ae' ataga epen egefa' alop epesi."

2

Jisas nambema embel bataga wain

¹ Anef nemaf fagafe'ma wanifi anona aman naso' ano'w nemata'w wambel ambalemba Kana bagape itap apamba lu'upa Galilii. Ea' ma'mama Jisasi kwape ipat atamba sandaso'amatai.* ² Esis sofala Jisas naloma alipumi ananiami wapani mafi'i mati daso'ama inimba. ³ A'i owa' main embel wain ahi'alan. Ea' ma'mana Jisasi kwafi'i kwa'ipana kwa'i, "Esis embel wain a' akas."*

⁴ Ea' Jisas na'ipa'w na'i, "Ma'me, maol inimba ina ae'ani. Ea' ina maol ine'ini, owa'. Nogota ae'atai ina dei' tataga, ata' owa'."*

⁵ Ea' kwa'ipa amom manda' maola anen nogaso' nemata'wi kwa'i, "I'i anen niga'ipipa anif basefa, ipa' pihapifana."*

⁶ Anom maloh lu'wami ma'oh ama esis Juda saila mu'uli Godi sagasa'ofami. Maloh amamba wanom wanom sanda' otamba sanda'ami si'i dram lu'wami 44 galon.

⁷ Jisas na'ipa amom manda' maol na'i, "Ipa' pilai embel pekolo'wam maloh amamba ma si'im kwaef endilisi."

* 1:50: Jen 28:12 * 2:1: Jo 1:43 * 2:3: Mt 12:48; Jo 19:26 * 2:4: Jo 7:30, 8:20 * 2:5: Mk 7:3-4

Ea' amom molam si'im si'i anen naga'ipam. ⁸ Ea' na'ipam na'i, "Dei' kolo' du'wanimbela pefa'ambel pefe' pese'anam aman nugumafi gwa'aisii."

Ea' mofa'mana embel mafe'. ⁹ Dembinai nugumafi gwa'aisii embel ambalemba name'ambel owa', ea' bataga fasimbela si'i wain, apa' anen ina nogawa embel ambalemba amom mogofa'ambelima, owa'atin. Apa' amom manda' maola anini mogawambel. Amom molai embel atembel wafimbili. Ea' anen dembinai nofala aman anamba nagaso' nemata'wi ¹⁰ nahali'ana na'i, "Epel hiasa ata' sali' saso'asa wain inimba bu'wani nali' sa'ana ea' sagi' sofa'masi wain inimba awasin kwasakwasalai. Apa' ina' owa'atin. Ina' nambaho'wa wain inimba bu'wani na'ihia dei'aol nagi' nofa'an nafi'i."*

¹¹ Amamba ametal banagami magali'i si'i God nanda'ami, dambadamba Jisas nanda'am Kana itap apamba lu'upa Galili. Anen nihimba'ma esisa glori ananiami banagami mogogala'i. Ea' amom alipumi ananiami mahapifana.*

¹² Isimba hi'alasa main, Jisas naloma alipumi ananiami miliana Kaperneam maloma ma'mana anani'wi kwaloma owapana ananiami wapani ea' sape na'amba anifnimaguf.*

Jisas nugulatamasa hiahaom esis sagatalom nomon ipat lu'unai Godi

(Mt 21:12-13; Mk 11:15-19; Lu 19:45-46)

¹³ Nema' afamba Pasovaefi felefele'ma fegataga, Jisas nondowasa' Jerusalem. ¹⁴ Ea' nawis ipat lu'unai Godi nomon nati epel satama mafis amamba sipsip bulmakau amiguf ma'unamb ea' anis satalom otamba sindisila'mamba. ¹⁵ Ea' Jisas nasa'ma anof mandof strin nanda'af nanda' anep wip si'i bumbulita. Ea' nopagaha epel

* 2:10: Lu 9:32; Jo 1:14, 4:54; Jo 11:40

* 2:11: Mt 4:13

* 2:12: Eks 12:1-27; Jo 6:4, 11:55

isimba natofas natofamasa hiahaom amamba asasimi sipi-sipi bulmakau wapani mawis mafe' ando'. Ea' nugalatamasa otamba moni esis sindisila'manai nakwahona, nambema tebol asasimi nakolo'masom. * 16 Ea' na'ipa amam amamba magatala amigufi na'i, "Ipa' fa'a hiahaom amamba fo'o."*

17 Ea' alipumi ananiami ukup pandanda'ma anif basef fagape Baibeli fa'ias faga'i, "Ae' okom mohafel a'owa' ma enda' maol banagambel endilisi ma igimafi ipat ine'inai nogape andeande'."

18 Owa' amom Juda mati anen nanda'am na'amba, ma'ipana ma'i, "Ina' ata' nihimba'mafa anol ametala hiahaom banagami si'i God nanda'ami ma ogogawa ina' agol lu'wagilinai ma nanda'am na'amba ma afa'."*

19 Ea' Jisas nagwamama basef na'i, "Ipa' da'a ipat anamba lu'unai Godi awasina, atiasi ae' itanima ila'ana nogotawa wapani nimaguf wanif dowaf."

20 Ea' amom Juda ma'ipana ma'i, "Ipat anamba sanda'ana sala'ana afagof hiagufi 46-pelaiguf, apa' owa' ina' na'i nimaguf wanif dowaf nela'ana notawa wapani a'amon?"*

21 Apa' ipat anamba Jisas naga'ianai ina na'i ipat anamba endilisinai lu'unai Godi, owa'. Anen na'i alop ananipi. * 22 Ma anaf God nosa'mana wapani nowaga sogawanama, nogota atamba amom alipumi ananiami a' ukup popoma basef ifimba ananifi fowa' naga'iefi. Ea' dei' a' mahapifa basef ifimba fagape Baibeli faloma basef ifimba Jisas fowa' naga'iefi.*

Dembina Jisas nogawa epes hiasi ea'

* 2:15: Lu 2:49 * 2:16: Sam 69:9 * 2:18: Mt 21:23, 26:61; Mt 27:40;
Ap 6:14 * 2:20: 1 Ko 6:19 * 2:21: Lu 24:6-8; Jo 12:16, 14:26 * 2:22:
Jo 7:31

²³ Jisas nape Jerusalem ama nimaguf ifimba Pasovaefi, esis amam nematawa hiasi sati maol anen nanda'ani banagani. Ea' sahapifa agol ananigili. ²⁴ Apa' Jisas nogawa epes hiasi hi'alas. Na'amba anen ina nahapifas, owa'. * ²⁵ Anen ina gawa akanai ma anis daias sogal'ipana ma waf epesi, owa'atin. Anen a' nogawa epes hiasi hi'alas ea' nogawa ukupi opalef asasisi.

3

Jisas na'i naloma Nikodemus

¹ Anona aman agilinama Nikodemus, anen Farisi agol lu'wagili ma esis Juda. * ² Anamb owamb nafi'mai Jisas na'ipana na'i, “Tisa Dembinai, apa' mogawa ina', God nasapa'ena nafi'i si'i dembinai Tisa. I'i owa' God nope noloma anin epena, anin ina la'ifina nenda' maol inimba banagani ina' nanda'ani, owa'atin.”*

³ Ea' Jisas nagwamana basef na'i, “Ae' a'ipina endilisi atis, epen ami i'i owa' God nolan netaga dambaina, anin ina atiasi nuwis nomona maol Godi nope Dembinai nugu-mafian, owa'atin.”

⁴ Nikodemus nahali'ana na'i, “Dei' isimba ea' hagasi sonda'am si'imama ma solas sogataga dambais wapani? A sotanima sundawis nelelemb mamamasi a'amon, ama bola otanima olasi wapani?”*

⁵ Owa' Jisas nagwamana na'ipana na'i, “Ambal bu'unai Godi la'ifina nolan negataga dambain. Ae' a'ipina endilisi, i'i owa' Ambal Godi nolana dambaina embela, ina atiasi la'ifin nuwis nomona maol Godi, owa'atin. Apa' i'i Ambal Godi nogolan dambaina, dao'. Anin ilama nogawis nomona maol ananini. * ⁶ Hiahaom magataga alop

* 2:24: Mk 2:8 * 3:1: Mt 22:16; Jo 9:16, 7:50, 19:39 * 3:2: Mt 18:3; 1 Pi 1:23 * 3:4: Esi 36:25-27; Ta 3:5 * 3:5: Sam 51:5; Jo 1:13

atopi, amamba alop atopumi si'i ano'w nemata'w kogola awani. Apa' hiahaom Ambal Godi nogolami, amamba mataga si'i ambal bu'unai. ⁷ Ina a' nomonas hiahawesa aga'ipina na'amba aga'i pegataga dambaipa wapani si'i epes sogolaipa, owa'i. * ⁸ Fufin nagaluwi nandagi'ma anin si'i nalo nagafe' ganigani. Ina' name' amalemb magala'an, apa' ina negawa anamba anin nalo nagafi'ima ma a' nalo nagafe'ma, owa'atin. Epes hiasi Ambal bu'unai Godi nolasa sagataga dambaisi, esis ea' sataga na'amba atin.”

⁹ Ea' Nikodemus nagwamana na'i, “Hiahawes isimba atiasi sotaga sondowalap si'imama?”

¹⁰ Jisas nagwamana na'i, “Dei' si'i main? Ina' Tisa dembinai esis Judai, owa' ina' owa' ata' negawa chiahawes isimbaia? * ¹¹ Endilisi atis ae' a'ipina apa' ma'i hiahawes apa' mogogawasi, ea' mawalapa hiahawes isimba a' magatilisi. Apa' owa' ipa' pewa' alafugaha basef ifimba afa' wagawalapafi. * ¹² Ae' a'ipipa hiahawes isimba itapasi, apa' ipa' ina pegawam pahapifam, owa'. I'i ae' iga'ipipa hiahaom ilifami, atiasi ipa' pegawa pihapifam pi'imama? Owa'atin. * ¹³ Ina anona aman itapanai nalota gani heven, owa'. Ae' atowe. Ae' ataga epen egefa' alop epesi ea' ae' atowe akwaha heven isila'i, ea' ma'uwi. *

¹⁴ Fowa' gani aman anamba Moses nasa'ma anal ul nanda' kapa nanda'ali lail anoga lawag ilif. Nanda'am anamba wafigima fataupigima. Amamba ea' na'amba atina atiasi sefela ae' ataga epen egefa' alop epesi sendele igail anoga lawag ilif. * ¹⁵ Ama epes mamahisa isimba sogahapifa ae'i, atiasi sofa' ambal namili sogape andeande' lifilafi.*

* 3:7: Ekl 11:5 * 3:10: Jo 3:32, 8:26 * 3:11: Lu 22:67 * 3:12: Pro 30:4; Ro 10:6 * 3:13: Nam 21:9; Jo 8:28, 12:32 * 3:14: Jo 20:31 * 3:15: Jo 3:36, 10:28; Ro 5:8, 8:32; 1 Jo 4:9-10

¹⁶ Aho' endilisi, God nogamana aman ananinai atotona nape. Owa', owa'atin. Anen okom maimaila amam nematawa hiapai magape itapi hi'alapa. Ea' naso'apai Nogamana ananinai atotona ma epes ami sogahapifanai sogape andeande', ina soga'ma waf awafi, owa'atin. Sofa' ambal namili sope andeande' lifilafi. * ¹⁷ God ina nasapa' Nogamana ananinai nafi'li itap apa'e ma nonda' kotimapa, owa'atin. Anen nasapa'ana nafi'li ma nimbimai epes hiapai magape itapi nokwahomapa waf awafi mogafi'mai anen. * ¹⁸ Epen ami nigahapifa anini, anin atiasi basef akana kot lu'utai. Apa' epen ami owa' nigahapifanaia, epen inimba a' lamonan higililan ea' ma kot anamba lu'unai aunai. Dei' main? Anin nandaiwa'ma nigahapifa Nogamana atotona Godi, na'amba epes isimbai a' lamonas hi'ilas. * ¹⁹ Basef kofagefa ma kot lu'unai anamba na'amba. Mogogala'i a' mafi'li mataga itap apa'e ea', owa' esis ukup panda'i waf atona anamba itapanai si'i owambi, sandaiwa'ma mogogala'i amamba. Dei' maina esis sandaiwa'? Esis sanda' waf awafi na'amba dei' sandaiwa'. * ²⁰ Epes ami sanda' waf awafii, sogowa' alafugaha mogogala'ii, esis sandaiwa'ma waf awafi asasifi fendawalap. Ea' dei' ombal mahas sandaiwa'. ²¹ Epen ami nanda' waf endilisifi, anaf anin negatagama mogogala'i. Ma anis epes daias sitilin sogogawa anin nape sisihin atapina God nanda' maol ananini.*

Jon nawalapa basef kofagefa Jisasi na'if alihif

²² Basef ifimba hi'alefa main, Jisas naloma alipumi ananiami a' mafe' itap lu'upa Judia. Ea' nape nalomam napisi' esis amam nematawa. ²³ Apa' Jon nape

* 3:16: Lu 19:10; Jo 5:22, 12:47; Ap 17:31 * 3:17: Jo 3:36, 5:24 * 3:18: Jo 1:5,9, 8:12 * 3:19: Ef 5:11-13 * 3:21: Jo 4:1-2

wambel ambalemba Inon felefele'ma anambel wambel Selim. Anamba walemb lu'wambi begetaha, esis amam nematawa hiasi safi'i na'amba, anen napisi'as.*

²⁴ Nema'f afamba dembinai King Herot ina dei' nanda' Jon nanda' kalabus, ata' owa', ²⁵ amom alipumi Joni ma'i anif basef fape la'afena amom maloma anona aman Judainai. Amom ma'i basefa waf afamba esis Juda sasa'of sogowando' alogwa ma sogape bo'wesa naep Godi.*

²⁶ Ea' alipumi Joni mafe'ma anen ma'ipana ma'i, “Dembinai Tisa, aman fowa' nape nagaloma ina' gani wa'ol walemb Jordani ma ina' nagawalapa basef naga'ifanai, aman anamba dei' amam nematawa hiasi safe'ma anen napisi'as embel.”*

²⁷ Jon na'ipam na'i, “I'i God nagape heveni owa' noso'an anis maefah anin epena, epen inimba ina a' la'ifin nenda' anin maol, owa'atin. * ²⁸ Ipa' apegawa basef ifimba fowa' ae' aga'iefi a'i ae' ina Krais, God nandandepe nasapa'e agafi'ii, owa'. Apa' God nasapa'e ali' afi'mai Krais. * ²⁹ I'i anona aman nogaso' ano'w nemata'wi, nemata'w akwamba ea' anani'wi nagaso'akwi. Ea' alipunai aman anambai sonahana nalutu name' aman anamba dei' naga-so'akwi nagafi'i. Dei' na'amba atina ae' sonahe a'owa' ma okom ae'ami, andagalama Dembinai Jisas. ³⁰ Agol ananig-ili lu'wagol, apa' agol ae'agili a' gowala gofe' sa'ogol.”*

Aman nagafi'i heveni

³¹ Aman nagafi'i ilifi anen nape ilifa hiahaom hiami. Apa' aman nagataga itapi anen itapanai naga'i basef itapafi atifi. Apa' aman nagafi'i heveni anen nape ilifa

* 3:23: Mt 4:12 * 3:25: Jo 1:26-34 * 3:26: Jo 19:11; 1 Ko 4:7; Hi 5:4

* 3:27: Jo 1:20,23; Mt 11:10 * 3:28: Mt 9:15 * 3:30: Jo 8:23; 1 Jo 4:5

hiahaoom hiami. * ³² Anen na'i basef nawalapa hiahawes hiasi natilis nagame'as ea'i. Apa' ina anin epen neme' basef ifimba anen naga'iefi, owa'atin. ³³ Epen ami name' basef ananifi ma nigailafi, anin na'i aho'ma basef ifimba nihimba'masaf alihif God anen naga'i basef endilisifi atifi. * ³⁴ Aman anamba God nasapa'ana nagafi'ii anen nawalapa basef Godi. Ea' God naso'ana Ambal bu'unai ananinai nape si'inama anen. * ³⁵ Ahamana God okom maimaila Nogamana ea' naso'ana hiahaoom hiami hi'alama lagof ananigufi. * ³⁶ Epen ami nagahapifa Nogamana ananinai, epen inimba dei' a' nefa' ambal namilima negape andeande' lifilafi dondol. Apa' epen ami newa' alafugama Nogamana ananinai, inimba ina atiasi nefa' ambal namili, owa'atin. Anaf nembel wandafunai Godi a' nopoman.

4

Jisas na'i naloma ano'w nemata'w Samariai'wi

¹ Nema' afamba amom Farisi dembami Judai mame' anif basef na'amba fa'i, "Jisas napisi' alipisi hiasi nikila' isimba Jon nagapisi'asi."*

² Apa' Jisas ina napisi'as, owa'. Amom alipumi ananimi atom mapisi'as. ³ Jisas ea' nogawa amom Farisi mame' basef ifimba. Ea' anen nakwaha itap apamba Judia notanima nafe' itap lu'upa Galili wapani. ⁴ Ufia'w akwamba anen naila'w nagafi'i, kwafe' la'afena itap lu'upa Samaria. * ⁵ Ea' nafe' nataga anambel wambel nagape Samariai taun inimba agiligima sa'i Sikar. Anamba nape felefele'ma Jekop fowa' nagaso'anap nogamana ananinai

* 3:31: Jo 3:11 * 3:33: Jo 1:32 * 3:34: Mt 11:27; Jo 5:20, 10:17 * 3:35: Jo 3:16-18; 1 Jo 5:12; Lu 3:7 * 4:1: Jo 3:22,26 * 4:4: Lu 9:52; Jen 33:19; Jos 24:32

Josepa. ⁶ Ifata sogola embelatai fowa' Jekop nagandowatai tape wambel ambalemba. Nogota atamba nemaf awin nandasapa'. Jisas nafi'i laogon na'amba napoma noma'w ifata atamba saga' embela.

⁷ Ea' ano'w nemata'w Samariai'wi kwafi'i kwa'i kola embel, owa' Jisas natolo'w a' nahali'akwa kogaso'ana anambel embel. ⁸ Apa' alipumi ananiami mafe' wambel lu'wambili ma mogatalai gwa'aisi.*

⁹ Ea' nemata'w akwamba kwa'ipana kwa'i, "Ina' Judainai, ina apa' atepa, owa'atin. Ae' nemata'w Samariai'wai. Dei' maina ina' nagahali'ima embel, 'Isi'ina embel nega' embel?' "

Esis Juda ina sagaloma esis Samaria atogini, owa'atin. Esis naumbih.*

¹⁰ Ea' Jisas nagwama'wa basef ako'w na'i, "I'i ina' okom mopaina ma negawa anin mae fasifasini God na'i nogasi'iananiai, ina' a' negawa aman anamba nagahali'inai ma embeli, ina' nihali'anama anambel embel ambal namili lagapaimbeli anen a' nese'enambel."*

¹¹ Ea' kwa'ipana kwa'i, "Aman Dembinai, ifata ana'e launai nowala gani awin. Ina' baket akena ma negela embel. Dei' ina' nilai embel ambalemba ambal namili lagapaimbeli anima? * ¹² Akunamapa ape'inai Jekop na' embelata nao'wa nogaopana ananisi saloma mafis bulmakau sipsip maim asasimi sa'ambelata. Dei' ea' nakwahota tapoma apa'. A'i ina' nikila' anen ama nege-se'apa embel ambal namili lagapaimbeli?"

¹³ Jisas nagwama'wa basef na'i, "Epes mamahisa soga' embel ambalembai, bola iap pese'as wapani. * ¹⁴ Apa' open ami nega' embel ambalemba ae' a'i igaso'anambeli,

* 4:8: Esr 4:1-5; Esr 9:1-10:44; Lu 9:52-53 * 4:9: Jo 4:26 * 4:10: Jo 7:37-38; Re 21:6 * 4:11: Jo 8:53 * 4:13: Jo 6:35

anin ina atiasi iap pese'an wapani ma nimaguf hiafi dondol negape, owa'atin. Embel ambalemba ae' agaso'anambeli atiasi begataga si'i embel bagataga dowafi bambul atapimbel bagapani ma nomon opaf ananifi nefa' ambal namili negape andeande' lifilafi.”

¹⁵ Ea' kwa'ipana kwa'i, “Dembinai, ina' se'e embel ambalemba ma ae' ina ata' iap pese'e itanima ifi'i na'a ma egela embel wapani, owa'.”

¹⁶ Ea' Jisas na'ipa'w na'i, “Ina' fo'o falai waulunamena nili' ea' pitanima pifi'i na'a.”

¹⁷ Ea' kwagwamana basef kwa'i, “Ae' aman ake.”

Jisas na'ipa'w na'i, “Ina' na'i ina' aman akena, isimba ina' na'i endilisi atis. ¹⁸ Dei' main? Ina' fowa' amam ine'imi wanom biam. Apa' aman anamba dei' ina' nape nagalomanai anamba ina' aman ine'inai, owa'. Basef ifimba ine'ifi endilisifi.”*

¹⁹⁻²⁰ Ea' kwa'ipana kwa'i, “Aman Dembinai, dei' ae' egawaena, ina' anina profet. Esis a'mes bafas ape'isi safe' sogonalo'ma halafuta anamba sanda' lotuma. Ea' ipa' Juda pa'i wambel esis sanda' lotuwagoma anamba napani Jerusalem.”

²¹ Ea' Jisas na'ipa'w na'i, “Nemata'w, ina' nindahapifa ae'. Anef nemaf feगतaga ipa' ina atiasi pefe' penda' lotuma Ahame halafuta atamba, a penda' lotumana Jerusalem atogon, owa'atin. * ²² Ipa' panda' lotuma hiahawes ipa' owa' pegegawasia. Apa' Juda manda' lotuma hiahawes apa' mogogawasi. Basef kofagefa ma apa' manda' lotu ifimba. God nowambilai amam nematawa ma nogakwaha waf awafi esis sanda'afi, amamba matagama apa' Juda atepa. ²³ Nemaf afamba fa'i figatagai, dei' fataga ea' ma amam nematawa mamahisa sanda' lotu endilisii a'

* 4:18: Diu 12:5-14; Sam 122:1-5; Jo 7:40, 9:17; 1 Ko 14:24-25 * 4:21: 2 Kin 17:29-41; Ais 2:3; Ro 9:4-5

sondanda' lotuma Ahamapa Goda Ambal bu'unai ananinai noloma waf bu'wafi endilisifi. Anen nowando'ma amam nematawa na'ambaisi ma sonda' lotumana. * ²⁴ God anen ambal. Na'amba amam nematawa mamahisa si'i sonda' lotumana endilisii, esis a' sondanda' lotumana andeande'ma ukup peloma ambagof اساسimi ma waf endilisifi.”*

²⁵ Nemata'w akwamba kwagwamana basef kwa'i, “Ae' egawa aman anamba Mesaia sofalana saga'i Kraisi, God nandandepana nosapa'ana nugafi'ii. Afamba anen nugafi'i, nowalapam ni'ipapa hiahaom hiami.”*

²⁶ Ea' Jisas na'ipa'w na'i, “Ae' ea' ma'uwi, dei' a'i alomena.”

Alipumi Jisasi motanima mafi'i

²⁷ Anen na'ipa ako'w na'amba, owa' alipumi ananiami motanima mafi'i. Ea' amom a' nomonas hiahawesa anen naloma nemata'w akwamba nalutu naga'i. Apa' amom ina anona nahali'ana na'i, “Ina' na'i nefa' main? Ama dei' naloma'w naga'i?” Owa'.

²⁸ Ama main, nemata'w akwamba kwa'waha baket kogola embelatai ta'oh, kotanima kwafe' taun wambel lu'wambili. Ea' kwa'ipa esis kwa'i, ²⁹ “Ipa' pifi'i piti anona aman nawalapai hiahaom hiami fowa' ae' anda'ami na'ipiam hi'alam. Anen Kraisi a'amon?”

Ea' esis same' na'amba, ³⁰ sakwaha wambel safi'i sati Jisas.

³¹ Owa' alipumi ananiami ma'ipana dindinip ma'i, “Ina' ata' nea' gwa'aisi.”

³² Owa' anen na'ipam na'i, “Ae' anis gwa'aisi sa'oh, isimba ipa' owa' pegawasa.”

³³ Ea' alipumi ananiami atom mape manifas ma'i, “A' anis sofa'manai anis gwa'aisi a'a?”*

* 4:23: 2 Ko 3:17; Ro 12:1; Fl 3:3

* 4:24: Jo 1:41

* 4:25: Mk 14:61-62;

Jo 9:37 * 4:33: Jo 6:38, 17:4

³⁴ Ama main Jisas nawalapef na'ipam na'i, "Gwa'aisi ae'asi isimba. God nasapa'e afi'i. Dei' ae' a'i indaila okom ananini atom enda' maol ananini atin efe' imbifan hi'in-dalan. Maol inimba si'i gwa'aisi ae'asi. * ³⁵ Ipa' paga'ias pa'i, aomb biambibiamb ata' bape ma nogota atamba gwa'aisi sogaofatai togataga. Apa' dei' ae' a'ipipa, ipa' ata' sa'ma naep petologon aof tulif. Gwa'aimi maof ea' ma sogala'am. ³⁶ Epen ami negala' gwa'aisii, anin nefa' otamba ma maol inimba nanda'ani. Ea' nakolasa gwa'aisi isimba ambal namili lagapaisi sogape lifilafi. Ea' epes isimba sagawasi saloma anis daias sagala'asi sokolata sondagala atin. ³⁷ Na'amba dei' basef gawaifi ifimba afataga endilisifi atif, 'Anin epen nawasogon aof afamba, ea' anin daian nafe' nala'as.' ³⁸ Ae' asapa' ipa' pafe'ma pegala'i gwa'aisi aof afamba fowa' ipa' owa' penda' maolanafia. Anis epes sanda' maola aof afamba, ea' ipa' pefa' gwa'aisi dowafa esis daias sanda'as sagawasi."

Esis Samaria hiasi sahapifa Jisas

³⁹ Ako'w doko' kwa'i Jisas nawalapa hiahaom ako'w fowa' kwanda'ami, nawalapam na'ipa'wam alihim. Ea' esis Samaria amam nematawa hiasi sagape taun inimbai same' basefa ako'w asahapifana. ⁴⁰ Ea' esis safi'mai anen sahali'ana dindinip sa'i ata' nope nogaloma esis. Ea' napani nimaguf bif nalomas wambel ambalemba. ⁴¹ Ea' epes hiasi wapani wambel ambalembaisi same' basef ananifi sahapilif. * ⁴² Ea' sa'ipa ako'w sa'i, "Dei' apa' ina mame' basef ine'ifi atif mahapilif, owa'atin. Apa' mame' basef aman anambai a' mogawa anen atona nowambilai amam nematawa hiasi itapasi mokwaha waf awafi asasifi sogotanimai."*

* 4:34: Lu 10:2 * 4:41: 1 Jo 4:14 * 4:42: Jo 4:40

Jisas nanda' anin awani anona aman nanda' maola kingi bo'wen

⁴³ Nimaguf ifimba bif hi'alef, Jisas nakwaha wambel ambalemba a' nafe' itap lu'upa Galili. * ⁴⁴ Fowa' jisas anen atona nawalapa basef na'if na'i, "Anona profet ina anagol agol gatoma gandawalapana alihigila wambel kofagama ananima, owa'."*

⁴⁵ Ea' dei' nafe' nataga itap apamba Galili, ea' esis asonahasa anen nagafi'i. Dei' main, esis fowa' safe' Jerusalema nemaf bu'wafi Pasovaefi ea' satolom sogawa hiahaom hiami anen nanda'am nemaf afambai.*

⁴⁶⁻⁴⁷ Anen notanima nafe' wapani nataga anambel wambel Kana itap lu'upa Galili. Wambel ambalemba fowa' nambema embel bagataga si'i waina. Ea' anona agilinai nanda' maola dembinai kingi, nogamana ananinai aowas nanda'ana na'oh anambel wambel Kaperneam felefele'ma a' nogaga'. Apa' agilinai anamba nape Kana name' basefa Jisas nakwaha itap lu'upa Judia nafi'i Galili, ea' nafe'ma Jisas nahali'ana dindinipa nefe' nonda' nogamana ananinai bo'ona.*

⁴⁸ Ea' Jisas na'ipana na'i, "I'i ipa' hipai pigati banagami mamimami si'i God nanda'amima, ipa' pihapifi. I'i owa', owa'atin."

⁴⁹ Ea' anen nanda' maola dembinai kingi na'ipana na'i, "Dembinai, ina' lianai kwafalis. Na'amba nogame ae'anai a' noga'."

Ea' Jisas na'ipana na'i, "Ina' fo'o. Nogamena ine'inai atiasi a' nope namona ambal lopaona."*

⁵⁰⁻⁵¹ Ea' aman anamba nahapifa basef Jisasi a' nafe'. Anen ata' nafe' atin ufia'w owa', amom manda'mana

* 4:43: Mt 13:57 * 4:44: Jo 2:23 * 4:45: Jo 2:1-11; Mt 8:5-6 * 4:46-47: Jo 2:18; 1 Ko 1:22 * 4:49: Mt 8:13; Mk 7:29

maoli mafi'li matolona ufi'a'w ma'ipana ma'i, “Nogamena ine'inai ambal lapaona a' nosafel nape.”

⁵² Ea' nahali'ama nogota mamahotama nogamana ananinai nosafel bo'ona kwasakwasala. Ea' ma'i, “Nambati' awin nendemba'a aowas alop nifipini nakwahona ea' hi'alan.”*

⁵³ Ea' ahama awani inimbai a' nogawa nambati' nogota atamba atota Jisas na'ipana na'i, “Nogamena ine'inai ambal lopain nepe.”

Ea' nahapifa Jisas naloma esis amam nematawa ananisi wapani. * ⁵⁴ Fowa' Jisas nakwaha itap lu'upa Judia a' nafe' nataga itap lu'upa Galili, ea' dei' nanda' ametal inimba banagani. Ametal inimba nagafe'ma bifi nanda' awani inimba bo'wen.

5

Jisas nanda' anona aman bo'ona anemb dumb Betesda

¹ Jisas nape Galili ma main, anef nemaf esis Juda sogal' gwa'aisi lu'wasiafi ea' fataga. Ea' anen non-dowasa' Jerusalem. ² Wambel ambalemba nomon felefele'ma uta lu'utai sipsip magawisatai anamba anemb dumb sa'usa'umbi betahagon. Agilimba esis sofalamb diga Hibru'i sa'i Betesda. Dumb ambamba ambugufimba wa'owa'ol sala' ifagw sanda' ilalef wanelef bialef fape. ³ Ilalef afa'lemba epes isimba hiasi aowas nanda'asi sape saloma isimba naep pagaso'asi saloma bo'wagahi lagof saga' sagailasi. [Esis sape sasasa embel pindawianama atina benda'as da'inda. ⁴ Anif nimaguf anona ensel Dembinai Godi nakwehef nowala dumb ambamba nanda' embel banda'as wianaiwiana ea', dao'. Epen ami aowas nanda'ani nili' nefe' newala embel a' netaga bo'wen wapani.]

* 4:52: Ap 16:14-15,31 * 4:53: Jo 2:11,23

⁵ Anona aman nape aowas lu'unai nanda'ana nape afagof hiagufi 38-pelaiguf. ⁶ Ea' Jisas natolona tol na'oh ea' nogawa aman anamba awasina na'oh nogota laota a'owa'. Na'amba nahali'ana na'i, "Ina' na'i atiasi alop ine'ipi potaga bo'op, a'a owa'?"

⁷ Ea' nagwamana basef na'i, "Aman dembinai, nemaf afamba embel banda'as wianaiwiana ina anis epes sasa'me salae ewala embel, owa'atin. Ae' atowe anda'am a'i efe' owa'a, anis daias sali' sowala sikila'e."*

⁸ Ea' Jisas na'ipana na'i, "Ina' safel dasa'ma nilutu nefa'alahis ine'isi a' nilutu nefe'."

⁹ Ea' kwafalis atis alop ananipi ea' pataga bo'op andeande'. Na'amba anen bo'ona nosafel nalutu nasa'maalahis ananisi ea' nafe'. * ¹⁰ Ea' amom dembami esis Judai mati aman anamba aunai nasa'malahis ananisi nofa'as nalutu nafe' naep amamipi nemaf afamba sabat noma'wafi. Ea' ma'ipana ma'i, "Dei' nemaf apa' magapoma noma'wafi, mu'uli ape'ini na'i owa'i ma' ina' nesa'malahis nefa'as negafe'a, owa'i."

¹¹ Owa' anen nagwamama basef na'i, "Aman anamba nanda'e bu'uwai anen na'ipi na'i, 'Sa'malahis ine'isi a' nefa'as nefe'.' "

¹² Ea' mahali'ana ma'i, "Aman mamahonama na'ipina na'i, 'Ina' sa'malahis ine'isi nefa'as nefe'?' "

¹³ Apa' aman anamba ina nogawa anen nanda'ana bu'unai, owa'atin. Dei' main? Jisas nafe' nandambaho'naloma amam nematawa hiasi wambel ambalembaisi. * ¹⁴ Ama main Jisas natolona ipat lu'unai Godi na'ipana na'i, "Neme!! Dei' ina' ambo'wena ea'. Ea' ina' owa'i nitanima nefe' nenda' waf awafi wapania, owa'. Na'amba hiahaom awami endilisi a' motagamena.

* 5:7: Mt 9:6 * 5:9: Jo 9:14; Nia 13:19; Jer 17:21; Lu 13:14 * 5:13: Jo 8:11

¹⁵ Ea' nafe' na'ipa amom Juda na'i, "Aman anamba nanda'e bu'uwai anen Jisas."*

¹⁶ Ea' dei' amom Juda ukup numbutipa anen nanda' aman anamba awasinai nosafel nofa' alahis naga'ihisi nagafe' nemaf afamba sagapoma noma'wafi. Ea' dei' mosafel manda'mana waf awafi mowando'mana ma mogahana.

* ¹⁷ Ea' Jisas nagwamama basef amom na'i, "Ahame ae'anai nanda' maol nafi'i notambel dei' nemaf afa'e sabat wapani. Ea' ae' wapani anda' maol si'i anen."*

¹⁸ Owa' amom Juda ukup panda'i atin a'owa' ma'i mohana nogaga'. Amom ma'i anen nosambala basefa mu'uli ma nemaf afamba sagapoma noma'wafi. Ea' Jisas na'ias wapani na'i God anen ahamana ananinai endilisi. Ea' amom ma'i anen na'i a' notaga nope na'amba atin si'i God. Isimba atis dei' mandaiwa'mana.*

Nogamana Godi anen agol gatomana ma nanda' maol

¹⁹ Ea' Jisas nagwamama basef amom na'i, "Ae' a'i endilisi atis a'ipipa. Ae' Nogamana Godi ina la'ifiwai ma enda' anis maefaha okom ae'ami atom, owa'atin. Ae' anda' hiahawes isimba ati ahame nanda'asi, ea' isimba atis. Dei' main, hiahaom hiami ahame nanda'ami, amamba ae' Nogamana wapani dei' anda'am. *

* ²⁰ Ahame ae'anai a' okom maimaila ae' Nogamana a'owa' nihimba'me hiahaom hiami anen nanda'ami. Ma anaf nigihimba'me anin maol lu'wani nikila' amamba. Na'amba atiasi ipa' a' gogololasipa kwapete' ma maol inimba lu'wani. *

²¹ Ahame nagasa'ma esis sagaga'i sogosafel wapani ma nogaso'as ambal namili. Ea' dei' na'amba atin Nogamana ananiwai wapani ae' aso'as ambal namili epes ae' okom

* 5:15: Mt 12:14 * 5:16: Jo 9:4 * 5:17: Mt 26:4; Jo 7:1,30; Jo 10:30,33

* 5:18: Jo 5:30, 8:28 * 5:19: Jo 3:35 * 5:20: Ro 4:17; Ef 2:5; Jo 11:25

maga'iasi. * ²² Ahame God ina nagawaloga anin epeni si'i sanda'mas koti sanda'as, owa'. Maol hiani ma nonda'masa kot, a' nase'ean ae' Nogamana hi'alan. * ²³ Ama dei' esis amam nematawa hiasi sasa'ma agol ae' Nogamanai lu'wagol si'i sagasa'ma agol ahamai lu'wagol. Epen mamahina owa' negasa'ma agol ae' Nogamanai lu'wagola, epen inimba anin ina nasa'ma agol ahamai God nasapa' ae' agafi'ii lu'wagol, owa'atin. * ²⁴ Endilisi atis ae' a'ipipa. Epen ami neme' basef ae'afi ma nihapifa anen nasapa' ae' agafi'ii, epen inimba anin ina a' nefa' basef lu'wafi ma kot, owa'atin. Anin a' nefa' ambal namili nikila' ga'. * ²⁵ Endilisi atis ae' a'ipipa, nemaf afamba fa'i figatagai, dei' fataga ea' ma esis sagaga'i atiasi sogame' lagol ae'agili Nogamana Godi. Epes ami sogame' ae'i, atiasi asofa' ambal namili ma sogape bo'wes endilisi. ²⁶ Ambal namili lape ahame atona. Ea' nowa' banaga ae' Nogamana ananiwai ea' ae' wapani na'amba atin si'i anen ahame, ambal namili lapauwai, * ²⁷ ae' ataga epen egefa' alop epesi. Na'amba God nase'e agola hiahaom banagami ma egawaloga epesa kot basef lu'wafi. * ²⁸⁻²⁹ Ipa' ina a' ukup hiahawep pepoma amamba, owa'i. Nemaf dondo'afi fi'i fegataga amam nematawa hiasi saga' sawas sagape wandlefi anaf some' malogol ae'agili sosafel sokwaha wandlef suwisi ando'. Ea' epes ami sanda' waf fasifii, anaf sosafel wapani sofa' ambal namili sope namis. Apa' epes mamahisa sanda' waf awafii, anaf sotanima sosafel sefe' sulumu sonda' basef lu'wafi ma kot.”*

Anis epes sawalapa basef kofagefa sa'ifa Jisas

* 5:21: Jo 3:17, 5:27; Jo 9:39; Ap 10:42 * 5:22: Fl 2:10-11; 1 Jo 2:23 * 5:23: Jo 3:15-18; Jo 8:51; 1 Jo 3:14 * 5:24: Mt 8:22; Ef 2:5-6 * 5:26: Jo 1:4, 5:22
* 5:27: Dan 12:2; Mt 16:27; Jo 6:40; Ap 24:15 * 5:28-29: Jo 5:19, 6:38

³⁰ Ea' Jisas na'ias na'i, "Ae' ina anda' anin mae ma okom ae'ami atom, owa'. Basef ae' agame'efa ahamai, ifimba atif ailif awalapefa esisa kot. Ea' basef ifimba ma kot ae'atai ifimba usi'if andeande'. Ae' ina anda'ama agaila nomonas ae'asi atis, owa'atin. Ae' anda' maol aila okom aman anamba nasapa'e agafi'ii. * ³¹ I'i ae' atowe ewalapa basefa ae' atowe ai, na'amba ipa' api'i basef ifimba ae' aga'iefi ina endilisifi. Owa'atin. Pi'i basef baso'aifi. * ³² Anen nape dei', nawalapa basefa ae'. Na'amba ae' dei' egawa basef ifimba faga'iasa ae'i endilisifi atif. ³³ Fowa' ipa' pasapa' basef fafe'mago Jon. Anen nawalapa basef endilisifi ma ae' ea'. * ³⁴ Na'amba dei' ae' ina efala anis epes itapasi ma sowalapa basefa ae' sogatopalope, owa'atin. Ae' a'i God nuwambilipai nokwahomepa waf awafi pitanima pifi'mai anen. Ea' dei' a'i basef ifimba. ³⁵ Aman anamba Jon si'i anin nagwapina nogogala'ma amam nematawa. Ea' ukup ipe'ipi pa'i aho'ma ipa' pendagala nogota atamba kwaia'uta ma mogogala'i amamba Joni. * ³⁶ Hiahaom amamba maol banagani ahame nase'ean na'i imafian enda'an hi'igalani, inimba atin ae' dei' anda'an. Inimba maol banagani nikila' maol Joni nagawalapa basef kofagefa ma ae'i. Ea' maol inimba ae' anda'ani nihimba'ma esis amam nematawa sogogawa Ahame nasapa'e dei' afi'i. * ³⁷ Ea' Ahame nasapa'e agafi'ii, anen atona nawalapa basef kofagefa ma ae'. Apa' fowa' gani pafi'i pataga dei' ipa' ina pati nogohnaep ananisi a pame' amalemba malogol ananigili, owa'atin endilisi. Ea' ipa' ina pati amaga ananigai, owa'. * ³⁸ Ea' basef ananifi wapani ifimba ina fape ukup ipe'ipi, owa'atin. Dei' main, ipa' owa' pihapifa ae'

* 5:30: Jo 8:13-14 * 5:31: Jo 5:36-37; 1 Jo 5:9 * 5:33: Jo 1:19-34; Jo

3:27-30 * 5:35: Jo 3:2; Jo 10:25,38; Jo 14:11 * 5:36: Mt 3:17; Jo 5:32, 8:18

* 5:37: Jo 6:29

God nasapa'e agafi'ia. * ³⁹ Ukup ipe'ipi pandanda' paga'i basef ifimba fagape Buk Baibeli fagase'epa ambal namili ipe'i ma pegape andeande' lifilafi. Ea' pati basef ifimba pegawa ea' panda' maol pewando'ma basef ifimba hiafi. Dei' basef ifimba atif Baibelifi fa'i ae' fawalape. Owa', owa'atin. ⁴⁰ Ipa' pandaiwama pifi'mai ae' pefa' ambal namili pegape andeande' lifilafi.

⁴¹ "Ae' ina okom ma'i epes itapasi sogasa'ma agol ae'ag-ili lu'wagol, owa'. ⁴² Apa' ae' ea' egawa ukup ipe'ipi ina paipaila God, owa'atin. * ⁴³ Ae' afi'i agol ahame ae'anai, apa' ipa' ina pase'e opalef ae', owa'atin. Apa' anaf anona aman daiana nogafi'i ma agol ananigili atogili, ipa' a' pi'i aho' pese'ana opalef anen. * ⁴⁴ Ukup ipe'ipi pa'i pen-defa' agof lu'wagufi ma sahopepa owapepa ipe'imi atom. Apa' God owa'atin. Dei' ipa' atiasi pihapifi pi'imama? Owa'atin. * ⁴⁵ Ipa' ina a' ukup pendanda' pi'i atiasi ae' enda' kotimipa ma Ahame God, owa'atin. Aman nonda' kotima ipe'i, anen Moses, aman anamba ipa' pa'i atiasi nogatopalopipai. * ⁴⁶ Ipa' i'i pihapifa basef ananifi, ea' pihapifa basef ae'afi wapani. Dei' main, anen atona nanda' basef ifimba ma ae' fail Buk Baibel. * ⁴⁷ Apa' ipa' owa' pihapifa basef anen nanda'afi ma ae'a, owa'. Atiasi ipa' pihapifa basef ae'afi pi'imama? Owa'atin."

6

Jisas naso'asa gwa'aisi epes hiasi 5000-pelais sa'as

(Mt 14:13-21; Mk 6:30-44; Lu 9:10-17)

¹ Jisas nanda' basef ifimba ma main, a' nafe' nambo dumb ambamba Galili fisanamb. Dumb ambamba sa'i

* 5:38: Lu 24:27,44; Ap 13:27; 2 Ti 3:15-17; 1 Pi 1:10-11 * 5:42: Mt 24:5

* 5:43: Jo 12:43 * 5:44: Diu 31:26-27 * 5:45: Diu 18:15; Ap 3:22

* 5:46: Lu 16:31

Taiberias. ² Ea' amam nematawa hiasi safi'mai anen. Dei' main, esis sati hiahaom amamba banagami anen nanda'am na'ambai ma nanda' isimba aowas naninani nanda'asi sagataga bo'wes. Ea' sailana.*

³⁻⁴ Nema' afamba lu'wafi sanda' gwa'aisiafi saga'i Paso-vaefi felefele' ma fegataga. Ea' nondowasa' halafuta atamba nao'wa alipumi anan mape. ⁵ Jisas natologon ganigani nati amam nematawa hiasi safi'mai anen. Ea' na'ipa Filip na'i, "Afa' ata' otala bret ani ma ogaso' amam nematawa isimba sogata?"

⁶ Apa' Jisas nagwambana na'ias na'amba. Anen no-gawas ea' hiahawes anen na'i nonda'asi.

⁷ Ea' Filip nagwamana basef na'i, "Afa' i'li ogatala bret 200 kina, ina atiasi dondo'ma epes isimba hiasi sea'ata kwasakwasala, owa'atin."

⁸ Ea' anona amom alipumi Jisasi Andru, Saimon Pita sahomana, na'ipa Jisas na'i, ⁹ "Anona aman sa'unai nahapila anis gwa'aisi bret sa'usa'utai wa'agolita taloma agof sa'ugufi biagof nape na'a. Apa' isimba ina atiasi dondo'ma epes isimba hiasi, owa'atin."

¹⁰ Anamba otalef fasilifi fagapoma. Ea' Jisas na'ipa alipumi na'i, "Kipa esis amam nematawa hiasi sope itap."

Ea' amam atom mataga 5,000-pelaim mape otalef itap. ¹¹ Ea' Jisas nafela bret atamba nanifela God ama ea', naso'asata esis sagape itapi. Ea' nanda'as na'amba atina agof wapani. Naso'asas sa'as alihis dindi'i dondo' si'i doko' nolomagahas. ¹² Sa'as alihis ea', anen na'ipa alipumi ananiami na'i, "Ipa' petatama du'wawanis sagasaga'ih. Na'amba so'oh sowala dowadowaf."

¹³ Esis sa'as safe' owa' du'wanis sa'oh. Ama main, alipumi mafe' matatama du'wa'wanisi malo'was folalef lu'walifi 12-pelailifa bret atamba.*

* 6:2: Jo 2:13 * 6:13: Diu 18:15; Jo 5:46

¹⁴ Ea' esis amam nematawa sati ametal inimba ma hiahaom banagami amamba Jisas nanda'ami sa'ias sa'i, "Endilisi atis, anen aman profet anamba nagafi'i itap apai."*

¹⁵ Ea' Jisas nogawa ukup asasipi sa'i sufi'i sohapilana sonda'ana notaga nope si'i anona dembinai kinga nugu-mafias. Owa', anen atona notanima nondowasa' halafuta ilif.

Jisas nalutu nafe' dumb embel ilif

(Mt 14:22-33; Mk 6:45-52)

¹⁶ A'i owa' wambomota felefele'ma owamb, alipumi Jisasi ¹⁷ malota bot mafe' dumb ambamba ma'i mombo Kaperneam. Ea' owamb baso'am la'afen, apa' Jisas ina dei' nafi'i natagamam, ata' owa'atin. ¹⁸ Ea' fufin banagonai naluwi, naoh amohafel manda'am fetawa lasiali' a'owa'. ¹⁹ Amom manda' pul mafe' nogota lautai si'i nohotagw wanogw, owa' mati Jisas analutu nafi'i embel ilif dumb ambamba nafi'i nataga felefele'ma bot tagafe'ma. Ea' amom ombel maham a'owa'. ²⁰ Owa' Jisas na'ipam na'i, "Ipa' banagepa, ombal mogahepa owa'. Ae' atowe ma'uwi ailipa afi'i. Ipa' ina a' ombel mehepa, owa'i."

²¹ Ea' ma'i aho'ma nondagai bot. Ea' bot atafe' kwafalis tataga tol anamba amom ma'i mogafe'ma.

²² Esis amam nematawa hiasi nambati' sagapani dumb fisanai, esis sogawa ea' sa'i, "Nambati' alipumi ananiami atom malota bot atamba a' mafe'. Apa' anen ina nafe' nalomam, owa'atin. Ina a' anota bot tail taloma atamba, owa'. Atotota tala."*

²³ Ea' anogw botagw wapani Taibiriasigwi gwafi'i felefele'ma na'amba anen nape nanifela God nagaso'as gwa'aisima. ²⁴ Esis amam nematawa sati Jisas naloma

* 6:14: Jo 18:36; Mt 14:23 * 6:22: Jo 6:11

alipumi ananiami amom ina ata' mape, owa'. Ea' safe' salota anogw botagw safe' Kaperneam solaoma Jisas.

Jisas anen gwa'aisi bret tagafi'i heveni

²⁵ Esis solaomana ma satolona gani wa'ol dumb ambamba fisanamb, sa'ipana sa'i, “Dembina Tisa, ina' nambai' nafi'i na'a?”*

²⁶ Owa' Jisas nagwamasa basef na'i, “Ae' a'ipipa endilisi, ipa' ina ukup pandanda'ma banagami ae' anda'ami dei' pafi'i pa'i petolowe, owa'atin. Ipa' ukup papoma bret atota paga'atai ma nelelemb ipe'ilimbi si'ilimb, isimba atis dei' pala' pelaome pafi'i. * ²⁷ Ipa' ina a' penda' maola pegefa' gwa'aisi isimba awasi folo'ogolasi, owa'i. Ipa' a' pendanda' maola gwa'aisi bu'wasi saga'asa sogape be'es andeande' lifilafii. Gwa'aisi isimba ambal namili lagape lifilafii. Gwa'aisi isimbai ae' ataga epen egefa' alop epesi, ae' atowe atiasi ese'epas ipa'. God a' nase'e agola nandandepe ea' ma enda' maol inimba lu'wani.”

²⁸ Ea' sahali'ana sa'i “Dei' apa' monda' maol main ata' nili'ma monda' maol Godi?”*

²⁹ Ea' Jisas nagwamasa basef na'i, “Maol Godi na'amba. Ipa' pihapifa ae', God nasapa'e agafi'ii.”*

³⁰ Ea' esis sa'ipana sa'i, “Ina' nihimba'mapa hiahaom maim banagami ma apa' mitilina mogahapifina? Ina' nanda' maol main? * ³¹ A'mesapa ape'isi fowa' sa' anis gwa'aisi agilisa sa'i mana ma itap apamba wafigima fataupigima si'i basef fagape Baibeli fa'ias faga'i, ‘Anen naso'asai gwa'aisi sagafi'i heveni sa'as.’”

³² Ea' Jisas na'ipas na'i, “Endilisi atis ae' a'ipipa, Moses ina nase'epa gwa'aisi isimba sagafi'i heveni, owa'atin.

* 6:25: Jo 6:11-12 * 6:26: Jo 4:14; Jo 6:48-58 * 6:28: 1Jo 3:23 * 6:29: Mt 16:1; Jo 2:18 * 6:30: Eks 16:14-15; Nam 11:7-9; Sam 78:24

Ahame ae'anai atona nasi'ipai gwa'aisi isimba endilisisi.
³³ Gwa'aisi isimba God nagasi'ipasi isimba ae' akwaha ilif isila'i ma agaso'asa ambal namili esis amam nematawa hiasi sagape itapi.”*

³⁴ Ea' sa'ipana sa'i, “Dembina, dei' ina' nese'apa gwa'aisi isimba atapis sope lifilafi.”*

³⁵ Ea' Jisas na'ipas na'i, “Ae' atowe ae' gwa'aisi bret ambal namili bu'wali lagapauwai. Epen ami nigafi'mai ae'i ina atiasi nolomohan, a epen mamahina nigahapifa ae'i, anin ina atiasi iap pese'an wapani ma embel, owa'atin.

* ³⁶ Ae' a'ipipa, ipa' patolowe ea' apa' ipa' ina pahapifa basef bu'wafi ae'afi, owa'. * ³⁷ Epes mamahisa ahame nagase'eas ae'i, isimba atis asifi'mai ae'. Epen ami ni'i nigafi'mai ae'i, ae' ina atiasi ili'amonan, owa'atin endilisi.

* ³⁸ Ae' ina akwaha heven isila'i ma igaila okom ae'ami atom, owa'atin. Ae' afi'ima igaila basefa okom ananiami nasapa'e agafi'ii. * ³⁹ Okom aman anamba nasapa'e agafi'ii magape na'amba. Esis amam nematawa hiasi anen a' nagase'eas ae'i, ae' ina ekwaha anin atitin nepe higililan lamonan, owa'atin. Ae' egasa'mas wapani nemaf akutaifi. * ⁴⁰ Okom ahame ae'anai magape na'amba. Amam nematawa hiasi mamahisa siti ae' ma sogame' basef ae'afii ma sogahapifai, esis isimba atiasi sofa' ambal namili sogape andeande' lifilafii. Ea' esa'mas wapani nemaf akutaifi.”

⁴¹ Ea' anen na'i, “Ae' atowe gwa'aisi akwaha heven agafi'ii.”

Anen na'ias na'amba, owa' esis Juda sanda' megahahana sa'i basef hiafi ma anen. * ⁴² Esis sa'ias na'amba sa'i,

⁴¹ Ea' anen na'i, “Ae' atowe gwa'aisi akwaha heven agafi'ii.”

Anen na'ias na'amba, owa' esis Juda sanda' megahahana sa'i basef hiafi ma anen. * ⁴² Esis sa'ias na'amba sa'i,

* 6:33: Jo 4:15 * 6:34: Jo 4:14; Jo 6:48-58 * 6:35: Jo 20:29 * 6:36: Jo 17:6-8; Mt 11:28 * 6:37: Mt 26:39; Jo 4:34 * 6:38: Jo 10:28-29; Jo 17:12 * 6:39: Jo 11:24 * 6:41: Mt 13:55

“Dei' si'i main? Aman anamba Jisas anen Josep nogamana. Ahamanai ma'mana ananisi apa' mogawas. Dei' maina anen naga'i, 'Ae' akwaha heven isila'i?”

⁴³ Jisas nagwamasa basef esis na'i, “Ipa' ina a' pi'i basef hiahaof la'afena ipa'. * ⁴⁴ Anin epen ina la'ifina anin atin nigafi'mai ae' dowaf, owa'atin. Ahame nasapa'e dei' afi'i, anen i'i nogasa'ma nomonas anin epeni, dao'. Epen inimba atiasi a' nifi'mai ae', ea' anaf ae' esa'man wapani nemaf akutaifi. * ⁴⁵ Basef amom profet maga'iefi fagape Buk Baibeli faga'i na'amba fa'i, 'God anaf nuwalipa amam nematawa hiasi.’

Amam nematawa hiasi hi'ilas sogame' basef ahame ae'anai ma sogogawa anini, esis isimba sogafi'mai ae'i.*

⁴⁶ “Ina anin epen atitin nati ahame, owa'. Fowa' ae' ape agaloma Goda agafi'ii, ea' ae' atowe atolona. * ⁴⁷ Ae' a'ip-ipa endilisi atis. Epen ami neme' basef ae'afi nihapifi, anin dei' nefa' ambal namili nepe andeande' lifilafi. * ⁴⁸ Ae' gwa'aisi bret ambal namili lagapauwai. ⁴⁹ Fowa' a'mesepa ipe'isi sa' gwa'aisi isimba mana itap anamba wafigima fataupigima, dei' asaga' safe' ea'. ⁵⁰ Apa' gwa'aisi isimba dei' sakwaha heven sagafi'i isimba na'amba. I'i epen ami nega'asi, anin ina atiasi a' nega', owa'atin. Nepe atapin. ⁵¹ Ae' gwa'aisi ambal namili lagapauwai akwaha heven nepe andeande' lifilafi. Gwa'aisi isimba ae' atiasi igasi'inasi, isimba alop ae'api ese' amam nematawa itapasi ma sogofa' ambal namili sogape andeande' lifilafi.”

⁵² Ea' amom dembami Juda ma'i basef mehip mandahihianama Jisas la'afena amom atom ma'i, “Dei' si'i maina aman anamba na'i nogaso'apa alop ananipi apa' moga'ap?”

* 6:43: Jo 6:65 * 6:44: Ais 54:13 * 6:45: Jo 1:18 * 6:46: Jo 3:15-16

* 6:47: Jo 6:31,58

⁵³ Ea' Jisas na'ipam na'i, "Ae' a'ipipa endilisi atis, ae' ataga epen egefa' alop epesi. I'i ipa' pindaiwa'ma pega' alopi esimbel ae'asima, ipa' ina atiasi pefa' ambal namili, owa'atin. ⁵⁴ Epen ami nega' alopi esimbel ae'asii, inimba dei' a' nefa' ambal namili negape andeande' lifilafi dondoli ea' esa'man wapani nemaf akutaifi. ⁵⁵ Dei' main? Alop ae'api si'i gwa'aisi endilisisi, ea' esimbel ae'ambeli endilisimbeli ma sog'a's. ⁵⁶ Epen ami nega' alopi asimbel ae'asii, anin a' nepe sisihin neloma ae', ea' ae' epe sisihwi eloman. * ⁵⁷ Ahame ambal namili lagapaunai nasapa'e sisihwi afi'i, ea' ae' dei' ape ambal namili ahamai. Ea' na'amba atina epen ami nega' alop ae'apii, anin atiasi a' nefa' ambal namili ma banagami ae'ami. ⁵⁸ Gwa'aisi isimba sakwaha heven sigisila'i, isimba ina sa'ata ma ea' sagasagafi'i, owa'atin. Epen mamahina nega' gwa'aisi isimbai, anin atiasi a' nefa' ambal namili ma negape lifilafi dondoli."

⁵⁹ Jisas na'ipam na'amba, nawalipam nomon ipat esis Juda sandakolasatai wambel Kaperneam.

Basefa apa' mogape ambal namili lifilafi dondol

⁶⁰ Anis alipisi Jisasi hiasi same' basef ifimba ea' sa'i, "Basef ifimba ahihifa apa'. Atiasi ami nilif? Owa' owa'atin."

⁶¹ Jisas nogawa alipisi ananisi sanda' migimigah. Ea' na'ipas na'i, "Basef ifimba fa'i fehambombaga ukup ipe'ipi a'a? * ⁶² I'i ipa' piti ae' ataga epen egefa' alop epesi itanima ilita gani ilif fowa' agapanima, atiasi agogolalasipa kwapete'epa. * ⁶³ Ambal bu'unai Godi atiasi nese'epa ambal namili pepe andeande' lifilafi dondol. Apa' wafi gawa epesi atis ina asotopalopepa, owa'atin. Basef ifimba

* 6:56: Jo 15:4-5; 1 Jo 3:24 * 6:61: Jo 3:13; Ap 1:9-11 * 6:62: 2 Ko 3:6

atif ae' aga'iefi, ifimba ambal namili lagapaifi fegape andeande' lifilafii. * 64 Apa' anipa ina pahapifa basef ae'afi, owa'."

Dei' main? Jisas fowa' nogawa ami owa' nogahapifanaia ma atiasi ni'ipa boumi nigihimba'mama anen nagapoma.*

65 Ea' na'ipas wapani na'i, "Ae' a'ipipa ma ami nigafi'mai ae'i, ahame ae'anai a' notopalopan nohondo'ani. I'i owa', owa'atin. Ina anis sifi'mai ae' dowaf, owa'. Ahame atona notopalopas nofa'asi, dao' andeande'."

66 Ea' dei' anis alipisi ananisi hiasi asakwahona sotan-ima safe' daindai, ina ata' sape salomana wapani, a'owa'.

67 Ea' Jisas nahali' alipumi ananisi 12-pelaim na'i, "Ipa' wapani pa'i pekwaha ae' pitanima pefe', a'amon?"

68 Owa' Saimon Pita nagwamana basef na'i, "Dembina, afa' okwaha ina' ofe' ugi'ma ami? Basef ine'ifi atif fa'ipafa ma ogape ambal namili andeande' lifilafi. * 69 Afa' wahapifina ogawa endilisi ina' aman Godi bu'winai hilili'i, nasapa'ena nagafi'ii."

70 Jisas nagwamama basef na'ipam na'i, "Ae' andandepa ipa' 12-pelaipa ea' ae'ipai owa' anona ipe'inai ambal au-nai."

71 Jisas na'i anona amamunai amom 12-pelaim agili-nama Judas, anen Saimon Keriotina, nogamana.

7

Amom owapana Jisasi ina mahapifana, owa'

1 Ama main, Jisas nafe' nolalona walemb hiagoma itap lu'upa Galili. Anom Juda dembami asasimi magape Judai ma'i mohana noga'. Na'amba anen ina ata' nape itap asasipi, owa'. Anen nape Galili atogon. * 2 Ea' felefele'

* 6:63: Jo 13:11 * 6:64: Jo 6:44 * 6:68: Mt 14:33, 16:16; Mk 1:24; Jo 1:49
* 7:1: Lev 23:34; Jo 5:18

ma anef nemaf esis Juda sanda' anis gwa'aisi lu'wasi ma ukup pegapoma esis sondolalima God. Ea' sala' aolah sa'uhi sapaoha sanda' gwa'aisi isimba. ³ Ea' owapana Jisasi ma'ipana ma'i, "Ina' nekwaha na'a'e a' nefe' itap lu'upa Judia, ma alipisi sigati maol banagani ine'ini si'i God nanda'ani. ⁴ I'i anona aman ni'i epes hiasi sogogawa maol ananini, anen ina nondambaho' nonda'an, owa'. Ina' ea' na'amba atin, nekwaha wambel ine'imbili nefe'ma epes hiasi sitilina sigati maol ine'ini ma sogasa'ma agol ine'igili lu'wagol."*

⁵ Owapana ananini wapani amom ina mahapifana, owa'. Ea' dei' ma'ipana basef ifimbai.*

⁶ Ea' Jisas na'ipam na'i, "Nimaguf hiafi ipe'ifi atif, apa' nemaf ae'afi dondo'afi ina dei' afataga, ata' owa'. Nogota ae'atai totaga dao', a' efe' Jerusalem. * ⁷ Ae' awalapa waf awafi esis sagape itapi sanda'afi. Ea' dei' esis ukup awepa ae'. Apa' esis ina la'ifisa ukup awepa ipa', owa'atin. ⁸ Ipa' pili' pendowasa' pefe'ma gwa'aisi isimba. Ae' ota'. Dei' ae' ina a' endowasa', ata' owa'. Dei' main, nogota ae'atai ata' owa' totagaia."

⁹ Anen na'ipam na'amba ma ea', ata' napani Galili.

Jisas nafe'ma nigati gwa'aisi isimba lu'wasi gani Jerusalem

¹⁰ Ea' owapana Jisasi mondowasa' mafe' Jerusalem ma gwa'aisi isimba lu'wasi. Amom mali' mafe', anen wapani nagi'mam nondowasa'ma gwa'aisi isimba. Apa' anen ina nafe' nandawalap, owa'atin. Anen nandambaho' atin nafe'. * ¹¹ Anamba sanda' gwa'aisi amom dembami Juda mape naep petaoma Jisas. Ea' mahali' esis ma'i, "Aman anamba nape ani?"

* 7:4: Mt 13:55; Ap 1:14 * 7:5: Jo 2:4 * 7:6: Jo 15:18 * 7:10: Jo 11:56

¹² Amam nematawa hiasi esis atis sandal'ipama anen sa'osa'ombel sa'i, "Anen aman bu'unai."

Apa' anis sa'i, "Owa', anen nagambaso'ma epes hiasii."*

¹³ Apa' ina anin epen nawalapa basef na'if alihifa Jisas, owa'atin. Dei' main, esis hiasi ombel mahasa amom agufumi esis Judai. ¹⁴ Nema' afamba esis ata' sape sanda' gwa'aisi isimba atin, Jisas nafi'i nawis ipat lu'unai Godi nawalipasa basef esis. * ¹⁵ Amom agufumi Judai bombolalasom a'owa' mahali'as ma'i, "Ami naso'ana gawa inimba?"*

¹⁶ Ea' Jisas nagwamam na'ipam na'i, "Gawa inimba ina gawa ae'ani, owa'. Gawa anona amani nasapa'e agafi'ii.

¹⁷ I'i anin epen okom mi'i nenda' maol Godi si'i anen naga'iani, atiasi epen inimba a' negawa basef ae' agawali-pasafi fataga God a'a fataga ae' atowe. * ¹⁸ Ami niga'ipasa gawa ananini atini, anin na'i esis sogasa'ma agol ananigili lu'wagol. Apa' ami ni'i nenda' maola negasa'ma agol anen nasapa'e agafi'ii, anin epen bo'wen hilili'i. Anin na'i basef endilisifi atif. * ¹⁹ Moses nase'epa mu'uli Godi ipa', apa' owa' anin epen nila mu'uli inimbaia, owa'atin. Dei' maina ipa' pa'i pehe egaga'?"*

²⁰ Ea' esis amam nematawa hiasi sagwamana basef sa'ipana sa'i, "Ambal aunai napaina. Dei' ina' na'i, ami na'i nehena nega'?"*

²¹ Jisas na'ipas na'i, "Ae' anda' anom hiahaom ba-nagami atifim. Ea' dei' ipa' gogolalasipa. * ²² Apa' ipa' patopa'mam alop nogaopepa ipe'imi nema' afamba sabat sagapoma noma'wafi. Dei' main? Ipa' pagi'ma mu'uli

* 7:12: Jo 9:22, 12:42; Jo 19:38, 20:19

Jo 12:49, 14:10 * 7:17: Jo 5:44, 8:50

Jo 8:48,52; Jo 10:20 * 7:20: Jo 5:16

* 7:14: Mt 13:54; Lu 2:47

* 7:18: Ap 7:53; Ro 2:21-24

* 7:21: Lev 12:3; Jen 17:9-13

* 7:15:

* 7:19:

inimba fowa' God nagaso' Mosesani. Moses atona ina nali' nanda' waf afamba owa'. Dambadamba waf afamba fali' fapoma amom agufumi Judai fowa'imi magali'i. *

²³ Ipa' patopa'mam alop nogaopepa nemaf afamba sabat ama ipa' ina pewala mu'uli inimba God nagaso' Mosesani. Na'amba ipa' pa'i andeande'ma pagatopa'mam alop nogaopepai. Dei' maina ipa' ukup numbutipa ae' ma anda' anona aman bo'ona andeande' nemaf afamba sabat? *

²⁴ Ipa' owa'i pewaloga hiahawes penda'as hi'ih'i'as naep atip dowafa, owa'. Ipa' pewalogas ukup ipe'ipi ma waf usi'ifi atefa pegegawa waf asasifi be'ef a'a awef.”*

Esis sandahahali'ma sa'i Jisas anen Kraiss, God nasapa'ana a'a owa'?

²⁵ Anis Juda sagape Jerusalemi same' basef ifimba ananifi sahali'as sa'i, “Anen ea' ma'una anamba dembami ape'imi ma'i mohana nogaga'i, a'a owa'? ²⁶ Anen nape nawalipasa basef alihigima apa' amom agufumi ina magwamana anif basef, owa'. Isimba endilisi a'amon? Amom mogawa aman anamba Kraiss, God nandandepana nasapa'ana nagafi'ii, a'a owa'? * ²⁷ Apa' mogawa aman anamba nataga itap ape'ipi. Apa' anaf owagama Kraiss nogafi'i, ina anin epen negawa Kraiss anaf nogatagama, owa'.”*

²⁸ Ea' Jisas ata' nape ipat lu'unai Godi nawalipas na'i mehip na'i, “Ipa' pegawa ae' endilisi apegawa ae' agatagama wambel kofagama. Apa' ae' ina afi'i dowaf aila okom ae'ami atom, owa'. Anen nasapa'e agafi'ii endilisi-nai. Ipa' ina pegawana, owa'. ²⁹ Apa' ae' egawana. Dei' main, fowa' ae' alomana wape atogon ea' anen nasapa'e afi'i.”*

* 7:22: Jo 5:8-10,16 * 7:23: Lev 19:15; Ais 11:3-4; Jo 8:15 * 7:24: Jo 5:18 * 7:26: Jo 7:41, 9:29 * 7:27: Mt 11:27; Jo 8:55 * 7:29: Jo 7:44, 8:20; Jo 13:1

³⁰ Esis same' basef ifimba ananifi, opalef awalefa anen sa'i sofa'ana sonda'mana basef sonda' kotimana, owa' owa'atin. Dei' main, nemaf afamba nogaga'afi ina fataga, ata' owa'.*

³¹ Epes hiasi same'anana dowaf apa' anis sahapifana sa'i, "Nemaf afamba Kraisi nondanda' maol banagani. Maol Kraisi a' nikila' maol aman anamba nanda'ani?"

Amom masapa' anom plisman mafi'i ma mogowa' Jisas

³² Amom Farisi mame' esis amam nematawa hiasi sa'i basef fafifafi ma Jisas. Ea' amom pris dembami maloma amom Farisi masapa' anom plisman amamumi mafi'i mogowa'ana. * ³³ Ea' Jisas na'ipas na'i, "Ae' ina ata' elomepa epe nogota laota, owa'atin. Ae' epe nogota bandata ea' itanima efe'ma anen nasapa'e agafi'ii. *

³⁴ Ipa' atiasi pelaoma ae' pefe', owa'atin. Gani ae' atiasi igapanima, ipa' ina la'ifipa pefe'agono, owa'."

³⁵ Ea' amom Juda atom manda'ipama ma'i, "Aman anamba na'i nefe' anima ma afa'ogolaomana? Anen atiasi nefe'ma esis Juda afa'isi saloma Grik a'amon?"

³⁶ Ea' na'i, 'Ipa' pewando'ma ae' apa' ina atiasi petolowe, owa'.' Ea' na'ias wapani na'i, 'Ipa' ina la'ifipa piti ae' egapoma, owa'.' Basef ifimba kofagefa mamahifa?'"*

³⁷ Owa' nemaf afamba akutaifi lu'wafi ma esis Juda sonda' gwa'aisi isimba, Jisas nalutu na'i dindinip na'i, "Epen ami iap pese'an nifi'mai ae' nea' embel. * ³⁸ Epen ami nihapifa ae' si'i basef fagail Buk Baibeli fa'ias faga'i, 'Ami nigahapifa ae'i, atiasi embel ambal namili lagapaimbeli bitagai okom ananiami nomon a kolo' atin biwisi ando'.' ""*

* 7:30: Jo 2:23, 8:30; Jo 10:42, 11:45; Jo 12:11,42 * 7:32: Jo 13:33 * 7:33: Jo 8:21, 13:36; Jo 17:24 * 7:36: Lev 23:36; Ais 55:1; Jo 4:10,14 * 7:37: Ais 58:11; Sek 14:8 * 7:38: Jo 16:7, 20:22; Ap 2:4

³⁹ Basef Jisasi kofagefa fa'i Ambal bu'unai Godi anaf nope nogaloma esis sogahapifanai ukup asasipi nomon. Nemaf afamba Ambal bu'unai Godi ina' dei' nawis anis epes sagahapifanai, ata' owa'. Dei' main, Jisas ata' owa' noga' nosafel wapani nofa' agol lu'wagilima mogogala'i ananimia, ata' owa'.*

Esis amam nematawa sandawal mini'ap biafip

⁴⁰ Ea' anis amam nematawa same' basef ifimba sa'i, “Endilisi, aman anamba anen dembinai Profet apa' mape mogahafanai.”*

⁴¹ Apa' anis daias sa'i, “Dei' Krai nataga itap lu'upa Galili, a'a owa'? Owa'atin. * ⁴² Basef fagail Baibeli faga'i na'amba fa'i, ‘Krais owagama notaga wambota Deviti wambel Betlehem, Devit fowa' nagapoma.’”*

⁴³ Ea' esis amam nematawa sandawal mini'ap biafipa Jisas. Anis sa'i anen Krai, apa' anis sa'i, “Owa'.” * ⁴⁴ Ea' anis sa'i sofa'ana nefe'ma kot, apa' owa'. Ina anis sando lagof sahapilana, owa'.*

Agufumi esis Judai owa' mohapifa Jisasa

⁴⁵ Ea' plisman amamba motanima mafe'ma amom pris dembami maloma amom dembami Farisi magapoma. Ea' dembami amamba mahali' plisman ma'i, “Dei' maina ipa' owa' pewa' Jisas pefa'ana pifi'ia?”*

⁴⁶ Owa' amom ma'i, “Fowa' gani nafi'i nafi'i nataga dei' owa' anin epen newalapa basef si'i anen naga'iefia, owa'.”

⁴⁷ Amom Farisi magwamama basef ma'i, “Anen namba-so'mepa wapani, a'amon? * ⁴⁸⁻⁴⁹ Ina anona dembinai a'a anona Farisi nahapifana, owa'atin. Apa' amam nematawa

* 7:39: Jo 6:14 * 7:40: Jo 1:46, 4:29 * 7:41: Sam 89:3-4; Mai 5:2; Mt 2:5-6 * 7:42: Jo 9:16 * 7:43: Jo 7:30 * 7:44: Jo 7:32 * 7:45: Mk 1:22 * 7:47: Jo 12:42

isimba hiasi, ina sogawa mu'uli Godi, owa'. Isimba atis anaf God nogwamasa waf awafi esis sanda'afi.”*

⁵⁰⁻⁵¹ Nikodemas fowa' nagafe'ma Jisasi, anen dembinai naloma amom dembami Farisi, nahali'am na'i, “Afa' ande-ande'ma onda' waf awafi ma aman anamba a'a owa'atin? Mu'uli afa'ini naga'i na'amba na'i, afa' uli' uhali'ana ma ogogawa waf ananifi feloma maol ananini, ma main dao', afa' a' wi'i anif basef.”*

⁵²⁻⁵³ Amom ma'ipana ma'i, “Ina' wapani Galilina a'a? Owa'atin. Ina' ata' niti basef fagail Buk Baibeli ea' nitalifif. Ama atiasi negegawa ina anona profet nataga itap lu'upa Galili, owa'atin.”

8

Nemata'w kwanda' so'a wauli kwawala waf sandaso'amaifi

¹ [Amam amamba hiami mafe' ifagw amamigwi, apa' Jisas nondowasa' nafe' halafuta Oliv.* ² Ea' a'i owa' kuhumbita atota notanima nafe' ipat lu'unai Godi. Esis amam nematawa hiasi safi'mai anen ea' nape nawalipasa basef. ³ Ea' amom dembami magawalipasa mu'uli Godi maloma amom Farisi mati ano'w nemata'w kwanda' so'a waol kwaloma anona aman kwa'oh mao'wakw mafi'i. Ea' ma'ipa'w kwalutu la'afena amom hiami matolo'w. ⁴ Ea' ma'ipa' Jisas ma'i, “Dembina tisa, nemata'w akwamba afa' watolo'w kwaloma anona aman kwanda' so'a waola waf awafi. * ⁵ Mu'uli God nagaso' Mosesani na'ipafa na'i afa' okwaha otamba oha nematawa wanda' waf afambai ogaga'. Ina' okom mape ma'imama?”*

⁶ Amom ma'i mogwambana i'i anen owa' nogwamoma basef andeande'a, monda' kotimana. Owa', Jisas nasisil notawa nanda' faf ananifi nanda' anif basef fail itap.*

* 7:48-49: Jo 3:1-2; Diu 1:16

* 7:50-51: Jo 7:41-42

* 8:1: Lu 21:37

* 8:4: Lev 20:10; Diu 22:22-24

* 8:5: Mt 22:15

* 8:6: Diu 17:7

⁷ Amom malutu mahali'ana ma basef hiafi, ea' nosafel nalutu na'ipam na'i, "Ipa' ami owa' penda' waf awafia, ipa' pili' pekwaha otam peha ako'w."*

⁸⁻⁹ Ea' anen nasihil wapani nanda' anif basef fail itap. Amom mati basef ifimba matalifif, ea' mandaumb atona atin motanima mafe'. Amom hagami mali' mafe' ea' sa'umi magi' mafe'. Mafe' atona atin makwaha ako'w kwaloma Jisas atis sape.

¹⁰ Ea' Jisas nosafel nalutu nahali'akw na'i, "Dei' amam amamba mape ani? Owa' anona aman ni'i nonda' kotima ina'a?"*

¹¹ Ako'w kwa'ipana kwa'i, "Dembina, owa'. A' mafe' hi'alam."

Ea' na'ipa'w na'i, "Ae' na'amba atin si'i amom. Ae' ina anda' kotimina, owa'. Ina' fo'o, apa' ina netanima nenda' waf awafi wapani, owa'i."*

Jisas anen si'i nagwapin nogogala'ma amam nematawa sagape itapi

¹² Ea' Jisas na'ipa amam nematawa wapani na'i, "Ae' si'i mogogala'i fasimi egala'ma ipa' hipai pagape itapi. Epen ami nila ae' anin ina atiasi nefe' akota ufiaw anani'wi, owa'. Anin nepe nogogala'i ambal namili lopain."

¹³ Amom dembami Farisi ma'ipana ma'i, "Dei' ina' nanda'i basefa ina' atina. Na'amba afa' ina ohapifina, owa'. Basef ine'ifi ina endilisifi, owa'atin."*

¹⁴ Jisas nagwamam basef na'i, "Ae' a'ipasa basefa ae'. Ea' dei' basef ifimba ae'afi endilisifi atif. Dei' main, ae' a' egawa ae' ataga agafi'ima ea' egawa anamba anaf egafe'ma. Apa' ipa' ina pegawa anamba ae' ataga agafi'ima, anaf egafe'ma, owa'. * ¹⁵ Ipa' pawaloga epes

* 8:7: Mt 22:22 * 8:10: Jo 5:14 * 8:11: Ais 49:6; Jo 1:4-9, 9:5; Jo 12:46

* 8:13: Jo 5:31-32; Jo 7:28, 9:29 * 8:14: Jo 7:24, 12:47

si'i epes sagape itapi sagawalogas. Apa' ae' owa'. Ae' ina ewaloga anin epen, owa'. * 16 I'i ae' egawaloga anis epes, ae' ewalogas andeande' endilisi. Dei' main? Ina ae' atowe ape, owa'. Ae' ape aloma ahame nasapa'e agafi'ii. Na'amba afa' biafa wawalogas andeande' endilisi. * 17 Anif basef fagail mu'uli ipe'ini fa'i, 'I'i anom amam biam muga'i basef atifif, basef ifimba amamifi endilisifi atif.' * 18 Basef ifimba ma ae' afa' biafa wa'if, ae' aloma Ahame ae'anai nasapa'e agafi'ii.”*

19 Ea' amom mahali'ana ma'i, “Ahamena ine'inai nape ani?”

Jisas nagwamamef na'i, “Ipa' ina pegawa ae', ea' ipa' ina' pegawa ahame ae'anai wapani. I'i ipa' pegawa ae'ai, ipa' pegawa ahame ae'anai wapani. Owa' owa'atin.”*

20 Jisas ata' nawalapa basef ananifi nomon ipat lu'unai Godi ma rum sagambe' otamba moni sanda' ofaeni naga'oma. Apa' ina anona aman nafe' nombalo'ana nofa'ana ma kot, owa'. Dei' main, nogota ananitai ata' owa' totagaia.*

Ipa' ina atiasi la'ifipa ma pegafo'o anamba ae' egafe'ma

21 Jisas na'ipam wapani na'i, “Ae' a' efe'. Apa' ipa' ina atiasi petolowe, owa'. Ipa' atiasi pepe a pega' ma waf awafi ipe'ifi. Dei' main, anamba ae' egafe'ma, ipa' ina atiasi la'ifipa pefe'agono, owa'.”*

22 Ea' amom Juda manda'ipama ma'i, “Anen na'i nefe' ani, ma afa' ina la'ififa ogafe'a? Dei' maina anen naga'i na'amba? Anen na'i nondaha anen atona a'a?”*

23 Ea' Jisas nagwamam na'i, “Ipa' pagape itapi. Apa' ae' agape ilifi. Walemb ipe'ilimbi itap apa'e, apa' ae'

* 8:15: Jo 5:30, 8:29 * 8:16: Diu 17:6, 19:15 * 8:17: 1 Jo 5:9 * 8:18:

Jo 14:7 * 8:19: Jo 7:30 * 8:20: Jo 7:34,36; Jo 13:33 * 8:21: Jo 7:35

* 8:22: Jo 3:31

owa'. ²⁴ Ae' a'lipipa ea'. Atiasi ipa' pega' waf awafi ipe'ifi ata' atapif fipaipa. I'i ipa' owa' pihapifa ae', aman God nasapa'e agafi'iaa, atiasi ipa' pegaga' waf awafi ipe'ifi atapif fepaipa.”*

²⁵⁻²⁶ Amom mahali'ana ma'i, “Ina' aman mamahinama?”

Owa' Jisas nagwamamef na'i, “Si'i fowa' aga'lipipa. Ae' la'ifiwai ma iga'lipipa basef hiafi ipa' ma enda' kotimipa ma basef hiafi ifimba aga'lipipafi. Apa' anen nasapa'e agafi'ii, anen endilisinai. Basef ananifi ae' ame'ef ea' a'lipipaef ipa' pagape itapi.”

²⁷ Amom ina mogawa anen naga'ipama ahamana ananinai, owa'.*

²⁸ Ea' Jisas na'ipam na'i, “Namanani ipa' pesa'ma anen nataga epen nogofa' alop epesi pendelona nil lawag usi'igai ti'waenagai ilif. Nema' afamba a' pegawa basef ifimba fa'i ae' atowe ea' ma'uwi si'i ali' aga'lipipa. Ea' pegawa ae' ina anda' maol ae' atowe aga'iani, owa'. Basef Ahame nagawalipiefi, ifimba atif a'if a'lipipaef. * ²⁹ Anen nasapa'e agafi'ii nape nalome. Anen ina nakwahowe ae' atowe ape, owa'. Dei' main, dondol ae' anda' maol okom ananiami magai'ani.”*

³⁰ Jisas ata' na'ipam atin, owa' hiasi sahapifana.

Basef endilisifi atiasi fenda' ipa' petaga wahifipa

³¹ Ea' Jisas na'ipa esis Juda sagahapifana'i na'i, “I'i ipa' pihapifa basef ae'afi pigi'mif, ipa' alipipai endilisi.

³² Ea' ipa' atiasi pegawa basef endilisifi ea' ifimba atif fetagwahepa pepe wahifipa.”*

³³ Owa' esis sagwamana basef sa'i, “Apa' akupana Abrahami. Apa' ina agof akapa mape lafela anis epes,

* 8:24: Jo 7:28, 12:49 * 8:27: Jo 3:14, 5:19 * 8:28: Jo 8:16, 16:32

* 8:29: Jo 7:31 * 8:32: Mt 3:9

owa'atin. Dei' maina ina' na'ipapa naga'i basef endilisifi fatagwahepa magape wahifipa?”*

³⁴ Jisas nagwamas basef na'i, “Endilisi ae' a'ipipa, epen ami nape nanda' waf awafii, waf afambai fewa'an si'i agol akani nagape lafela anis epesi. ³⁵ Epen inimba agol akani ina nape andeande' ipat nomon dondol, owa'. Apa' Nogamana endilisi dao'. Anen nape ipat atamba nomon dondol. ³⁶ I'i ae' Nogamana ananiwai etagwahipa panda' waf awafi fagawasi'ipa sisihipai, atiasi pepe andeande' wahifipa endilisi. * ³⁷ Ae' egawa ipa' wambota Abrahami. Apa' ipa' pa'i pehe ega'. Dei' main, basef ifimba ae'afi ina fape nomonas ipe'isi, owa'. ³⁸ Ae' awalapa basef ifimba gawaifi ma hiahawes ae' aloma ahame ae'anai wagatilisi, ea' a'ipipa basef ifimba, apa' owa' ipa' panda'am si'i pagame' ahamepa ipe'inai naga'ipipa.”*

Ahamepa ipe'inai anen Satan

³⁹⁻⁴⁰ Esis Juda sagwamana basef sa'i, “Ahamapa ape'inai Abraham.”

Ea' Jisas na'i, “I'i ipa' Abraham bawisanaiai, ipa' a' penda' maol Abrahami. Owa', owa'atin. Ipa' pa'i dindinipa pehe egaga'. Ae' a'ipipa basef endilisifi atifame' God naga'ipiefi. Abraham ina nanda' waf afambai si'i ipa' pa'i pehe egaga', owa'atin. * ⁴¹ Ipa' panda' waf ahamepa ipe'inai nanda'afi.”

Esis sagwamana basef sa'i, “Mamamapa ape'iwai ina wanda' so'a waol olapa, owa'. Ahamapa ape'inai God atotona.”*

⁴² Jisas na'ipas na'i, “I'i God ahamepa ipe'inaiai, ukup ipe'ipi pipila ae'. Ina ae' atowe ela okom afi'i, owa'atin.

* 8:33: Ro 6:16,20; 2 Pi 2:19 * 8:36: Jo 5:18 * 8:38: Mt 3:9 * 8:39-40: Diu 32:6; Ais 63:16, 64:8 * 8:41: 1 Jo 5:1; Jo 16:28

Ahame nasapa'e afi'i ape na'a. * ⁴³ Dei' maina ipa' owa' peme' basef ae'afia? Ipa' ina la'ifipama pegame' basef ae' aga'iefi, owa'.

⁴⁴ “Ipa' si'i ahamepa ipe'inai naga'iani. Fowa' dambadamba nafi'i nafi'i nataga dei', anen naha epes sagaga'i, ea' nowa' alafugama basef endilisifi. Nomonas ananisi ina sapoma basef endilisifi, owa'. Anen nambaso'mas nimaguf hiafi dondol lifilafi. Basef baso'aifi anen naga'iefi, ifimba ananifi atif fagataga okom ananisi atumi. ⁴⁵ Apa' ae' a'ipipa basef endilisifi atif. Isimba atis dei' pandaiwa'ma pigahapifi. * ⁴⁶ Ipa' epen mamahina nagape la'afena ipe'i banagena negawalapa anef waf awafi atetef ae' anda'afi? Owa'atin. Apa' i'i ae' iga'ipipa basef endilisifi, dei' maina ipa' owa' pihapifia? * ⁴⁷ Epes Godi same' basef ananifi. Apa' ipa' ina epes Godi, owa'. Ipa' anipa daipa. Na'amba ipa' owa' peme' basef ananifia.”*

Jisas na'i, “Fowa' Abraham ata' owa' notagaia ae' ali' ape.”

⁴⁸ Esis Juda sagwamana basef sa'i, “Apa' ma'i endilisi ina' Samariainai bounai ape'inai ea' ambal aunai napa'ina.”

⁴⁹ Jisas na'i, “Ae' ambal aunai owa'atin. Apa' ae' asa'ma agol Ahame ae'anai ea' ipa' pataloga agol ae'agili. * ⁵⁰ Ae' ina anda' maola anis sogasa'ma agol ae'igili lu'wagol, owa'. Apa' anona dembinai nanda' maol inimba, ma anis daias sogasa'ma agol ae'agili, dembinai anamba Ahame nape jasa ae'. * ⁵¹ Ae' a'ipipa basef endilisifi atif. Epen ami nihapifa basef ae'afi nilif, anin ina atiasi nega', owa'. A' nepe lifilafi dondol.”

* 8:42: Ro 8:7; 1 Jo 3:8 * 8:45: 2 Ko 5:21; 1 Pi 2:22; 1 Jo 3:5 * 8:46: Jo 18:37; 1 Jo 4:6 * 8:47: Mk 3:21-22; Jo 7:20 * 8:49: Jo 5:41 * 8:50: Jo 5:24; Jo 6:40,47

⁵² Esis Juda same' basef ifimba sa'i, "Dei' apa' magawa ina' ambal aunai nape nomonas ine'isi. Abraham fowa' a' naga' ea' amom profet fowa'imi wapani a' maga'. Owa' ina' na'i, epen ami nihapifa basef ine'ifi anin ina nega', owa'."*

⁵³ Ea' sahali'ana wapani sa'i, "Ina' a' nikila' ahamapa ape'inai Abraham? Anen naga' ea' amom profet wapani a' maga'. Apa' ina' na'i ina' atina aman mamahinama?*

⁵⁴⁻⁵⁵ Jisas nagwa basef na'amba na'i, "I'i ae' esa'ma agol ae'agili lu'wagilai, agol ae'agili wafigil si'i basef wafifi. Apa' Ahame ipa' paga'i God ipe'inai, anen nasa'ma agol ae'igili lu'wagol. Apa' ipa' ina' pegawana, owa'. Ae' atowe egawana. I'i ae' i'i owa' igawanaia, ae' aga'i basef baso'ami si'i ipa' pagambaso'am. Owa' owa'atin. Ae' egawana aila basef ananifi.

⁵⁶ "Abraham akunamepa ipe'inai, anen a' nandagala ma nogati nogota ae'atai owagama totagata, si'i nagati ae' ma sonagahana endilisi."

⁵⁷ Esis Juda sa'ipana sa'i, "Afagof ine'igufi ata' owa' 50-pelaigufa, ina' na'i a' nati Abraham?""*

⁵⁸ Jisas nagwamas na'ipas na'i, "Ae' a'ipipa endilisi, fowa' gani Abraham ma'mana ata' owa' kolanaea, ae' ali' ape."*

⁵⁹ Ea' esis same' basef ananifi, ea' amom Juda mafe' masa'mai otamba ma'i mokwahemba mohana owa', Jisas nandambaho' nawisi nakwaha ipat lu'unai Godi nafe'.

9

Anona aman naep pagaso'anai Jisas nanda'ana bo'ona

¹ Jisas nafe' ufiaw ea' nati anona aman naep pagaso'anai. Fowa' ma'mana kogolana naep paso'ana nape

* 8:52: Jo 4:12 * 8:53: Jo 7:28-29 * 8:57: Jo 1:1; Eks 3:14, 6:3 * 8:58: Jo 10:31

na'amba atin atapina. * ² Alipumi ananiami mahali'ana ma'i, “Dembina tisa, dei' maina aman anamba naep pagaso'ana? Anen nanda' waf awafi a'a esis mamasana sanda' waf awafi solana?”*

³ Jisas na'ipam na'i, “Kofagema ma anen naep pagaso'ana ina mamasana sanda' waf awafi a'a anen nanda' waf awafi, owa'. Anen naep paso'ana ma maol Godi negataga lu'win. Isimba atis dei' naep paso'ana. *

⁴ Dei' ea' alip, nogota apa' monda' maola anen nasapa'e agafi'ii. Owamb bogataga ina atiasi anis epes sonda' maol, owa'atin. * ⁵ Ae' ata' egape itap apa'e ipe'ipi, ae' si'i nagwapin nogogala'i ipe'iwai ipa' hipai pagape itapi.”*

⁶ Jisas na'ipam na'amba, ea' nisi'wafa apah itap nagwindisah haloma itap. Ea' nasomana naep aman anamba. * ⁷ Ea' na'ipana na'i, “Ina' nefe' nesa'opa naep embel dumb amamba Siloam.” Basef kofagefa ma agol agalemba ifimba fa'i, nasapa'ana.

Ea' aman anamba nafe' nasa'opa naep ananipi, ma ata' notanimai atin owa', naep patiana andeande' bo'ona.

⁸ Esis wambel atembel saloma anis fowa' sati anen nagape ufia'w nandailasa otamba gwa'aisi maini sahal-i'as sa'i, “Anen aman anamba ma'una fowa' nape ufia'w nandailasa gwa'aisii?”

⁹ Ea' anis sa'i, “Anen ma'una.”

Apa' anis sa'i, “Owa'. Anona daiana anamba. Apa amaga ananigai si'i anen.”

Apa' aman anamba fowa' naep pagaso'anai na'i, “Ae' ma'uwi.”

¹⁰ Ea' esis sahal-i'ana sa'i, “Ina' nanda' maina dei' nagati andeande'?”

* 9:1: Eks 20:5; Esi 18:20; Lu 13:2,4 * 9:2: Jo 11:4 * 9:3: Jo 5:17,20; Jo 11:9, 12:35 * 9:4: Mt 5:14; Jo 8:12 * 9:5: Mk 8:23 * 9:6: 2 Kin 5:10

¹¹ Anen nagwamas na'i, "Anona aman agol ananigili Jisas nanda' itap paloma apah ananihi nambemam nanda'meam naep ae'api. Ea' na'ipi na'i, 'Ina' nefe' nesa'of dumb Siloam.' Ea' afa' asa'of ea' naep apati."

¹² Ea' sahali'ana sa'i, "Aman anamba nape ani?"
Ea' na'ipas na'i, "Ae' ina egawa nagapoma, owa'."

Amom Farisi mahali'asa aman anamba fowa' naep pagaso'anai

¹³ Esis sao'wa aman anamba fowa' naep pagaso'anai safe'ma amom dembami Farisi. * ¹⁴ Nemaf afamba esis sagapoma noma'wafi sabat, afamba atef Jisas nanda' itap Paloma apah nambemam nanda'manam naep ananipi, ea' naep patiana.

¹⁵ Ea' amom Farisi mahali'ana wapani ma'i, "Anen nanda'mena maina dei' naep pagati?"

Aman anamba nagwamam na'i, "Anen nanda' itap paloma apah ananihi nanda'meam naep ae'api, ea' afa' asa'opa naep ea' dei' apati."*

¹⁶ Ea' anom Farisi ma'i, "Aman anamba ina nagi'ma mu'uli ma nemaf afamba sabat, owa'. Ea' anen ina aman Godi, owa'atin."

Owa' anom Farisi daiam ma'i, "Anona aman nanda' waf awafii ina la'ifina nondan maol banagani si'i God nanda'ani, owa'atin."

Ea' amom Farisi mandawal biafim.*

¹⁷ Ea' mahali' aman anamba fowa' naep pagaso'anai ma'i, "Ina' negawana na'imama? Waf ananifi mamahefa? Aman anamba nanda' naep ine'ipi pagatii."

Aman anamba na'i, "Anen anona profet."

¹⁸ Endilisi aman anamba fowa' naep pagaso'anai dei' patiana. Apa' amom dembami esis Judai ina mahapifana

* 9:13: Lu 13:14 * 9:15: Jo 3:2, 7:43; Jo 9:31-33 * 9:16: Jo 4:19

ma'i endilisi, owa'. Ea' mofalai mamasana ananisi safi'i mahali'as.

¹⁹ Ea' mahali'as ma'i, “Aman anamba nogamepa ipe'i-nai a'a owa'? Aman anamba ipa' pa'i naep ananipi pagaso'anai fowa' ma'mana kogolana? Dei' anen nati andeande' na'imama?”

²⁰ Esis mamasana sagwamam basef sa'i, “Afa' ogawa anen nogamafa afa'inai. Ea' ogawa fowa' ma'mana kogolana naep paso'ana. ²¹ Apa' afa' ina ogawa dei' anen nagati, nati andeande' na'imama. Ami nanda' naep ananipi patiana, afa' ina ogawa. Anen dambena ea', afa' wa'i ipa' pihali'ana nonda'ipipa.”*

²² Esis mamasana ananisi ombal mahasa amom agufumi Judai. Ea' dei' sa'ias na'amba. Dei' main, amom agufumi ma'i basef ea' ma'i, epen ami ni'i basefa Jisas niga'i anen Kraisi, amom a' mili'amonana ipat esis Juda sandakolasatai ma ina nenda' lotu nelomas wapani, owa'.

²³ Amom ma'ias na'amba dei' mamasana ananisi ombal mahas sa'i, “Anen dambena ea'. Pihali'ana nonda'ipipa.”*

²⁴ Amom mofalai aman anamba wapani ma'ipana ma'i, “Ina' ni'i basef endilisifi atif, God natilina. Afa' ogawa aman anamba Jisas, anen aman aunai.”

²⁵ Anen nagwamam na'i, “Ae' ina egawa waf ananifi awafi, a'a owa'. Apa' ae' egawa endilisi atis, fowa' naep ae'api pase'e apa' dei' owa', ati andeande'.”

²⁶ Ea' mahali'ana ma'i, “Anen nanda'mena maina dei' nanda' naep ine'ipi pagati?”

²⁷ Anen nagwamamef na'i, “Doko' ae' a'ipipa ea', apa' ipa' ina pame'e, owa'. Dei' maina pa'i pegame' basef ifimba wapani? Ipa' wapani pa'i petaga alipipai ananipai pilana?”

* 9:21: Jo 7:13 * 9:23: Jos 7:19

²⁸ Owa' amom ma'i basef wandafifi ma anen ma'i, "Ina' aman alipunai ananinai. Apa' afa' alipufai Mosesi.

* ²⁹ Afa' ogawa God fowa' na'ipa Moses ea' apa' aman anamba afa' ina ogawa waf kofagefa ananifi anen nataga ani?"

³⁰ Anen nagwamamef na'i, "Amamba hiahaom maim? Ipa' ina pegawa anen nataga ani, apa' anen nanda' naep ae'api pati. * ³¹ Apa' mogawa God ina name' esis sanda' waf awafii, owa'. Anen name' epen ami nanda' maol ananini nagasa'ma agol ananigili ma negame' basef ananifi. ³² Fowa' gani nafi'li nafi'li nataga dei' ina anif basef fa'i anona aman ma'mana kolana ea' nataga naep paso'ana ma anef nemaf anona aman daiana nonda' naep pigatiana, owa'atin. * ³³ I'i aman anamba ina aman Godiai, anen ina atiasi nonda' anis maefah, owa', owa'atin. Anen aman Godi."*

³⁴ Amom magwamana basef ma'i, "Endilisi, fowa' ma'-mena kogolaena ina' nanda' waf awafi atef. Ea' ina a' niwalipafa, owa'i."

Ea' amom mali'amonana ipat atamba esis Juda sandakolasatai ina ata' nolomas nonda' lotu wapani, a' owa'.

Naep pagape opalef nomoni apaso'

³⁵ Ea' Jisas name' basefa amom mali'amonana nape ando' nowando'mana natolona nahali'ana na'i, "Ina' nahapifa aman anamba nataga epen nogofa' alop epesi, a'a owa'?"

³⁶ Aman anamba nahali'ana na'i, "Dembinai, aman anamba ami? Ni'ipiana ma igahapifana."*

³⁷ Ea' Jisas na'ipana na'i, "Dei' ina' natolona ea'. Anen epen anamba dei' na'i nagalomanai."

* 9:28: Jo 8:14 * 9:30: Sam 34:15; Sam 66:18; Ais 1:15; Pro 15:29 * 9:32: Jo 9:16 * 9:33: Sam 51:5; Jo 9:2 * 9:36: Jo 4:26

³⁸ Ea' na'i, "Dembinai, dei' ahapifina."

Na'ias na'amba ea', nindiwa nembawa notawa itap nanifelona nasa'ma agol ananigili.*

³⁹ Jisas na'i, "Ae' afi'i itap apa'e ma ewaloga epes hiasi hi'igalas. Ama esis naep pagaso'asi atiasi sogati andeande' a isimba naep pagatiasi ea' naep pese'as."*

⁴⁰ Anom Farisi mape malomana mame' basef ifimba mahali'ana ma'i, "Ifimba basef maif? Ina' na'i afa' naep paso'afa wapani a'amon?"*

⁴¹ Jisas na'ipam na'i, "I'i ipa' naep pese'epa ai, ipa' waf awafi akepa. Apa' owa', owa'atin. Ipa' apa'i, 'Afa' wagatii.' Na'amba waf awafi ipe'ifi ata' fapomepa."

10

Basef waminifatina indalelemb sipsipi

¹ Jisas na'i, "Endilisi ae' a'ipipa, epen ami owa' nusi' uta indalelemb sipsipia ma anin nelota niwisi anagon daiagona, epen inimba nanda' wali. ² Apa' epen inimba usi'ini nigawisi utai, anin nigimafi sipsipi. ³ Aman nugumafi utai nawisi'man uta ma nugumafi sipsip. Amom sipsip mame' malogol ananigili. Nofala agofa sipsip ananimi, ea' nao'wam mawisi ando'. * ⁴ Nao'wa sipsip ananimi hiami mawisi ando' hi'alam ea' nali' nafe', amom magi'mana. Dei' main? Amom mogawa malogol ananigili. ⁵ Apa' sipsip ina magi'ma anona daiana, owa'. Na'amba mondafa'mana a' mofa' mefe' atona biana. Dei' main? Amom ina mogawa malogol ananigili, owa'!?"*

⁶ Ea' Jisas na'ipasa basef waminifatin na'amba, apa' esis ina sogawa basef kofagefa, owa'atin.

* 9:38: Jo 3:17; Jo 8:15-16; Mt 13:11-15 * 9:39: Mt 15:14, 23:26 * 9:40: Jo 15:22 * 10:3: Jo 10:27 * 10:5: Jo 16:25

Jisas aman bu'unai nugumafi sipsipi

⁷ Ea' Jisas na'ipas wapani na'i, "Endilisi ae' a'ipipa, ae' si'i uta sipsip mugawisatai. * ⁸ Amom fowa' mugumafi sipsipi, hiami manda' wali apa' sipsip ina mame' malogof amamugufi, owa'. * ⁹ Ae' si'i uta, epen ami niwisi ae' nomon, God nuwambilai anin nokwahoman waf awafi nepe andeande'. Anin nifi'i niwisi niwis nepe netaga nefe' nefa' gwa'aisi bu'wasi. ¹⁰ Amom manda' wali mafi'i ma monda' wal mohas sog'a' mogahambombagas. Apa' ae' a'fi'i ma ipa' pegape andeande' ambal lopaipa endilisi a'owa'. * ¹¹ Ae' aman bu'uwai igimafi sipsipi, a'i aho' ma egaga' ma egatopalopa sipsip igimafiami. * ¹² I'i anona aman nonda' kontrak dowafi ma nugumafi sipsip amambai, anen okom mi'i nogofa' otamba atembai, anen ina atiasi numafi sipsip andeande', owa'. Anen ina aman endilisi nugumafi sipsipi, owa'. Ea' nemaf mamahefa niti nombagw gwagail alupi gugafi'i, a' ombal mohana nokwaha sipsip atom mulutu nofa' nefe'. Ea' nombagw agwamba guwis goha sipsip mofa' mefe' atona biana. ¹³ Aman anamba nanda' maola otamba atembai, anen nandaiwa'ma nugumafi sipsip amamba andeande', owa'. Ea' atiasi niti nombagw agwamba a' ombal mohana nofa' nefe'.*

¹⁴ "Ae' aman bu'uwai igimafi sipsip andeande'i. Ae' egawa sipsip ae'ami a sipsip mogawa ae' wapani. * ¹⁵ Ea' na'amba atin ahame ae'anai nogawa ae', ae' egawa anen. Ae' a'i aho'ma ega' egatopalopa sipsip ae'ami. * ¹⁶ Ae' anom sipsip daiam malutumi. Apa' amom ina malutu

* 10:7: Jer 23:1-2; Esi 34:2-3 * 10:8: Sam 118:20; Jo 14:6 * 10:10: Sam 23:1, Re 7:17 * 10:11: Ap 20:29 * 10:13: Jo 10:27; 2 Ti 2:19 * 10:14: Mt 11:27; Jo 15:13; 1 Jo 3:16 * 10:15: Ais 56:8; Jo 11:52; 1 Pi 2:25; Esi 34:23; Esi 37:24

nomon indalelemb ambalemba, owa'. Amom magalutu indalelemb anagon daiagini. Ae' okom ma'iam a'owa' anef nemaf a' efa'am mifi'i meme' malogol ae'igili ekolasom mulutu indalelemb atelemb ae' atowe imafiam. *

¹⁷ Ae' a'i aho'ma egaga' ma atiasi esafel egape namowe wapani. Isimba atis ahame ae'anai okom maimaili a'owa'.

* ¹⁸ Ina anona aman noha ambal ae'ali ega', owa'atin. Okom ae'ami atom ma'i aho'ma atiasi egaga'. Ae' efa' agol lu'wagili ma ega' egesafel wapani. Agol agalemba ahame atona nase'eagol.”*

¹⁹⁻²⁰ Esis Juda same' basef ifimba ea' esis sandatopa' biafis. Hiasi sa'i, “Ambagof awami mapaona ea' nahaga nagaol a'owa'. Dei' maina ipa' pagame' malogol ananigili?”

²¹ Apa' anis daias sa'i, “Anona aman ambagof awami magapaunai ina na'i anif basef si'i anen naga'iefi, owa'. Anona aman ambagof awami magapaunai ai, ina la'ifinama nonda' aman anamba naep pagaso'anai nogati wapani, owa'atin.”

Esis Juda sanda' naumbih saloma Jisas

²²⁻²³ Nogota atamba asaf atef fagalatama esis Juda sanda' anis gwa'a'isi lu'wasi ma ukup pagapoma fowa' gani sagawisi ipat Godi. Ea' Jisas nafe' nomon ipat lu'unai Godi ilafunama sale'w fowa' Solomon nanda'akwi. *

²⁴ Ea' amom Juda mafi'i malutu malipana ma'i, “Nimaguf mamahifa ina' nenda' opalef afa'ilifi fetaga nomonas bi-afis? I'i ina' Kraisai, ni'ipafa basef alihif.”*

²⁵ Jisas nagwamam na'i, “Ae' a'ipipa ea', apa' ipa' ina ukup pehafel pahapifi, owa'. Ae' anda' hiahaom

* 10:16: Fl 2:8-9 * 10:17: Jo 5:26, 14:31; Jo 19:11 * 10:18: Jo 7:43; Jo 7:20, 8:48 * 10:22-23: Ap 3:11, 5:12; Lu 22:67 * 10:24: Jo 4:26, 5:36; Jo 10:38

banagami ma agol ahamai, amamba mihimba'mepa ae' epen mamahowema. * ²⁶ Apa' ipa' ina sipsip ae'ipai, owa'. Ipa' anipa daipa. Na'amba dei' ipa' ina pahapifa ae', owa'. * ²⁷ Sipsip ae'ami mame' malogol ae'agili ea' egawam mame' basef ae'afi maili. * ²⁸ Ae' egaso'am ambal namili ma mogape andeande' dondol lifilafi. Amom ina moga', owa'atin. Ina anin epen la'ifina netagwahom lagof ae'agufi negefa'am, owa'atin endilisi. Amom mope lagof ae'agufi atapim dondol lifilafi.

²⁹ “Ahame ae'anai nase'e epes isimba ae'asi. Ina anin epen atiasi la'ifina nitagwahis lagol ahamai negefa'as, owa'atin. Dei' main, ahame ae'anai banagonai a'owa' nikila' epes hiasi hi'alas. ³⁰ Ae' aloma ahame, afa' biafa wape atotofa.”*

³¹ Ea' amom Juda mafe' mofa'i otamba wapani ma'i mokwahemba mohana afuna.

³² Apa Jisas na'ipam na'i, “Ae' ihimba'mepa maol bu'wani hiami nagataga Ahamai ea' patilin. Apa' ukup ipe'ipi papoma maol mamahina anda'ani ma dei' pa'i pekwaha otamba pegahe?”*

³³ Amam Juda magwamana ma'i, “Afa' ina wakwaha otamba wa'i ohena ma anin maol bu'wani, owa'. Ina' aman falafunai nanda' findiwa, na'i ina' atina God. Ea' afa' wa'i ohena otamba.”*

³⁴ Jisas nagwamam na'i, “Anif basef fagail mu'uli ipe'ini fa'ias fa'i, ‘Ae' a'ipipa ea' a'i, ipa' si'i anom god daiam.’ * ³⁵⁻³⁶ Fowa' basef Godi fafe'ma epes isimba fa'i, ‘God na'i ipa' si'i anom god daiam.’ Basef ifimba ina fenalo, owa'. Fape atapif fandawalap endilisi. Ahame ae'anai atona

* 10:25: Jo 6:64, 8:45 * 10:26: Jo 8:47, 10:3 * 10:27: Jo 3:16, 6:39; Jo 18:9 * 10:30: Jo 8:59 * 10:32: Lev 24:16; Mt 26:65; Jo 5:18 * 10:33: Sam 82:6 * 10:34: Mt 5:18

nosah'e nanda'e ape hilili' ananiwai atowe nasapa'e afi'i itap apa'e enda' maol ananini. Ea' a'i ae' Nogamana ananiwai. Dei' maina ipa' paga'i, ae' anda' God findi-wana?' ³⁷ I'i ae' ina anda' maol Ahame ae'anaiai, dao' andeande'ma ipa' pindaiwa' ma pigahapifi. * ³⁸ Apa' ae' anda' maol ananini ma i'i ipa' owa' pihapifia, hapaimi. Ipa' piti maol atin ae'ani pegawa Ahame nape nalome, ae' ape alomana.”*

³⁹ Ea' amom ma'i mombalo'ana ma mogowa'ana. Owa', owa'atin. Anen nakwaha amom a' nafe'.*

⁴⁰ Jisas notanima natopa' walemb Jordan nambo fisana nafe' nataga anamba fowa' dambadamba Jon nagapisi'asa nape na'amba. ⁴¹ Ea' amam nematawa hiasi safi'mai anen. Esis sa'i, “Jon owa' nonda' anin maol banagania, apa' basef ananifi hiafi naga'ifa Jisasi, ifimba endilisifi atif.”*

⁴² Ea' amam nematawa hiasi sahapifa Jisas na'amba.

11

Lasarus naga' ea'

¹⁻² Anona aman aowas nanda'anai agol ananigili Lasarus. Anen naloma hanitiamana ananiwai biawa, Maria kwaloma Marta sape wambel ambalemba Betani. Maria akwamba fowa' kwagakolo'wa sanda balaga Dembinaii ma kwanda' auf balaga ako'ugai kwagandisamana bo'wagah ananigahi. * ³ Ea' awo wasapa' basef fafe'ma Jisas wa'i, “Dembinai, aman anamba ina' okom magamagailanai a' awasina na'oh.”*

* 10:37: Jo 14:10-11 * 10:38: Lu 4:30; Jo 8:59 * 10:39: Jo 1:28
 * 10:41: Jo 7:31 * 11:1-2: Jo 11:36; Lu 10:38-39; Jo 12:3 * 11:3: Jo 9:3, 11:40

⁴ Ea' Jisas name' basef ifimba na'i, "Aowas inimba ina natagamana ma nogaga', owa'. Aowas inimba natagamana ma esis sogasa'ma agol ae' Nogamana Godi, a sogasa'ma agol ananigili wapani."

⁵ Ea' Jisas okom maimaila Marta kwaloma owama'w Maria waloma Lasarus. ⁶ Anen name' basefa Lasarus awasina, apa' anen ata' napani nimaguf bif wapani wambel ambalemba nagapanima. ⁷ Nimaguf bif fafe'ma ea', na'ipa alipumi ananiami na'i, "Afa' dei' a' otanima ofe' itap lu'upa Judia."*

⁸ Ea' alipumi ananiami magwamana ma'i, "Dembina tisa, nimbewa' esis Juda sa'i sokwaha otamba sehena afina, apa' dei' ina' na'i netanima nefe' anamba wapani, a'amon?"*

⁹ Ea' Jisas nagwamam na'i, "Nemaf atetef awa 12-pelain nape. Epen ami nagafe' alipi anin ina newa, owa'. Dei' main, anin nati hauguma itap apa'e howalagon nafe' andeande'. * ¹⁰ Apa' i'i anin negafe' owambi, atiasi a' newa. Dei' main? Anin nagwapin nogogala'i akan."*

¹¹ Jisas na'ipam na'amba ma ea', na'ipam wapani na'i, "Alipunai afa'inai Lasarus anen na'oh. Ae' atiasi efe' ganimba itap Judia ma iginimbalona."

¹² Ea' alipumi ananiami magwamana basef ma'i, "Dembina i'i anen no'oh atinai, dao' atiasi ambo'ona."

¹³ Doko' Jisas nali' naga'ipam na'i Lasarus naga'oh, fa'i Lasarus a' naga' endilisi. Apa' alipumi ananiami ukup pa'i anen ata' na'oh dowaf.

¹⁴ Dei' Jisas na'ipam alihif na'i, "Lasarus a' naga' ea' endilisi. ¹⁵ Ae' sonahe ma ae' ina alomana wape atogon nemaf anen nagaga'afi. Ama ipa' atiasi pigahapifa ae'. Dei' afa' ofe'ma anen."*

* 11:7: Jo 8:59 * 11:8: Jo 9:4-5 * 11:9: 1Jo 2:11 * 11:10: Mt 9:24

* 11:15: Mk 14:31

¹⁶ Ea' Tomas agol wa'agol Didimas na'ipa alipumi Jisasi daiam na'i, "Afa' ofe' wapani ma oga' ogaloma anen."

Kofagama epes sagaga' sogosafel wapani ma sogofa' ambal namili ea' Jisasi atona

¹⁷ Lasarus naga' a' sawana. Nimaguf bifibif fafe' ea', Jisas a' nafi'i nataga. Anan nogawa Lasarus sawana nape wandof nimaguf bifibif. * ¹⁸⁻¹⁹ Wambel ambalemba Betani bape felefele'ma Jerusalem, si'i kilomita wanifin. Ea' amom Juda hiami mafi'i ma monda' opalef hanitiamana biawa Martai Maria fegape sa'umbela anen hanitinamawa nagaga'. ²⁰ Marta kwame' basefa Jisas nafi'i atin, kwafe' kowando'mana ufiaw, apa' Maria ata' kwapani ipat.*

²¹ Ea' Marta kwafe'ma Jisasi kwa'ipana kwa'i, "Dembinai, i'i ina' nepe na'a'e ai, hanitiname ae'anai ina noga', owa'atin."

²² Owa' ako'w kwa'ipana wapani kwa'i, "Ae' egawa ina' nigahali' Goda hiahawes mais, anen nogasi'inasi."

²³ Ea' Jisasi na'ipa'w na'i, "Hanitinamena atiasi nogosafel wapanii."*

²⁴ Ea' Marta kwagwamana kwa'i, "Ae' egawa anen anaf a' nosafel wapani nemaf akutaifi afamba epes hiasi sagaga'i sogosafel wapaniefi."

²⁵ Ea' Jisasi na'ipa'w na'i, "Kofagama epes sogosafel wapani ma sogofa' ambal namili, ae' atowe. Epen ami nihapifa ae', atiasi nega' ea' nesafel wapani nefa' ambal namili nepe andeande'. * ²⁶ Epen ami ata' nape namina nigahapifa ae'i, anin nepe andeande'. Ina nega' wapani, owa'atin. Nepe lifilafi dondol. Ina' nahapila basef ifimba, a'a owa'?"*

* 11:17: Mt 21:17 * 11:20: Jo 11:32 * 11:23: Jo 5:29 * 11:25: Jo 8:51 * 11:26: Jo 6:69

²⁷ Ea' kwa'ipana kwa'i, "Aho' dembinai, ae' ahapifa ina' Kraisi, God nandandepena nasapa'ena nagafi'ii. Ina' Nogamana ananinai, fowa' anen na'i nigafi'i itap apa'i."

Jisas nalef

²⁸ Ako'w kwa'ipana na'amba, kotanima kwafe'ma owa-ma'w Maria kwa'ipa'w sa'osa'ombel kwa'i, "Dembina Tisa a' nafi'i nataga nofalena."*

²⁹ Maria kwame' basef ifimba atin, kosafel kwafalis kwafe'mana. ³⁰ Jisas ina dei' nawisi wambel lu'wambela la'afen, owa'. Afa' naili wambel di'imbili doko' Marta kwagatonama. ³¹ Amom Juda mape maloma Maria nomon ipat awoutai ma'i mowa' banaga nomonas ako'usi ma sogape banages. Ea' amom mati Maria kwasafel kwafalis kwafe'. Amom ukup pa'i owa' ako'w kofe' wand- ofa kogalopana. Ea' magima'w mafe'.

³² Ea' Maria kwafe'ma anamba Jisas nagapoma kwatolona kundiwa nembawa felefele'ma bo'wagah ananigahi kwa'ipana kwa'i, "Dembina, i'i ina' nepe nelomapa ai, hanitiname ae'anai ina noga', owa'atin. Apa' owa' napani laogon dei' anen naga'."

³³ Jisas nati ako'w kwape kwalef atin ea' nati amom Juda mafi'i maloma'w malef wapani. Ea' nati esis uwahipis opaf ananifi a' aof a'owa' na'i a' nelef atin. ³⁴ Ea' nahali'as na'i, "Ipa' pawana ani?"

Ea' esis sa'ipana sa'i, "Dembina, fi'i netelogan."*

³⁵ Owa' a' nalef.

³⁶ Amom Juda mati anen nalef na'amba ma'i, "Ipa' petolona! Anen okom maimailana a'owa'."*

* 11:28: Jo 11:20 * 11:31: Jo 11:21 * 11:34: Lu 19:41 * 11:36: Jo 9:6

³⁷ Ape' anom ma'i, "Aman anamba ma'una nanda' aman anamba naep pagaso'anai ma dei' pagatianai. Anen la'ifinai ma fowa' a' nili' nifi'i ma notopalopa aman anamba ai, dei' a' nope a'a noga'?"*

Jisas nasa'ma Lasarus nosafel wapani

³⁸ Ea' Jisas opaf nimanif endilisi nafe' nataga wandof afamba lu'wafi sagwasogon nagawis nomon otam lu'unai. Ea' sanda' anona owap lu'unai sowalo uta.

³⁹ Ea' na'ipas na'i, "Ipa' lefata owap anamba nogowalo utai."

Ea' Marta haniti'ma aman anamba nagaga'i kwa'i, "Dembinai, anen a' nape nimaguf bifibif ea'. Dei' alogw awami a' mana."*

⁴⁰ Owa' Jisas na'ipa'w na'i, "Fowa' ali' a'ipina dei' i'ipina wapani, i'i ina' nihapifa ae', atiasi niti mogogala'i banagami Godi."*

⁴¹⁻⁴² Ea' esis selefata owap anamba ea' Jisas naniga nati ilif na'i, "Ahame, ae' anifelina ma nagame'e. Ae' egawa ina' name'e lifilafi apa' ae' a'ias na'amba ma esis amam nematawa sagalutu na'ai sogahapifa ae', ina' nasapa'e agafi'ii."

⁴³ Jisas nandabeten na'amba ea', nofalana mehip na'i, "Lasarus, safel niwisi ando'."

⁴⁴ Ea' aman anamba nasafel nawisi ando'. Apa' bo'wahagah haloma lagof amaga ananiami sanda' lowaf sombafana.

Ea' Jisas na'ipas na'i, "Ipa' tagwahomana luwaguf amamba ea' pekwahona nefe' wahifina."*

Amom agufumi Judai ma'i basef mandame'maefa moha Jisas nogaga'

(Mt 26:1-5; Mk 14:1-2; Lu 22:1-2)

* 11:37: Mt 27:60 * 11:39: Jo 11:4,23-26 * 11:40: Jo 12:30 * 11:44: Jo 4:48, 7:31

⁴⁵ Amom Juda hiami mafi'i mati Maria maloma'w malef, ea' mati amamba Jisas nanda'ami. Ea' a' mahapifana. *

⁴⁶ Apa' anom mafe'ma amom dembami Farisi ma'ipama amamba Jisas nanda'ami. ⁴⁷ Ea' amom pris dembami maloma amom Farisi hiami mofala anom dembami mafi'i mandakolasa monda' kot. Ea' ma'i,

“Afa' atiasi onda' maina aman anamba nanda' maol banaganii? ⁴⁸ I'i ope ogatotolona ma nonda' maol inimba, atiasi hiasi asohapifana hi'ilas. Ea' amom Rom atiasi mifi'i mohambombaga ipat lu'unai Godi noloma apa' Juda hiapai wapani.”

⁴⁹ Ea' anona aman agilinai Judai agol Kaiafas, anen dembinai pris nape nagali'ma pris hiamii ma afagol agalemba na'ipam na'i, “Ipa' ina pegawa anis hiahawes, owa'atin. *

⁵⁰ Ipa' ina dei' pegawa anif basef, owa'. I'i aman atotona nogaga'ma amam nematawa hiasi, na'ambai a' andeande'ma ipa'. Afa' wandaiwa' ma esis sogahambombaga apa' Juda. Na'amba mini'ap ape'ipi Judai a' lamonap.”*

⁵¹ Anen ina na'i basef ifimba ma okom ananiami atom, owa'atin. Anen nape pris dembinai afagol agalemba. Ea' na'i basef Ambal bu'unai Godi naga'ipanaefi si'i profet na'i Jisas a' nondaga' ma nogatopalopa esis Juda hiasi.

* ⁵² Kaiafas na'i Jisas ina a' noga' notopalopa esis Juda atis, owa'atin. Anen noga' ma nogatopalopa epes Godi hiasi sapesasa sagafe' itap hiagomai hi'ilas nuwambilasi nonda'as sogataga mini'ap atetep.*

⁵³ Nema' afamba atef amom agufumi Judai a' mali' ma'i basef mandame'maefa moha Jisas nogaga'. * ⁵⁴ Ea' Jisas ina ata' nafe' alihina anamba esis Juda sagapoma, a' owa'. Anen nafe' nandambaho' atin felefele'ma anamba

* 11:45: Lu 16:31 * 11:49: Jo 18:14 * 11:50: Jen 50:20 * 11:51: Jo 10:16, 17:21; 1 Jo 2:2 * 11:52: Jo 5:18 * 11:53: Jo 7:1

wafigima fataupigima ma wambel ambalemba Ifraim. Nape na'amba naloma alipumi ananiami.*

⁵⁵ Ina nogota laota ma esis Juda sogal' gwa'aisi lu'wasi saga'i Pasovai, owa'. Ea' esis Juda hiasi sakwaha walemb asasilimbi a' safe' Jerusalem atogon. Safe'ma sigaila basef Godi fowa'ifi sosa'of sotofa alogwa sogandondomba alop asasipi ma God negati esis bo'wes hilili' ma sogal' gwa'aisi isimba. * ⁵⁶ Esis sape ipat lu'unai Godi nomon sowando'ma Jisas ea' sahali'as sa'i, "Ipa' ukup pape pa'imama? Anen atiasi nifi'mai gwa'aisi isimba a'a owa'?"

⁵⁷ Ea' amom pris dembami maloma amom Farisi hiami ma'ias dindinip ma'i, "Epen ami negawa Jisas nagapoma ni'ipafa ofe' ombalo'ana ma onda'mana basef."

12

*Maria kwakolo'wa sanda kwasa'opa bo'wagah Jisasi
(Mt 26:6-13; Mk 14:3-9)*

¹ Nimaguf wanif wanif ata' fapoma esis Juda sonda' gwa'aisi isimba lu'wasi Pasova. Nema' afamba Jisas a' nataga wambel Betani, alipunai Lasarus nagapoma. Fowa' naga'ma Jisas nasa'mana nogosafel wapanii. * ² Ea' sanda'mana gwa'aisi Jisas. Marta kwanda' gwa'aisi, apa' Lasarus nape nalomas sape sa' gwa'aisi saloma Jisas. * ³ Ea' Maria kwahapila anop kap si'ipa sanda bu'wani agilina nad sagatalin otamba hiambaii. Ea' kwahapilan kwakolo'wan kwandisamana bo'wagah Jisasi kwanda' auf balaga ako'ugai kopati'manan. Ea' ipat atamba asi'itama alogw bu'wagwi ma sanda inimbai. * ⁴ Apa' anona alipunai Jisasi Judas Keriotinai kowalana ma sanda inimba

* 11:54: 2 Kro 30:17; Ap 21:26 * 11:55: Jo 7:11 * 12:1: Lu 10:40; Jo 11:1,43 * 12:2: Lu 7:37-38 * 12:3: Jo 18:3

nandaiwa'ma kwakolo'wan kwagasapelin. Aman anamba atiasi a' nogowalapa Jisas niga'ipa amom boumianai.*

⁵ Ea' Judas na'ipas na'i, "I'i afa' ofa' sanda inimba anis epes soso'afa moni 300 kina sotalina ofa'an ogaso' epes isimba kwahusa gwa'aisi mainai, dao' andeande'. Apa' owa', owa'atin."

⁶ Apa' Judas okom ananiami ina ma'i notopalopa isimba kwahusa hiahawesi, owa'atin. Anen na'ias na'amba ma nonda' wal nogofa'amba. Dei' main, anen nugumafi bokis isimba Jisas naloma alipumi ananiami mala otamba amamimbai bagalasi ma dondol nanda' wala anemba.

Ea' Jisas nagwamana basef na'i, *⁷⁻⁸ "Ipa' owa'i pi'ipa'w basef ifimbaia, owa'i. Andeande'ma ako'w kwagakolo'wa sanda inimba ma atiasi nemaf afamba sehe igaga'afi ma sogawe. Isimba kwahusa gwa'aisi maini sape salomepa nimaguf hiafi. Apa' ae' ina epe egalomepa nogota lautai, owa'."*

Amom pris dembami ma'i basef mandame'maefa moha Jisas nogaga'

⁹ Esis Juda hiasi same' basefa Jisas nape Betani. Ea' safi'i sa'i sotolona ea' sa'i siti Lasarus wapani, nimbewa' naga'ma Jisas nasa'mana nogosafel wapanii. ¹⁰ Ea' amom pris dembami ma'i basef mandame'maefa moha Lasarus nogaga' wapani. *¹¹ Dei' main, anis Juda hiasi sati Lasarus notanima nosafel ambal lapaona. Isimba atis dei' sakwaha amom dembami Juda asafe' saila Jisas sahapifana.

*Jisas nawis Jerusalem si'i dembinai king
(Mt 21:1-11; Mk 11:1-11; Lu 19:28-40)*

* 12:4: Mt 19:21 * 12:6: Jo 19:40; Diu 15:11 * 12:7-8: Jo 11:43-44
* 12:10: Jo 11:45

¹² Wafilu epes hiasi safi'mai gwa'aisi isimba Pasova, same' basefa Jisas ata' nafi'i atin Jerusalem. * ¹³ Ea' satopa' agof lawahiguf apilugufa sahapilagof safi'i satagamana ufa'w. Ea' sogas sa'i mehip sa'i, "Hosana. Apa' mandanifal endilisi ma ina'. Apa' ma'i God nofalo'ma ina' nagafi'i agol ananigilii nese'ena banagami ma nenda' maol ananini. Ina' king dembinai apa' Israeli."*

¹⁴⁻¹⁵ Ea' Jisas nowando'ma donki atitin sa'uni natilin nandagala natoman nafe' si'i fowa' anif basef Godi fagail Buk Baibeli faga'i,

"Ipa' wambel Saion, ipa' ina ombal mehepa, owa'i. Dembinai king ipe'inai anaf notoma donki noganai nofa'ana nifi'i."*

¹⁶ Nema' afamba alipumi Jisasi ina mogawa basef ifimba kofagefa faga'i Jisasi, owa'atin. Ama nogota atamba Jisas noga' ma nosafel wapani notanima nogalota ilif, dao' amom a' mogawa basef ifimba faga'i anini. Ea' ukup pepoma amamba epes isimba sanda'manam anini wapani.*

¹⁷ Anis epes sali' sati Jisas nogofala aman anamba naga'ga'i Lasarus napani matmat nogosafel wapani. Ea' sa'ipa hiasi ma basef ifimba Lasarasi. ¹⁸ Ea' epes hiasi same' basefa Jisas nanda' hiahaom banagami si'i God nanda'ami. Ea' dei' safe' satolona. * ¹⁹ Ea' amom Farisi manda'ipama ma'i, "Maol afa'ini ina la'ifin, owa'. Afa' agof akafa. Piti amam nematawa hiasi safi'mai anen atona hi'alas."

Anis Grik sa'i siti Jisas

²⁰ Epes hiasi safe' Jerusalem ama gwa'aisi isimba lu'wasi sonda' lotuma God. Ea' anom Grik wapani mafe' malomas.

* ²¹ Anona aman alipunai Jisasi Filip anen Betsaidainai

* 12:12: Sam 118:25-26; Mt 27:42; Jo 1:49 * 12:13: Sek 9:9 * 12:14-15: Jo 2:22 * 12:16: Jo 11:43-44 * 12:18: Jo 11:48 * 12:20: Jo 1:44; Lu 19:3, 23:8

itap lu'upa Galili. Amom Grik mafi'mai gwa'aisi isimba ea' mafi'mai Filip ma'ipana ma'i, “Dembina, afa' wa'i uti Jisas.”

²² Filip nafe' na'ipa Andru, amom biam mafe' ma'ipa Jisas. * ²³ Ea' Jisas nagwamam na'ipam na'i, “Ae' ataga epen egefa' alop epesi a' afi'i. Nogota atamba anis asasa'ma agol ae'agili lu'wagol. * ²⁴ Ae' a'ipipa basef endilisifi, i'i olemb witimb owa' bewa itap nomona, olemb ambamba bepe atifimb. Apa' i'i bewa begewala itap nomon, dao' ambamba ambetaga belo bil hiambi. * ²⁵ Epen ami okom mopoma ambal ananili atol ni'i nihapilal tatala'il, anaf ambal ananili higililal. Apa' epen ami okom mopoma ae' ma nesambala ambal ananili itap apa'e, anaf God a' nofa'al lotanimai nepe andeande' lifilafi. * ²⁶ Epen ami ni'i nenda' maol ae'anii, anin a' nindaila ae'. Mamahagoma ae' egapoma, inimba nanda' maola ae'i anin negapoma anamba. Ea' epen ami nenda' maol ae'anii, Ahame ae'anai atiasi nosa'ma agol ananigili.*

Anen nataga epen nogofa' alop epesi atiasi sondolana lawag usi'igai ti'wanaegai

²⁷ Ea' Jisas na'ipas wapani na'i, “Dei' opaf ae'afi bolalaf afataga aof. Ae' basef owa'atina iga'if. Atiasi ae' a' i'i, ‘Ahame, ina' li'amona akafimi amamba ma'i mogatagama ae' dei'i a'a?” Owa'atin. Ae' afi'i nogota ata'e ape itap apa'e ma maol inimba atin ae' enda'ana sehe egaga'. * ²⁸ Ahame, ina' nenda'ama epes hiasi sogasa'ma agol ine'igili lu'wagol.”

* 12:22: Jo 13:31-32; Jo 17:1 * 12:23: 1 Ko 15:36 * 12:24: Mt 16:25
 * 12:25: Jo 14:3, 17:24 * 12:26: Sam 6:3, 42:5; Mt 26:38 * 12:27: Mt 3:17

Ea' anogol malogol ga'i gatagai heven ga'i, "Ae' anda'ama sogasa'ma agol ae'agili gogataga lu'wagol, owa' atiasi enda'agol gotaga lu'wagol wapani."*

²⁹ Ea' anis amam nematawa hiasi salutu sagame' malogol agalembai sa'i, "Owa', otaga diwala."

Apa' anis sa'i, "Anona ensel na'ipana anif basef."*

³⁰ Ea' Jisas na'i, "Malogol agalemba ina ga'i ma gogatopalopa ae', owa'. Agalemba ga'i ma gogatopalopa ipa'. * ³¹ Dei' Ahame God a' nawaloga wafa amam nematawa hiasi sagape itap apai ea' natofa dembinai nugumafi itap apai. * ³² Atiasi esis sendele il atin lawag usi'igai ti'wanaegai ilifa atiasi ihindi'ai esis amam nematawa hiasi sifi'mai ae' hi'igalas."*

³³ Jisas na'ipas na'amba ma nigihimba'mas sogogawa ufia'w anen atiasi nogaga'akwi.*

³⁴ Ea' esis sagwamana sa'i, "Mu'uli ape'ini naga'i na'amba na'i, Kraisi anen nogape lifilafi dondoli. Dei' maina ina' naga'i, 'Anen nataga epen nogofa' alop epesi atiasi sogandolona lawag usi'igai ti'wanaegai ilif?' Dembinai nataga epen nogofa' alop epesi, anen epen mama-honama?"*

³⁵ Ea' Jisas nagwamasa basef na'i, "Nogota ata' bandata ma nagwapin nogala' nogalomepa. Dei' ipa' a' pendafe' hauguma. Na'amba owamb botagamepa. Epen ami negafe' owambi, anin ina negawa anamba negafe'ma, owa'. *

³⁶ Ae' ape si'i nagwapin ipe'ini. Ipa' pindahapifa nagwapin inimba ma pegataga awasi nagwapin nogogala'i."

* 12:28: Ap 23:9 * 12:29: Jo 11:42 * 12:30: Jo 9:39, 14:30 * 12:31: Jo 3:14
 * 12:32: Jo 18:32 * 12:33: Sam 89:4,36; Sam 110:4; Ais 9:7; Dan 7:14
 * 12:34: Jo 7:33, 8:12; 1 Jo 2:10-11 * 12:35: Ef 5:8

Jisas na'ipas ea', nakwaha esis a' nafe' nandambaho'-mas.

Esis Juda hiasi owa' sohapifa Jisasa

³⁷ Jisas a' nanda' maol banagani hiani, si'i God nanda'ani esis satilin. Apa' esis ina sahapifana, owa'. * ³⁸ Si'i basef ifimba fowa' profet Aisaia nanda'afi faga'ias dei' fataga fandawalap fa'i,

“Anafepes ami sohapila basef afa'ifi? Esis sogati banagami Godi esis mamahisa? Owa'atin.”*

³⁹⁻⁴⁰ Esis ina la'ifisa sogahapifa Jisas. Dei' main, profet anamba Aisaia nanda' anif basef Godi wapani faga'ias na'amba fa'i,

“Anen nanda' naep asasipi apaso'as nanda' ukup asasipi paso' ma ina atiasi sotologon ea' ukup asasipi wapani ina atiasi sogawa ma sogambema nelelemba ae' enda'as bo'wes, owa'atin.”*

⁴¹ Fowa' Aisaia nati banagami mogogala'i Jisasi ea' na'ias na'amba ma anen atona.*

⁴² Amom agufumi hiami a' mahapifa Jisas. Apa' owa', amom ombal bahama amom Farisi dembami. Ea' amom ina mawalapa basef ma'ipasef alihif, owa'. Ombal bahama amom Farisi mogali'amonama ina ata' moloma esis Juda monda' lotu wapani, owa'. * ⁴³ Amom agufumi amamba ukup pa'i esis a'owa' ma sogasa'ma agof amamugufi atogof lu'wagof. Apa' amom ina ukup pa'i God nosa'ma agof amamugufi, owa'atin.*

Basef Jisasi anaf fewaloga epes hiasi

⁴⁴ Ea' Jisas na'ipas dindinip na'i, “Epen nigahapifa ae'i, anin ina nahapifa ae' atowe, owa'. Anin nahapifa anen

* 12:37: Ais 53:1; Ro 10:16 * 12:38: Ais 6:10; Mt 13:15 * 12:39-40: Ais 6:1 * 12:41: Jo 7:48, 9:22 * 12:42: Jo 5:44 * 12:43: Mt 10:40

nasapa'e agafi'ii wapani. * ⁴⁵ Epen ami niti ae' anin nati anen nasapa'e agafi'ii wapani. * ⁴⁶ Ae' afi'i itap apa'e si'i anin nagwapin ama epen ami nigahapifai, anin ina a' nepe owamb, owa'atin. * ⁴⁷ Epen ami neme' basef ae'afi ma owa' nihapifif nilifa, ae' ina anaf ewaloga anin, owa'. Dei' main? Ae' ina afi'i itap apa'e ma egawaloga epes sagape itapi, owa'atin. Ae' afi'i ma iwambilas sogotanimai. * ⁴⁸ Epen ami negase'e alafuga ae'i ma anin owa' nihapifa ae'a, anaf anona dembinai jas a' nowaloga anin. Nemaf afamba akutaifi basef ifimba atif ae' aga'iefi ifimba fenda' anin a' fewawalogon. ⁴⁹ Dei' main? Ae' ina a'i anif basefa okom ae'ami atom maga'iefi, owa'. Ahame ae'anai atona na'ipi basef ifimba dindinipa iga'ipasef. Ea' anen nasapa'e afi'i a'if si'i okom ananiami maga'iefi. * ⁵⁰ Ae' egawa basef ananifi fawalapa ambal namili ma ipa' pegape andeande' lifilafi. Na'amba basef ae' aga'ipasafi ea' ifimba atif si'i Ahame naga'ipiefi.”

13

Jisas nasa'opamam bo'wagah alipumi ananiami si'i anona aman falafunai agol akanai nanda'am

¹ Nemaf afamba lu'wafi esis Juda soga' gwa'aisi isimba Pasova owa' ata' fetagaea. Jisas nogawa nogota ananitai a' tataga ma nogakwaha itap apa'e nogafe'ma Ahamana. Ea' okom ananiami maimaila epes ananisi sagape itapi a'owa'. Na'amba dei' nihimba'masa okom ananiami lu'wami mag-amagaila esisi. * ² Ea' wambomota anen naloma alipumi mape ma' gwa'aisi isimba. Ea' Saimon nogamana Judas Keriotinai nalomam mape. Owa' aman aunai Satan a' nali'

* 12:44: Jo 14:9 * 12:45: Jo 8:12, 12:35 * 12:46: Jo 3:17, 8:15 * 12:47: Hi 4:12 * 12:49: Jo 8:26,28 * 13:1: Lu 22:3; Jo 7:30, 12:23, 13:27, Jo 15:13; 1 Jo 3:16; Fl 2:8

naso'ma nomonas Judasi ma nefe' nigihimba'ma boumi ma Jisas nogapoma. * ³ Ea' Jisas nogawa Ahamana nanda' anen banagona ma hiahaom hiami. Ea' nogawa anen nape naloma God nafi'i ea' atiasi a' notanima nefe'mana wapani. ⁴ Ea' nosafel natagwaha siot lautai ananitai nowaha' anin taul. ⁵ Ea' nakolo' embel anis dis nafe' notawa nasa'opamam bo'wagah amom alipumi ananimi ea' nanda' taul alamba nogowaha'ali nopati'mamagah. ⁶ Nasa'opamagah nafe', natagama Saimon Pita. Owa' Pita na'ipana na'i, "Dembina, negesa'opame bo'wagah ae'agahi, owa'."

⁷ Ea' Jisas nagwamana na'i, "Ina' owa' negawa maol inimba ae' dei' enda'ania. Apa' anaf dao', ina' negawan."

⁸ Ea' Pita na'ipa Jisas na'i, "Owa'. Ina' owa'i nesa'opa bo'wagah ae'agahia, owa'."

Owa' Jisas nagwamana na'i, "I'i ae' owa' esa'opamena bo'wagah ine'igahia, ina atiasi nepe alipunai ae'inai, owa'atin."

⁹ Ea' Saimon Pita nagwamana na'i, "Dembina, ina negesa'opame bo'wagah atagah, owa'. Nesa'ope hi'ili lagof balaga wapani sotaga be'es."*

¹⁰ Ea' Jisas nagwamana na'i, "Epen ami nagasa'of ea'i, anin ina atiasi nesa'of wapani, owa'. Anin bo'wen ea'. Ipa' hipai ipa' be'epa hilili', apa' anona ipe'inai atotona ata' owa' bo'ona hilili'a."

¹¹ Dei' main? Anen a' nogawa ami atiasi nefe' niga'ipa boumi ananimi ma nigihimba'mama nogapomai.

Ea' na'ipam na'i, "Ipa' hipai ambe'epa hilili', apa' anona ipe'inai atotona ata' owa' bu'unaia."

¹² Anen nasa'opamam bo'wagah amamugahi ea', nala siot ananitai nafe' natoma felefele'ma tebol. Ea' nahal-i'am na'i, "Ipa' pegawa maol inimba ae' anda'mepani

* 13:2: Jo 3:35, 16:28 * 13:9: Jo 15:3; Jo 6:64,70-71

a'a owa'? * 13 Ipa' pefale tisa a'a Dembiwai, na'amba andeande'. Ae' ea' ma'uwi, basef ifimba endilisifi atif. * 14 Ae' Dembiwai ipe'iwai a tisa ipe'iwai. Ae' doko' asa'opa bo'wagah ipe'igahi. Ea' ipa' wapani a' pendasa'opa bo'wagah ipe'igahi atona atin. * 15 Ae' ea' ihimba'mepa waf afamba ae'afi. Ipa' penda'am na'amba atin si'i ae' anda'am. * 16 Dei' ae' a'lipipa basef endilisifi atif. Epen inimba agol akani nanda' maol dowadowafi, anin ina nape ilifa dembinai ananinai, owa'. Ea' anona dembinai nasapa' anin nagafi'i, inimba ina nikila' dembinai anamba ananinai, owa'.*

17 "Dei' ipa' pegawa waf afamba ea'. I'i pigi'maf andeande', dao' a pendagala. * 18 Ae' basef ake ma ipa' hipai pefe' pewalapa basef piga'ipa boumi ma ae', owa'. Ae' egawepa andandepepa ea'. Apa' basef Godi fagail buk Baibeli atiasi fetaga endilisi ma anen nogawalapa ae' ma boumii. Basef ifimba faga'i na'amba fa'i, 'Aman anamba noga' gwa'aisi nugalumai atiasi nigi bo'waga egimugama nofa'asa ae'.'*

19 "Ae' dei' ape a'lipipa basef ifimba ma waf afamba ina dei' fataga, ata' owa'atin. Ama atiasi fetaga fendawalap, dao' ipa' pihapifa ae' ea' ma'uwi. * 20 Ae' a'lipipa basef endilisi, epen ami negaso'an nembel anin epen ae' agasapa'ani, anin nase'e nembel ae'. Ea' epen ami negase'e nembel ae'i, anin naso'ana nembel Ahame ae'anai wapani nasapa'e agafi'ii."*

Atiasi Judas ni'ipa amom boumi ma Jisas nogapoma (Mt 26:20-25; Mk 14:17-21; Lu 22:21-23)

* 13:12: Mt 23:8,10 * 13:13: Mt 20:28; Lu 22:27 * 13:14: Fl 2:5; Kl 3:13; 1 Pi 2:21 * 13:15: Mt 10:24 * 13:16: Mt 7:24, Je 1:25 * 13:17: Sam 41:9 * 13:18: Jo 14:29, 16:4 * 13:19: Mt 10:40 * 13:20: Jo 12:27

²¹ Jisas na'ipam basef ifimba ea', okom ananiami ni-manim a'owa'. Ea' na'ipam na'i, "Ae' a'lipipa endilisi, anona afa'inai atiasi nefe' nihimba'ma boumi ma ae' egapoma."

²² Ea' alipumi ananiami manda' tima atin tol mape. Amom ina mogawa Jisas na'i ami.*

²³ Ae' alipuwai Jisasi, anen okom magamagailai ape felefele' ma anen. ²⁴ Ea' Saimon Pita nanda' balaga na'ipi na'i, "Ina' hali'ago anen na'i ami."

²⁵ Ea' ae' indiki'ah afe' felefele'ma Jisas ahali'ana a'i, "Dembina'i, ina' na'i ami?"

²⁶ Jisas nagwame na'i, "Ae' atiasi ila bret nempa'w egaso'anotai, aman anamba ea' ma'una anen."

Ea' nala bret nempa'w naso' Judas Keriotinai Saimon nogamana. * ²⁷ Ea' ata' nahapila bret atin, owa' aman aunai Satan a' nawisana nembel ananimbili nomon.

Ea' Jisas na'ipana na'i, "Maol ina' na'i nenda'ani da'an kwafalis."

²⁸ Apa' afa' alipufai Jisasi wape waga' gwa'aisii, afa' ina ogawa basef Jisasi kofagefa, owa'. * ²⁹ Judas nugu-mafi otamba afa'imbai. Na'amba anom alipumi Jisasi ukup pandanda' pa'i Jisas na'ipana ma nefe' nogotala anis gwa'aisi ma nonda' gwa'aisi isimba a'a na'ipana na'i noso'asa anemba otamba isimba kwahusi. ³⁰ Ea' Judas ata' nahapila bret atin, nafe' nawis ando' kwafalis. Ea' owamb akot atowafai.*

Mu'uli dembinai Jisasi

³¹ Ea' Judas ata' nafe' atin nagawis ando'i, Jisas na'ipam na'i, "Dei' esis asosa'ma agol ae'agili ataga epen egefa' alop epesi lu'wagol. Ea' sosa'ma agol Ahame Godi ma

* 13:22: Jo 19:26, 20:2; Jo 21:7,20 * 13:26: Jo 13:2 * 13:28: Jo 12:6

* 13:30: Jo 12:23

maol ae' anda'ani wapani. * ³² Isimba atis Ahame God wapani nosa'ma agol ae'agili lu'wagol dei' atefa maol anen nanda'ani. * ³³ Ipa' sa'upai, ae' elomepa ope nogota bandata a' efe'. Ipa' atiasi pewando'me apa' ina atiasi petolowe, owa'. Anamba ae' egafe'ma, ipa' ina la'ifipama atiasi pegafe'agono, owa. Basef ifimba atif fowa' aga'ipa amom Judafi, dei' a'lipipaef wapani. * ³⁴ Dei' ase'epa mu'uli ae'ani dambaini ma ipa' ukup pindaima atin si'i okom ae'ami magamagaila ipa'. Ea' na'amba atin, ukup ipe'ipi pindaima atin. ³⁵ I'i ukup ipe'ipi pindaima atin, atiasi epes hiasi sogawa ipa' alipipai ae'ipai.”*

Jisas na'ipama Pita atiasi nowa' alafugama anen

(Mt 26:31-35; Mk 14:27-31; Lu 22:31-34)

³⁶ Ea' Saimon Pita nahali'ana na'i, “Dembina, ina' a' nefe' ani?”

Jisas nagwamana na'i, “Anamba dei' ae' egafe'ma, ina atiasi nigimi nefe'agono, owa'. Apa' anaf owagama dao', ina' a' nigimi nefe'o.”

³⁷ Ea' Pita nahali'ana na'i, “Dembina, dei' maina ae' ina la'ifiwi ma dei' igagi'mina? Ae' a'i aho'ma ega' egalomena.”

³⁸ Ea' Jisas nagwamana basef na'i, “Ina' na'i aho' endilisi ma nega' negaloma ae' a'amon? Ae' a'lipina endilisi, atiasi owamb amba'e awata owa' ata' totaea, ina' a' nendahal-i'mi ni'ias wanif ni'i, ‘Ae' owa' egawa Jisasa.’”

14

Jisas anen si'i ufiaw ma epes sogafe'ma Ahamapa

¹ Jisas na'lipafa na'i, “Nelelemb ipe'ilimbi ina besafel nimanilimb a'owa', owa'i. Ipa' pindahapifa God, pihapifa

* 13:31: Jo 17:5 * 13:32: Jo 7:33-34 * 13:33: Jo 15:12,17; 1 Jo 3:23; 2 Jo 5
* 13:35: Jo 7:34; Jo 21:18-19

ae' wapani.* ² Ipat Ahame ae'anai alihinai satopa' ilalef hielifi fape fandandapa. I'i owa'ai, fowa' ae' i'ipipa. Apa' owa', endilisi atis ae' a' efe' endondomba wambel ipe'im-bili.* ³ Ae' i'i efe'ma egandomba wambel ipe'imbilima owagama itanimai efa'epa pefe' pepe pelome. Ea' anamba ae' egapoma, ipa' wapani pepe anamba atogon pelome. ⁴ Ea' ipa' a' pegawa ufa'w ae' igafe'akwi ma wambel ambalemba.”

⁵ Tomas nahali'ana na'i, “Dembina, afa' owa' ogawaia ina' nefe' ani? Afa' ina ogawa ufa'w akwamba ina' na'i negafe'akwi.”*

⁶ Ea' Jisas na'ipana na'i, “Ae' atowe ufa'w kofagewe ma basef endilisifi feloma ambal namili. Owa' anin epen la'ifina nefe' negatagama Ahame ano'w ufa'wa, owa'atin. Ea' ae' atowe.* ⁷ I'i ipa' pegawa ae', Pegawa Ahame ae'anai wapani. Ea' dei' apatolona. Dei' atef ipa' patolona pegawana.”

⁸ Filip na'ipana nahali'ana na'i, “Dembina, ina' himba'mafa Ahamena ine'inai afa' ma isimba ea' sondahama afa'.”*

⁹ Ea' Jisas na'ipana na'i, “Filip, nogota ea' lautai ape agalomewa, ina' owa' ata' negawa ea'? Epen ami nagati ae' ea'i, anin a' nati Ahame ae'anai wapani. Dei' maina ina' ata' naga'i, ae' igihimba'mepa Ahame ipa'?”* ¹⁰ Ina' nahapifa ae' ma negawa ae' aloma Ahame afa' atotofa, ae' ape anen, anen nape ae', a'a owa'? Basef ae' agasi'ipafi, ifimba ae' ina anda'ef okom ae'ami atom, owa'. Ahame nape ae' ea' anen atona nanda' maol ananini hiani.*

¹¹ Ipa' pindahapifa basef ifimba. Ae' ape Ahame, Ahame

* 14:1: Jo 14:27 * 14:2: Jo 12:26, 17:4 * 14:5: Jo 11:25; Ro 5:1-2; Hi 10:20 * 14:6: Jo 8:19 * 14:8: Jo 12:45; Kl 1:15; Hi 1:3 * 14:9: Jo 12:49, 14:24 * 14:10: Jo 10:38, 14:20

nape ae'. I'i owa'ma, ipa' ukup pendapoma maol banagani hiani anda'ani. Ipa' piti maol inimba, pindahapifi.*

¹² “Basef endilisifi atif dei' a'ipipa. Epen ami nigahapifa ae'i, maol hiani dei' anda'ani, anin wapani atiasi nenda'an. Ama anaf nenda' maol lu'wani a'owa' nikila' maol ae'ani. Dei' main? Ae' efe'ma Ahame. * ¹³ Hiahawes hiasi ipa' pendabeten pigahali'anasa agol ae'agilii, atiasi ae' inda'asi. Ama Ahame a nogofa' agol lu'wagilima maol ae' Nogamana ananiwai atiasi inda'ani. ¹⁴ Hiahawes ipa' pigahali' ae'masi ma agol ae'agili, pihapifi endilisi, dao' atiasi inda'asi.*

Jisas na'i atiasi nosapa' Ambal bu'unai Godi nifi'i

¹⁵ “I'i ipa' ukup pi'i ae' endilisi, dao' ipa' pindagi'ma mu'uli ae'ani andeande'. * ¹⁶ Ama atiasi ihali' Ahame, ma nogasi'ipai anona notopalopepa nogowa' banagaipai. Anen nope nogaloma ipa' lifilafi dondoli. * ¹⁷ Anamba Ambal bu'unai Godi naga'i basef endilisifii. Esis amam nematawa sagaila waf itapafi ina atiasi sotolona sogawana sofa'ana, owa'. Apa' ipa' pegawana ea' nape nalomepa, ea' atiasi a' nuwis nope nomon opalef ipe'ilimbi. * ¹⁸ Ae' ina a' ikwahipa tol pepe dowaf, si'i awasi isimba alifisi ahasas mamasas akasi, owa'atin. Atiasi ae' igafi'mipai. * ¹⁹ Nogota kwaia'uta esis amam nematawa sagaila waf itapafii ina atiasi sotolowe wapani, owa'. Apa' ipa' pigatolowai. Ae' ape namowe ambal namili, ea' na'amba atin ipa' pepe namipa ambal namili wapani. * ²⁰ Ama nemaf afamba ipa' apegawa ae' ape Ahame, ape nomona ipa', ipa' pape ae'. * ²¹ Epen ami negefa' mu'uli ae'ani

* 14:11: Mk 16:19-20 * 14:12: Mt 7:7; Jo 15:16 * 14:14: Jo 15:10, 1 Jo 5:3 * 14:15: Jo 14:26, 15:26; Jo 16:7 * 14:16: Mt 10:20; Jo 16:13; Ro 8:26 * 14:17: Jo 14:3 * 14:18: Jo 16:16 * 14:19: Jo 17:21-23 * 14:20: Jo 15:10, 16:27

nigi'mana nigailan andeande'i, anin a' okom maimaila ae' endilisi. Atiasi Ahame ae'anai okom mila anin. Ea' ae' wapani okom mimilan anin ea' etaga endawalapa anin alihiwi.”*

²² Jisas na'ias na'amba, ea' anona Judas ina anamba Keriotinai, owa', anona daiana, na'ipa Jisas na'i, “Dembinai, dei' maina ina' na'i nigihimba'mafa ina' netaga nendawalap alihinama afa', ina' owa' nihimba'masa ina' alihinama esis sagaila waf itapafia?”*

²³ Jisas nagwamana basef na'i, “I'i epen okom muga'i ae' endilisii, anin atiasi nila basef ae'afi andeande'. Ea' Ahame ae'anai atiasi okom mimila anin. Ea' afa' biafa ufi'mai anin ope oloman lifilafi. * ²⁴ Epen nandaiwa'ma ae' endilisii, anin ina atiasi nila basef ae'afi andeande', owa'. Ea' basef ifimba ipa' pagame'afi, ifimba ina ae'afi, owa'. Ifimba basef Ahame Godi nasapa'e agafi'ii. ²⁵ Ae' ata' ape atapiwi alomepa a'ipipa basef ifimba. * ²⁶ Apa' anen notopalopepa ma nogowa' banagaipai, anen Ambal bu'unai Godi. Anamba Ahame atiasi nosapa'ana nugafi'i agol ae'agili. Ea' nowalipipa ma hiahawes hiasi, nosa'ma nomonas ipe'isi ma ukup pegapoma basef hiafi wapani agasi'ipafi. * ²⁷ Ae' a'i ikwahipa. Apa' ae' ina enda'epa ombal behepa ukup iwaiwanip pepe si'i amam nematawa sagaila waf itapafi sanda'as, owa'. Ae' a' enda'epa pepe ukup awanep endilisi ma ukup ipel'ipi ina atiasi pesafel awep, owa'. Ea' ina ombal mehepa, owa'. * ²⁸ Ipa' pame'ef ea' basef ifimba agasi'ipafi. Ae' ikwahipa efe'. Bola itanimaimipai. I'i ipa' ukup pila ae' endilisi, ea' ipa' asonendahepa ma ae' egafe'ma Ahame. Dei' main?

* 14:21: Ap 10:41-42 * 14:22: Mt 18:20; Jo 13:34; 2 Ko 6:16; Ef 3:17
 * 14:23: Jo 7:16 * 14:25: Jo 14:16 * 14:26: Jo 14:1, 16:33; Fl 4:7
 * 14:27: Jo 14:3, 16:28; Jo 20:17; Lu 24:52

Ahame anen dembinai nikila' ae'. * 29 Hiahawes isimba ina dei' asataga, ata' owa'. Apa' ae' ali' a'pipas ea' ma nemaf afamba hiahawes isimba sogatagama ipa' pegawai pigahapifa ae'. * 30 Ae' ina atiasi enda' basef hiafi elomepa, a'owa'. Dei' main? Aman dembinai aunai nugumafi itap apa'ii anamba dei' a' nafi'i. Anen ina atiasi la'ifinama nonda'me anis maefah, owa'atin. * 31 Apa' ae' a'i esis amam nematawa sagaila waf itapafi sondogawa ae' okom maimaila Ahame endilisi ea' dei' anda'as na'amba atin si'i anen nanda'ipi. Na'amba dei' afa' a' ofe'.

15

Jisas anen si'i lawag si'iga endilisi

¹ "Ae' si'i lawag si'iga endilisi. Ahame ae'anai anen si'i ahama aof afamba sagawa lawah sa'utip gwa'aipi pagailagahi. * ² Agof hiagufi sa'utip owa' pigailagufia, agwafomba Ahame natopa'agof nelefatagof. Apa' anagof agof fail fogola gwa'aisii agwafomba anen nandombagof natopa'agof nahagasogof ama atiasi fogape bo'ogof fil fogola gwa'aisi hiasi andeande'. * ³ Basef ifimba ae' agasi'ipafi fanda'epa pataga be'epa hilili' ea'. * ⁴ Ipa' pendape ae' si'i ae' agape ipa'. I'i agof atogof wafiguf, ina atiasi sa'utip pilagof, owa'. I'i agof owa' fondala sisihiguf lawag si'igaea, afof ina atiasi folo andeande', fil fola gwa'aisi, owa'. Ea' na'amba atin si'i ipa'. I'i ipa' owa' pepe peloma ae'a, ipa' wapani ina atiasi pela anis gwa'aisi, owa'atin. * ⁵ Ae' si'i lawag si'iga. Ipa' si'i agofugama. Epen negape ae'i ma ae' egape anini, atiasi negela gwa'aisi

* 14:28: Jo 13:19 * 14:29: Jo 12:31, 16:11; Ef 2:2 * 14:30: Jo 10:18,
12:49; Mt 26:46 * 15:1: Mt 3:10 * 15:2: Jo 13:10 * 15:3: Jo 6:56
* 15:4: Jo 15:16; 2 Ko 3:5

hiasii. I'i ipa' pekwaha ae', ipa' atipa ina atiasi penda' anis maefah, owa'atin.*

⁶ "I'i anin epen owa' nepe ae'a, atiasi esis sili'amonan si'i sagatopa' agof namugufi ma aliguf. Ama satamagof sowa'aniagof a sogaofagof nif. * ⁷ I'i ipa' pepe ae' ma basef ae'afi fepe nomona ipa', ipa' pihali' ae' ma basef maif pendahama ukup ipe'ipi paga'ias, dao' atiasi hiahawes isimba sotagamepa na'amba atin. * ⁸ I'i ipa' pela gwa'aisi hiasi, Ahame ae'anai nofa' agol lu'wagili. Ama atiasi pegataga alipipai ae'ipai. ⁹ Ahame okom maimaila ae', ea' na'amba atin ae' okom maimailipa. Dondol ipa' pendape okom ae'ami la'afima ma pegegawa okom ae'ami pelele' mailipa a'owa'. * ¹⁰ I'i ipa' pila mu'uli ae'ani ande-ande', atiasi apepe okom ae'ami la'afima nomon si'i ae' agaila mu'uli ahamai andeande'ma agape okom ananiami la'afima nomon. * ¹¹ Ae' a'lipipa basef ifimba ma a'i dagala ae'ani inimba nepe nelomepa ae' dagala ipe'ini a' nepe si'ina nelelemb ipe'ilimbi. * ¹² Mu'uli ae'ani inimba. Ipa' ukup pindaima atina sahin owan ipe'isi endilisi si'i ae' okom magamagailipa. * ¹³ I'i anin epen nekwaha ambal ananili atol nega' netopalopa esis alipisi atis, waf afambai afikila' waf afamba anin epen daian nanda'afi. * ¹⁴ Ipa' pila mu'uli aga'ipipani andeande', dao' ipa' alipipai ae'ipai. ¹⁵ Epen agol akani dembinai ananinai ina na'ipan basef alihifa maol anen nanda'ani, owa'atin. Apa' ae' a'lipipa basef hiafi Ahame ae'anai naga'ipiefi. Na'amba dei' ae' ina efalepa epes falafipai agof akipai, owa'. Ae' efalepa alipipai. ¹⁶ Ipa' ina pali' pandandepa ae' ipe'iwai, owa'. Ae' ali' andandepa ea' ae'ipai. Ea' anda'epa

* 15:5: Mt 7:19, 13:42 * 15:6: Mt 7:7 * 15:7: Mt 5:16 * 15:9: Jo 14:15; 1 Jo 2:5 * 15:10: Jo 17:13 * 15:11: Jo 13:34 * 15:12: Jo 10:11; 1 Jo 3:16 * 15:13: Mt 12:50

panda' maol bu'wani. Ama pefe' penda' maol bu'wani si'i lawah hogola gwa'aisi ma maol bu'wani ipe'ini negape andeande'. Ama i'i ipa' pendabeten pihali' Ahame ma anis hiahawesa agol ae'igili, anen nogasi'ipasi. * 17 Ae' ase'epa mu'uli ipa' na'amba. Ipa' ukup pindandaima atin endilisi ma sahin owan ipe'isi.*

Atiasi epes sagaila waf itapafi sofala alipisi Jisasi bousi

18 "I'i esis amam nematawa sagaila waf itapafi si'i sofala ipa' boupai dao', ipa' pendegawa esis fowa' sali' sofala ae' bouwai. * 19 I'i a' endilisi ipa' epes itapipai, esis sagaila waf itapafi a' ukup pipilipa si'i ipa' mini'ap asasipai atipa. Apa' owa', ipa' ina epes itap apa'ipai, owa'atin. Ae' esahe'epa ea' ma pegakwaha waf itapafi. Ea' dei' esis sagaila waf itapafi sofalepa boupai.*

20 "Ipa' ukup pendapoma basef ifimba ae' agasi'ipafi andeande'. Epen inimba agol akani nanda' maol dowad-owafi, anin ina nape ilifa dembinai ananinai, owa'. Ae' ea' sali' sanda'me waf awafi, ea' atiasi esis sonda'mepa waf awafi, sonda'epa awepa wapani. Esis i'i sigi'ma basef ae'afiai, dao' atiasi esis sigi'ma basef ipe'ifi wapani. Owa', owa'atin. * 21 Esis ina sogawa Ahame nasapa'e agafi'ii, owa'. Ipa' ukup pagapoma agol ae'agili, ea' ae'ipai. Ea' esis sagaila waf esis itapafi asonda' hiahaom awami hiami ma ipa'. 22 I'i endilisi ae' owa' ifi'i i'ipasa basef ifimba ai, esis waf awafi akas. Apa' owa', owa'atin. Dei' esis owa' ano'w ufa'wa sogombaho' waf awafi asasifia, owa'atin. *

23 Epen negefala ae' bouwai, anin nefala Ahame ae'anai bounai wapani. * 24 Esis sagaila waf itapafi ina sati

* 15:16: Jo 13:34 * 15:17: Mt 10:22; 1 Jo 3:13 * 15:18: 1 Jo 4:5; Jo 17:14
 * 15:19: Jo 13:16 * 15:20: Mt 5:11; Mk 13:13 * 15:22: Lu 10:16
 * 15:23: Jo 9:41, 14:11

anona aman nanda' maol nandahama maol ae' anda'ani, owa'. I'i endilisi ae' owa' enda' maol inimbaea, esis waf awafi akas. Apa' dei' sati maol banagani ae'ani ea', owa', asowa' alafugaha ae' ukup awepa ae' aloma Ahame ae'anai wapani. * ²⁵ Apa' waf afamba asasifi afamba ea' fafe' dondo'ma anif basef ifimba fagail mu'uli esis Judai fa'i, 'Esis ukup awepa ae' dowadowaf. Ae' basef kofagefa ake.'*

²⁶ "Apa' anen natopalopepa nogowa' banagaipai, anen napani naloma Ahame. Ea' ae' esapa'ana nifi'mai ipa'. Anen Ambal bu'unai nawalapa basef naga'i endilisi. Anamba nafi'i ma nogawalapa basefa ae'. * ²⁷ Ea' ipa' wapani atiasi pi'i basef pewalapefa esis. Dei' main, ipa' fowa' dambadamba pati asefela maol anda'an paloma pape atapi pa' pafi'i pataga dei'."

16

¹ Ea' Jisas na'ipam wapani na'i, "Ae' dei' a'ipipa basef ifimba hi'alef ea' ma ipa' ina pekwaha pagahapifa ae', owa'i. * ² Atiasi esis sili'amonipai ifagw esis Juda sandakolasugwi. Anef nemaf atiasi fegataga ma epes ami sehepa pegaga', esis atiasi ukup pendanda' si'i sanda' maol fasini Godi. Apa' owa'atin. * ³ Fowa' esis ina sogawa Ahame naloma ae' wapani, owa. Na'amba esis atiasi sonda' waf afambai. * ⁴ Apa' dei' a'ipipa ea' ma hiahawes isimba. Ama nogota atiasi togataga ma esis sonda'epa na'amba, ipa' ukup pendanda'ma basef ifimba dei' aga'ipipafi.*

Maol Ambal bu'unai Godi

⁵ "Fowa' ae' ape agalompepa ae' ina a'ipipa ma hiahawes isimba, owa'. Apa' dei' ea' efe'ma anen anamba nasapa'e

* 15:24: Sam 35:19, 69:4 * 15:25: Jo 14:26 * 15:26: Lu 1:2; Ap 1:8,21-22 * 16:1: Mt 24:9; Lu 6:22; Jo 9:22 * 16:2: Jo 15:21 * 16:3: Jo 13:19 * 16:4: Jo 7:33, 13:36

agafi'ii. Ina anona aman ipe'inai nahali'i na'i, 'Ina' nefe' ani?' Owa'atin. ⁶ Ae' anda' basef ifimba ea' ma ipa'. Ea' dei' nelelemb ipe'ilimbi nimanilimb a'owa'. * ⁷ Apa' ae' a'ipipa basef endilisifi. Ae' ekwahipa efe' ma etopalopepa pegape andeande'. I'i ae' owa' ma igafe'ai, dei' Spirit Ambal Godi Nogowa' banagaipai, ina atiasi nifi'mai ipa', owa'atin. Apa' i'i ae' egafe', dao', atiasi esapa'ana nifi'mai ipa'. ⁸ Nema' afamba nugafi'i, a' nihimba'ma esis amam nematawa sagaila waf itapafi ma sogogawa basef kofagefa ma waf wanifif afamba. Waf awafi feloma waf usi'ifi feloma basefa God nondakotimas. * ⁹ Waf awafi kofagefa asasifi na'amba. Esis ina sohapifa ae', owa'atin. * ¹⁰ Waf kofagefa usi'ifi na'amba. Ae' efe'ma Ahame ea' atiasi ipa' ina petolowe wapani, owa'. * ¹¹ Basef kofagefa ma kot ifimba. Aman dembinai aunai ma epes sagape itap apa'i, anen ea' gasopana ma kot atamba ma basef lu'wafi God dei' nanda'manatai.*

¹² Ae' basef hiafi a'owa' ma a'i iga'ipipafi, apa' ipa' ina la'ifipama pegefa'ef dei', owa'. * ¹³ Nema' afamba Spirit Ambal Godi naga'i basef endilisifii nugafi'i, a' nisindi'a-monepa ma basef hiafi endilisifi. Anen ina a' nowalapa basef nomonas ananisi atis, owa'atin. Basef nagame'ef ea'i, ifimba atif nowalapef ni'if. Ama atiasi noga'ipipa hiahaom amamba ma'i anaf migi' mogatagai. ¹⁴ Ea' nofa' basef ae'afi nowalapefa ipa' ma nogowalapa agol ae'agili. ¹⁵ Hiahaom hiami, amamba ae'ami. Ea' dei' ae' a'ias a'i. Atiasi nofa' basef ae'afi ni'if nowalapefa ipa'.*

Ukup iwaiwanipi atiasi petaga dagalaip

* 16:6: Jo 14:16 * 16:8: Jo 3:18 * 16:9: Ap 5:31; Ro 4:25 * 16:10: Jo 12:31
 * 16:11: 1 Ko 3:1-2 * 16:12: Jo 14:26; 1 Jo 2:27 * 16:15: Jo 14:19

¹⁶ “Nogota kwaia'uta ipa' ina atiasi petolowe wapani, owa'. Ama nogota bandata kwasakwasala owa', ipa' apetelowe wapani.”

¹⁷ Anom alipumi ananiami, amom atom manda'ipama ma'i na'amba ma'i, “Basef maif kofagefa ifimba anen naga'ipafaef afa'i? Anen na'i, nogota kwaia'uta, afa' ina atiasi otolona, ma main owa', a' otolona wapani. Na'i nogafe'ma ahamana. Afa' ina ogawa basef ifimba kofagefa, owa'.”

¹⁸ Ea' amom ma'ias wapani ma'i, “Nogota atamba kwaia'uta anen naga'iatai, isimba hiahawes mais? Afa' ina ogawa basef ifimba naga'if na'ambai, owa'.”

¹⁹ Owa' Jisas a' nogawa amom ma'i mogahali'ana, ea' na'ipam na'i, “A'i ipa' pandahali'ma basef ifimba kofagefa ae' aga'iefi. Ae' aga'if na'amba. Nogota kwaia'uta atiasi ipa' ina petolowe, owa'. Ama owa' nogota laota kwasakwasala, owa' a petolowe wapani. ²⁰ Endilisi atis ae' a'ipipa. Ipa' atiasi pelef mehipe' a'owa' ea' pelef pindiwagef endilisi. Apa' esis amam nematawa sagaila waf itapafi atiasi sondagala. Apa' ipa' a' nelelemb nimanilimb. Owa', owa'atin. Nelelemb ipe'ilimbi nimanilimbi atiasi bendambema betaga pendagala endilisi. * ²¹ Nemata'w opafu'wi ma kwa'i kogola awanii ako'w kwame' akafimi kogawa nogota akwa'uta ma kogola awani atataga. Na'amba opaf akwa'ufi a' nimanif. Ako'w kolana ea', ako'w ina ata' okom mandanda'ma akafimi amamba wapani, owa'atin. Ako'w ea' kwandagala atin kwapoma awani nataga nape itap ea'. * ²² Ipa' na'amba atin, dei' ipa' nelelemb nimanilimb. Atiasi ae' itilipa wapani, owa' nelelemb ipe'ilimbi asonohalemb. Ina anin epen la'ifina negalamona dagala inimba ipe'ini, owa'atin. * ²³ Atiasi nemaf afamba ipa' ina pihali'i ma anin

* 16:20: Ais 26:17 * 16:21: Ais 66:14 * 16:22: Mt 7:7

mae atitin, owa'. Apa' dei' ae' a'ipipa basef endilisifi ipa'. I'i ipa' pihali' Ahame ma maefah maisa agol ae'agili dao', atiasi nese'epas. * ²⁴ Fowa' ipa' ina pahali'i ma pegefa' anis maefaha agol ae'agili, owa'. Dei' pihali'imas, atiasi pegefa'asi ma nelelemb ipe'ilimbi asonogahepa endilisi.*

Jisas a' nikila' wafitapafi ea'

²⁵ “Ae' dei' anda' basef ifimba waminif atina ipa'. Apa' ae' ina atiasi ata' i'ipipa basef waminif atin, owa'. Nema' afamba ae' ewalapef alihif i'ipipaef ipa' ma Ahame. ²⁶ Ama nema' afamba atiasi ipa' pihali' Ahame ma agol ae'agili. Ae' ina ata' i'ipipa na'amba i'i ae' atowe atiasi ihali'ana ma nogatopalopepa, owa'atin. * ²⁷ Ahame atona okom maimailipa a'owa'. Dei' main, ipa' ukup paipaila ae' a'owa', ea' ipa' pahapifi pegawa ae' ape aloma God afi'i. ²⁸ Fowa' ae' ape aloma Ahame ea' akwahona afi'i itap apa'e ea'. Dei' ae' a'i ekwaha itap a' itanima efe'ma anen.”

²⁹ Alipumi ananiami ma'i, “Aho', dei' ina' na'ipafas alihis, ina ata' na'i basef waminif atin, owa'. * ³⁰ Dei' afa' ogawa ina ata' nape nasasa anin epen nihali'ina nili', owa'atin. Ina' negawa hiahaom hiami ea'. Isimba atis dei' afa' wahapifa ina' nape naloma God nafi'i.”

³¹ Jisas nagwamam basef na'ipam na'i, “Ipa' dei' pahapifa ae' a'amon? * ³² Ipa' peme'. Dei' nogota ea' felefele', aho' atataga ea' ma atiasi sotofa ipa' hipai atona biana pefe' walemb ipe'ilimbi. Ea' pekwaha ae' atowe epe. Apa' ina ae' atowe epe, owa'atin. Ahame nape nalome. * ³³ Ae' a'i atiasi ipa' pepe pelome nelelemb pepe sa'ombel. Ea' dei' a'ipipa basef ifimba. Itap apa'e ipa' atiasi peme' nelelemb nimanilimb. Apa' nelelemb

* 16:23: Jo 15:11 * 16:24: Jo 10:6 * 16:26: Jo 14:21,23 * 16:29: Jo 2:25
 * 16:31: Mt 26:31,56; Jo 8:29 * 16:32: Jo 14:27; Ro 5:1; 2 Ti 3:12; 1 Jo 5:4

ipe'ilimbi atiasi ambetaga banagelemb. Dei' main, ae' atalogofa waf itapafi a ikila'af ea'."

17

Jisas nandabeten natopalopa alipumi ananimit

¹ Jisas na'i basef na'amba ma ea', a' naniga nati heven nandabeten na'i, "Ahame, nogota atataga ea'. Ina' nese'e agol lu'wagili ae' Nogamena ine'iwai, ma atiasi la'ifiwi ma egasa'ma agol ine'igili lu'wagol. * ² Dei' main? Ina' nesahe'e ea' ma epe Dembiwai ili'ma epes hi'igalas egaso'as ambal namili epes isimba hiasi ina' nagasi'iesi. Ambal alamba sogape andeande' lifilafi dondoli. * ³ Ambal lagape andeande' lifilafii kofagefa ifimba. Esis sogawa ina' atina God endilisinai, sogawa endilisi ae' Jisas Krais, ina' nasapa'e agafi'ii.*

⁴ "Maol inimba ina' nasapa'e afi'i ma enda'ani, ae' anda'an ambifan ea'. Ea' dei' asa'ma agol ine'igili lu'wagola nogohnaep esis amam nematawa itapasi. * ⁵ Ahame, fowa' itap owa' ata' pitagaia ae' ape alomena efa' agol lu'wagili ea'. Dei' nendase'e agol agalemba lu'wagili si'i fowa'. ⁶ Ae' awalapa agol ine'igili ea' a'ipa esis epes isimba ina' nagase'eas ae'i ma itap apa'e. Isimba epes ine'isi nagase'eas ae' ea'i. Esis saila basef ine'ifi andeande'. ⁷ Dei' asogawa hiahaom hiami ina' nagase'eam ae' ea'i, amamba mafi'i ina' atina. * ⁸ Basef hiafi ina' nagase'ef ea'i, ifimba ae' alipasef ea', sofa'efa sogogawa endilisi fowa' ae' ape alomena afi'i. Ea' sahapila basef ifimba ina' nasapa'e agafi'ii.*

* 17:1: Mt 11:27; Jo 11:41, 12:23 * 17:2: 1 Jo 5:20 * 17:3: Jo 4:34
 * 17:4: Jo 1:1, 17:24 * 17:7: Jo 16:30 * 17:8: Jo 6:37,44

⁹ “Dei' ae' andabetena egatopalopa isimba. Ae' ina andabetena egatopalopa esis amam nematawa sagaila waf itapafi, owa'. Ae' anda' betena egatopalopa isimba ina' nagase'eas ae'i. Dei' main? Isimba esis ine'isi si'isi. *

¹⁰ Ea' epes ae'asi, isimba ine'isi. Epes hiasi ine'isi hi'ilas isimba ae'asi. Ea' esis sasa'ma agol ae'agili. * ¹¹ Dei' ae' ina ata' epe itap apa'e wapani, owa'. Apa' esis sope itap apa'e. Ae' ea' efe'mago ina'. Ahame be'ena hilili'i, ina' nimafi esisa atiasi sogape banagesa banagami ine'imi, banagami amamba ina' ea' nagase'eam ae'i. Ma esis sogape wambota atotota si'i afa' biafa wagape atotofa. *

¹² Nogota atamba ae' ape agaloma esis, ae' imafias sape banagami ine'imi, banagami amamba ina' ea' nagase'eam ae'i. Ae' imafias andeande' ea' ina anin atitin higilalan, owa'. Aman higiliganai, ea' anen atona atiasi nogafe' wambel awambili, ma basef ine'ifi fagail buk Baibeli fetaga endilisi fendawalap. * ¹³ Ae' dei' ata' ape itap apa'e a'i basef ifimba ma dagala ae'ani negape si'ina nelelemb asasilimbi. Ea' dei' a' efe'mago ina'.

¹⁴ “Basef ine'ifi, ae' aso'asef ea'. Esis amam nematawa asofala esis bousi sanda'as awes. Dei' main? Esis ina sagi'ma waf itap apa'ifi si'i ae' wapani ina itap apa'iwai, owa'.

* ¹⁵ Ae' ina andabeten ahali'ina ma negelefata esis itap apa'e, owa'atin. Ae' andabetena ina' nigimafiasa aman aunai ina nohambombagas, owa'atin. ¹⁶ Esis ina sagi'ma waf itap apa'ifi si'i ae' wapani ina itap apa'iwai, owa'.

¹⁷ Basef ine'ifi ifimba endilisifi. Ina' nenda' esis sondataga ine'isi atis bo'wes hilili'ma basef ifimba. * ¹⁸ Fowa' ina' nasapa'e afi'i ape la'afena esis amam nematawa sagaila

* 17:9: Jo 16:15 * 17:10: Jo 10:30, 17:21 * 17:11: Jo 6:39, 13:18; Jo
 18:9 * 17:12: Jo 15:11 * 17:13: Jo 15:19 * 17:14: Mt 6:13; 2 Te 3:3;
 1 Jo 5:18 * 17:17: Jo 20:21

waf itapafi. Dei' na'amba atin ae' wapani ea' asapa' esis ae'asi sofe' la'afena esis isimba itapasi. * 19 Ae' ase'ena ae' ina' ea' ine'iwai atowe ma etopalopa esis wapani sogataga bo'wes hilili' ine'isi atis.

Jisas nandabetena epes hiasi anaf sogahapifa anini

²⁰ “Apa' ae' ina andabetena egatopalopa esis isimba atis, owa'atin. Ae' andabetena egatopalopa epes isimba anaf sogame' basefa esisi ma sogahapifa ae'i. * ²¹ Ahame, ae' andabetena esis isimba hiasi asondape ukup atifip si'i ina' Ahame nape nagalome a ae' ape agalomena. Ea' na'amba atin, anda' betena esis sogape afa' biafa. Ama amam nematawa sagaila waf itapafi sogahapifa ina' atina a' nasapa'e agafi'ii. * ²² Fowa' ina' nasa'ma agol ae'agili lu'wagol ea' dei' asa'ma agof asisigufi lu'wagofa sogape nembel atotombel si'i afa' biafa wagape. ²³ Ina' nape nalome a ae' anaf epe eloma esis, ae', ea' na'amba atin ae' okom ma'i esis asondataga nembel atotombel endilisi. Ama esis amam nematawa itapasi sogogawa ina' nasapa'e afi'i, ea' ina' okom maimailas a'owa' si'i okom magamagaila ae' a'owa'.*

²⁴ “Ahame, ae' okom ma'i esis amam nematawa ina' nagase'eas ae'i sope solome wambel ambalemba. Ae' okom ma'i esis siti hiahaom banagami fasimi mogogala'i ae'ami, mogogala'i amamba ina' nagase'eam ae'i. Fowa' itap ata' owa' petagaea, nogota atamba ina' okom maila ae'. Ea' nase'e mogogala'i amamba. * ²⁵ Ahame usi'inai hilili'i, esis amam nematawa sagaila waf itapafi ina sogawa ina'. Apa' ae' egawena. Ea' esis isimba alipisi sogawa ina' nasapa'e afi'i. ²⁶ Ae' a' awalapa agol ine'igili ma esis. Ea' ae' atiasi endawalapagol atin atapigil. Ama

* 17:18: Hi 10:10 * 17:20: Jo 4:11; Ga 3:28 * 17:21: Ap 4:32 * 17:23: Jo 12:26, 17:5 * 17:24: Jo 8:55

esis sogofa' waf afamba ukup pindaima atinafi ma anis daindaias wapani si'i ina' okom magamagaila ae' ma ae' egape nomona esis."

18

Judas nihimba'mama Jisas amom boumi

(Mt 26:47-56; Mk 14:43-50; Lu 22:47-53)

¹ Jisas nandabeten nahali' Ahamana ea', naloma alipumi ananiami a' mafe' mowala mambo walemb Kidron fisanamb lawah oliv hogotaoma. Nao'wam mafe' anamba.

* ² Anen Judas a' nogawa anamba ma atiasi nefe' nigihimba'ma boumi ma Jisas. Dei' main? Nimaguf hiafi dondol Jisas nao'wam mandakolas magapoma anamba.

* ³ Ea' Judas nafi'i nao'wa anom soldia maloma anom plisman amom pris maloma amom Farisi masapa'am magafi'i. Amom mahapila bagah nagwahis lambekh maloma hiahaom sagapa'ami mofa'am atin mafi'i anamba.

⁴ Ea' Jisas nogawa hiahaom hiami atiasi mogataganamai. Ea' nafe' nahali'am na'i, "Ipa' pewando'ma ami?"

⁵ Ea' magwamana ma'ipana ma'i, "Jisas Nasaretinai."
Ea' Jisas na'i, "Ae' ma'uwi."

Owa' Judas na'i nigihimba'mam Jisasi, anen nalutu nalomam wapani. ⁶ Jisas ata' na'ipam atin na'i, "Ae' ma'uwi."

Owa' a' mandahagas mowa motawa itap.

⁷ Ea' Jisas nahali'am wapani na'i, "Ipa' pewando'ma ami?"

Ea' ma'i, "Jisas Nasaretinai."

⁸ Jisas na'i, "Doko' ae' a'ipipa a'i ae' ea' ma'uwi. I'i ipa' pewando'ma ae', pihapili pekwahogo amom amamba mofo'o wahifim."*

* 18:1: Mt 26:36; Lu 21:37 * 18:2: Jo 7:45 * 18:8: Jo 17:12

⁹ Jisas dei' na'ipam na'amba nag'i'ma basef ifimba fowa' naga'iefi ma fegataga endilisi. Basef ifimba faga'i na'amba fa'i, “Amam amamba fowa' ina' nagase'eami, ina anona atotona higililana, owa'.”*

¹⁰ Ea' Saimon Pita nahapila anota bainat nagiat'ai naha anona aman Malkas nanda'mana maola pris dembinai nape nagali'ma pris hiamii. Ea' natopa' aliga kwahisigai ananigai gowa.*

¹¹ Ea' Jisas na'ipa Pita dindinip na'i, “Ina' tanima la bainat nowala let. Ae' a' ia' embela kap Ahame nagasi'i-api.”

Amom mao'wa Jisas nafe'ma pris dembinai Anas

¹² Ea' amom soldia maloma dembinai amamunai maloma amom plisman Judai hiami mombalo' Jisas manda' mandof mowa' lagofana. ¹³ Ea' mao'wana nali' nafe'ma Anas, Kaiafas fafomana. Afagol agalemba, Kaiafas dembinai pris nape nagali'ma pris hiamii. * ¹⁴ Kaiafas nali' naga'ipa amom agufumi Juda naga'i, “I'i anona aman noga' ma apa' Juda hiapai, waf afambai andeande', waf bu'wafi.”*

Pita nandahali' na'i, “Ae' ina egawa Jisas”

(Mt 26:69-70; Mk 14:66-68; Lu 22:55-57)

¹⁵ Ea' Saimon Pita naloma ae' alipuwai Jisasi wagi'ma Jisas wafi'i. Pris anamba dembinai nogawa ae'. Ea' awis aloma Jisas ipat nomon. ¹⁶ Apa' Pita tol nalutu uta indaleleb ando'. Ae' itanima awisi ando' a'ipa ano'w nemata'w kugumafi utai ea' ao'wa Pita wawis nomon. ¹⁷ Ea' nemata'w kugumafi utai kwa'ipa Pita kwa'i, “Ina' wapani alipunai aman anambai, a'a owa'?”

Owa' anen nagwama'wa basef na'i, “Ae' owa'.”

* 18:9: Lu 22:38 * 18:10: Mt 26:39 * 18:13: Jo 11:49-51 * 18:14: Jo 20:3, 21:20; Ap 3:1; Mt 26:58

¹⁸ Amom manda' maola pris anamba dembinai maloma anom plisman amom hiami nomanamb bam makata nif a' malutumif fahi'am. Ea' Pita wapani nalomam nalutumif.

*Pris dembinai nape nagali'ma pris hiamii nahali' Jisas
(Mt 26:59-66; Mk 14:55-64; Lu 22:66-71)*

¹⁹ Ea' pris anamba dembinai nahali' Jisas ipat nomon. Nahali'ana ma alipumi ananiami maloma basef anen nagawalipasafi.*

²⁰ Owa' Jisas nagwamana na'i, "Ae' awalipasa basef ae'afi alihigima ma epes hiasi itapasi. Ae' awalipas nomon ifagw esis Juda sandakolasugwi nimaguf hiafi dondol. Ea' awalipas ipat lu'unai Godi wapani, ipat anamba esis Juda hiasi sandakolasanai. Basef ae' aga'iefi ina fandambaho', owa'atin. ²¹ Dei' maina ina' nagahali' ae'? Dei' nigahali' esis sagine' basef agawalipasafi. Esis sogawef."*

²² Jisas na'i basef ifimba atin, owa' anona plisman nalutu felefele' naha amaga lagol ananigili na'ipa Jisas dindinip na'i, "Ina' owa'i negwamana basef ifimba dembinai prisa."

²³ Ea' Jisas nagwamana basef na'i, "I'i ae' i'i anif basef awafi, dao' ina' ni'ipa amom hiami na'amba. Apa' owa'atin. Ae' iga'i basef endilisifi, dei' nahe ma main?"

²⁴ Mandelef ata' fapomana atin lagof Jisasi, ea' Anas nasapa'ana nafe'ma pris anamba dembinai Kaiafas.

*Pita nandahali' wapani na'i, "Ae' ina egawa Jisas, owa'atin"
(Mt 26:71-75; Mk 14:69-72; Lu 22:58-62)*

²⁵ Saimon Pita tol nalutuma nif fahi'ana, ea' sa'ipana sa'i, "A'i ina' alipunai ananinai?"

Owa' anen na'i, "Ahae', ae' owa'."*

* 18:19: Mt 26:55; Jo 7:26 * 18:21: Ap 23:2 * 18:25: Jo 18:10

²⁶ Ea' anona aman nape felefele'ma Pita. Anen nanda' maola pris anamba dembinai. Anen amom atom wambota atota aman anamba doko' Pita nahana nagatalisa nagakwalisa aliganai.

Ea' na'ipa Pita na'i, "Endilisi atis, ae' ati ina' nape nagaloma Jisasi ganimba lawah oliv hogatawama."*

²⁷ Ea' Pita nandahali' na'i wapani na'i, "Ae' owa'."

Anen ata' na'i atin, owa', awata atata.

*Amom mofa' Jisas mafe'ma gavman dembinai Pailat
(Mt 27:1-2,11-14; Mk 15:1-5; Lu 23:1-5)*

²⁸ Ama kuhimbata atota amom matagwaha Jisas makwaha ipat Kaiafasi, mofa'ana mafe' ipat gavman dembinai. Ea' amom Juda ina mafe' mawis ipat atamba, owa'. Amom ma'i, "Na'amba a' mofa' alogw awagwi ea' ina atiasi mea' gwa'aisi lu'wasi Pasova, owa'atin."

²⁹ Amom ukup pandanda' na'amba ea' tol malutu ando' Pailat nafi'mai amom na'i, "Ipa' pa'i penda'mana kot aman anamba ma main?"

³⁰ Amom magwamana basef ma'i, "I'i aman anamba owa' nonda' waf awafia, apa' ina a' mofa'ana nifi'mai ina'."*

³¹ Ea' Pailat na'ipam na'i, "Ipa' atipa pefa'ana penda' kotimana nondahama mu'uli ipe'ini atin. Apa' ae' owa', andaiwa'."

Ea' amom Juda magwamana ma'i, "Mu'uli ipa' Romi na'i owa'i ma mogaha anin epen negaga', owa'atin endilisi."*

³² Hiahawes isimba amom Juda manda'asi ina sataga dowaf, owa'atin. Isimba sataga sagi'ma basef ifimba Jisas nali' naga'iefi afegataga endilisi. Dei' main? Anen nali' na'i, "Atiasi esis sehe ega' lawag usi'igai ti'wanaegai."

* 18:26: Jo 13:38 * 18:30: Jo 19:6-7; Ap 18:15 * 18:31: Mt 20:19; Jo 3:14, 12:33

³³ Ea' gavman dembinai Pailat netanima nawis ipat lu'utai gavmani nomon. Ea' nofala Jisas nafi'i nahali'ana na'i, "Ina' king dembinai esis Judai?"

³⁴ Jisas nahali'ana na'i, "Basef ifimba fataga okom in-e'imi atom a'a anis daias sa'ipinaefa ae'?"*

³⁵ Ea' Pailat nagwamana basef na'i, "Ina' okom ma'i ae' wapani ae' Judaiwai? Owa'atin. Epes ine'isi saloma amom pris dembami, esis atis sombalo'ena sowa'ena nafi'mai ae'. Ina' nanda' waf maif?"

³⁶ Ea' Jisas na'i, "Ae' ina Judaiwai king igimafi epes itapasi, owa'atin. I'i ae' epe dembiwai king itap apa'iai, alipumi ae'ami manda' maola ae'i motopalope mopa' ma Juda ina la'ifisa sogombale'e. Apa' owa', owa'atin.*

³⁷ Ea' Pailat na'i, "Na'amba ina' anina king dembinai."

Jisas nagwamana basef na'i, "Ina' na'i ae' anawe dembiwai king. Basef ifimba endilisifi. Ma'me kolae ma egape king dembiwai. Ae' afi'i itap apa'e ma igawalipasa basef endilisifi. Epen ami nenda' waf endilisifi, inimba negame' basef ae'afii."

³⁸ Ea' Pailat nahali'ana na'i, "Basef ifimba endilisifi, basef maif?"

Pailat na'i esis sowa' Jisas lawag usi'igai ti'wanaegai

(Mt 27:15-31; Mk 15:6-20; Lu 23:13-25)

Pailat na'ias na'amba ea' notanima nawis ando' esis Juda sagapoma na'ipas na'i, "Ae' ina ati anis maefah awasi ma anen, owa'. Ina ati anef waf awafi ma enda'mana anif basef, owa'. ³⁹ Apa' waf ipa' Juda, ma panda' gwa'aisi lu'wasi Pasova, ae' akwaha anin epen nanda' kalabusi nafe'mago ipa'. Dei' ipa' pa'i ae' ekwaha king dembinai ipa' Judai nefe'mago ipa', a'a ami?"

⁴⁰ Ea' esis sagwamana basef dindinip sa'i, "Owa'atin, anen owa'. Ina' nekwaha Barabas nifi'mai apa'."

*

18:34; Jo 1:11

*

18:36; 1 Ti 6:13; Jo 8:47

Aman anamba Barabas anen nanda' walii naha epes sagaga'i.

19

¹ Ea' gavman dembinai Pailat nao'wa Jisas nafe' na'ipa amom soldia mopagahona. * ²⁻³ Mapagahona ma ea', mala'watefa anof mandof higatagufi si'i anota hat mowalo'manota balaga ananigai, malamana anef lowaf akwahifi. Ea' timbi tambel mafe'ma anen ma'ipana ma'i, “Nemaf bu'wafi, ina' dembinai king Judai.” Amom manda' salomala anen manda'ana findiwana na'amba, mahana amaga ananigai.*

⁴ Ea' Pailat nawis ando' wapani na'ipa esis Juda na'i, “Ipa' peme! Ae' ao'wana nafi'mai ipa' ma pegegawa ae' ina ati anis maefah awasi, owa'. Ina ati anef waf awafi ma anen enda'mana anif basef, owa'.”

⁵ Ea' Jisas a' nawis ando'. Hat atamba manda' mandof higatagufi magala'watefaf si'i hati fapomana balaga ananigai ea' lowaf akwahifi fapomana.

Ea' Pailat na'ipas na'i, “Ipa' piti aman ana'e.”*

⁶ Ea' amom pris dembami maloma plisman amamumi ata' matolona atin, ma'ias dindinip mehipe a'owa' ma'i, “Dolana nil lawag usi'igai ti'wanaegai!”

Ea' Pailat nagwamama basef na'i, “Ipa' atipa fa'ana dolanago. Apa' ae' owa', ae' ina ati anef waf awafi anen nanda'afi ma enda' kotimana, owa'atin.”*

⁷ Ea' amom Juda magwamana basef ma'i, “Anen naga'i anen Nogamana Godi. Ea' mu'uli ape'ini na'i anen a' nondaga'.”

⁸ Fowa' Pailat ombal mahana kwasakwasala apa' dei' owa', name' basef ifimba atif, ombal a' lu'um mahana

* 19:1: Lu 23:11; Jo 18:22 * 19:2-3: Jo 18:38 * 19:5: Jo 18:31 * 19:6: Lev 24:16; Jo 5:18

a'owa'. * ⁹ Ea' nawis nomon ipat atamba nahali' Jisas na'i, "Ina' nataga nafi'ani?"

Apa' Jisas ina nagwamana anif basef, owa'.

¹⁰ Ea' Pailat na'ipana na'i, "Ina' nandaiwa'ma niga'ipi anif basef? Ina' negawa ae', a'a owa'? Ae' banagiwai ma ekwaha ina' negafe' dowaf a'a i'ipas sehena negaga' lawag usi'igai ti'wanaegai."*

¹¹ Ea' Jisas nagwamana basef na'i, "I'i God nagape ilifi owa' nese'ena banagami ina'a, ina' atina ina banagena ma negatalogofa ae', owa'. I'i nehe ega', waf afamba awafi. Apa' amom amamba mofa'e agafi'mai ine'i, waf amamifi awafi lu'uf a'owa', fikila' waf awafi ine'ifi."*

¹² Pailat name' basef ifimba atin, ea' na'i notagwaha Jisas nefe' wahifina. Owa' esis Juda sofalana mehip sa'i, "I'i ina' netagwaha aman anamba nefe' wahifina, ina alipunai ma Sisar gavman dembinai esis Romi, owa'. Epen ami na'i anin atin king dambeni anin bouni Sisari."

¹³ Pailat name' basef ifimba atin, nofa'i Jisas nawisi nataga ando' ea' nape anin sia amom dembami jas magapoma. Anamba sa'i ufiaw otamba atembai'wi. Ufiaw akwamba diga Hibrui sa'i Gabata. ¹⁴ Nemas afamba esis Juda sape sandondomba gwa'aisi ma naman sonda' gwa'aisi lu'wasi Pasova. Ea' awin a' nandasapa' nape 12 klok. Owa' Pailat na'ipa esis Juda na'i, "Piti dembinai king ipe'inai nalutu na'a'e."

¹⁵ Owa' esis Juda sa'ipana mehip sa'i, "Fa'ana, fa'ana, nendelana lawag usi'igai ti'wanaegai."

Ea' Pailat nahali'as na'i, "Ipa' pa'i ae' endela king dembinai ipe'inai lawag a'a owa'?"

* 19:8: Mt 26:62-63; Mt 27:12; Lu 23:9 * 19:10: Jo 10:18; Ap 2:23; Ro 13:1

* 19:11: Lu 23:2; Ap 17:7

Ea' amom pris dembami magwamana basef ma'i, "Apa' owa' anona dembinai kinga, Sisar atona anen dembinai king ape'inai."

¹⁶ Ea' Pailat nakwahomasa Jisas esis Juda ma sogandolona lawag usi'igai ti'wanaegai.

Amom mandola Jisas lawag usi'igai ti'wanaegai

(Mt 27:32-44; Mk 15:21-32; Lu 23:26-43)

¹⁷ Ea' amom soldia mowa' Jisas mofa'ana mafe'. Jisas atotona nofa' lawag ananigai a' nafe' nakwaha wambel lu'wambili nawis ando' nafe' nataga anagon agiligima Pipitagol Balagaigil. Diga Hibrui sa'i Golgota. ¹⁸ Anamba amom mowa'ana lawag usi'igai ti'wanaegai naloma anom amam biam. Anona nail wa'ol, anona nail wa'ol, ea' Jisas nail la'afen.

¹⁹ Gavman Dembinai Pailat nanda' anif basef nofa'ef nanda'ef fail lawag agamba ilif. Basef faga'ias na'amba fa'i, "Jisas Nasaretinai, anen Dembinai King esis Judai."

²⁰ Esis Juda hiasi sati basef ifimba satalifif. Dei' main, anamba amom magandola Jisasa nape felefele' Jerusalem. Ea' basef fa'i diga wanifiga. Diga Hibrui, Latini, a diga Griki.

²¹ Amom pris dembami esis Judai ma'ipa Pailat ma'i, "Ina' owa'i nenda' basef ifimba ni'i, 'Dembinai King esis Judaia', hapaifi. Ina' nenda' basef ni'i, 'Anen na'i, Ae' Dembiwai King esis Judai.'"

²² Ea' Pailat nagwamam na'i, "Basef ae' anda'ef ea'i fendape atapif."

²³ Amom soldia mandola Jisas ea', mofa' luwaguf ananifi matambe'ef biafigin biafigina mondandama aolef mofa'alef fendandamam. Ea' mofa' siot ananitai wapani. Siot atamba esis ina sosambalota, owa'. Sanda'ata tape si'lita ilif tafe' tataga owin. * ²⁴ Amom manda'ipama ma'i, "Afa'

* 19:23: Sam 22:18

ina owala siot atamba, owa'i. Afa' onda' pilai satu ma ami nigikila'i nefa'ata.”

Amom ma'ias na'amba maila anif basef fowa'ifi fagape Buk Baibeli afataga fandawalap endilisi. Basef ifimba faga'i na'amba fa'i,

“Amom matambe' luwaguf ae'afi fafe'ma amom atona atin ea' manda' satu ma ami nigikila'i nefa'ef.”

Ea' amom soldia manda'as na'amba atin.*

²⁵⁻²⁶ Ma'ma Jisasi kwaloma owama'w ako'ukwi waloma ano'w nemata'w Maria kwagaso' Klopasi waloma Maria Makdalai'wi awo biawai biawa walutu felefele'ma lawag Jisas nagailagai.

Ea' Jisas nati ma'mana anani'wi kwaloma ae' ananiwai okom magamagailai, afa' biafa walutu felefele'ma anen. Ea' na'ipa ma'mana na'i, “Ma'me, aman anamba noga-mena ine'inai.”

²⁷ Ea' na'ipa ae' alipuwai ananiwai na'i, “Nemata'w akwamba ma'mena ine'ikwi.”

Nogota atamba ae' efa'akw kwafe' ipat ae'atai ma igi-mafia'w dondol atapi'w.*

Jisas naga'

(Mt 27:45-56; Mk 15:33-41; Lu 23:44-49)

²⁸ A'i owa' main, Jisas nogawa maol hiani ananini ahi'alan, ea' okom ma'i anif basef fagape Buk Baibeli fetaga fendawalap. Ea' na'i, “Ae' iap pase'ema embel.”

Anen na'ias na'amba nagi'ma basef ifimba Baibelifi.*

²⁹ Ea' anol botol si'ila embel wain numbutimbeli ba'oh. Ea' amom mofa' anom mosong mowala wain embel ambalemba magiam masapa'am anogol bagol mofa'am mandomanam malogol Jisasi ma noga' embel.

* 19:24: Mt 27:55-56; Jo 13:23 * 19:27: Sam 22:15 * 19:28: Sam 69:21

³⁰ Anen na' wain embel ambalemba ea' na'i, "Maol inimba ahi'alan."

Ea' nindiwa balaga ambal a' landahi' lafe'ana naga' dogw.*

Amom soldia mapisila Jisas lambek ananibihi wa'ol ano'w wamba'w

³¹ Nema' afamba esis Juda sape sandondomba gwa'aisi maisa naman sonda' gwa'aisi lu'wasi Pasova. Nema' afamba dei'ifi sabat lu'wafi fikila' sabat anif nimaguf hiafi. Ea' amom Juda mandaiwa' ma amom wanom migail atapim lawah agahemba nema' afamba lu'wafi. Ea' mafe' mahali' Pailata amom soldia mugundiwa bo'wagah amamugahi ma mogaga' ulala motagwahom mugisila'i.

³² Ea' amom soldia mafe' anamba maham magaila. Ea' mati anona nagail wa'ili mindiwa bo'wagahana a' naga'. Ea' mafe'ma anona wa'ol mudiwa bo'wagahana. ³³ Ea' mafe' ma Jisas nagaila, owa' mati anen a' naga' dogw endilisi. Ea' amom ina mindiwa bo'wagah ananigahi, owa'. ³⁴ Ea' anona soldia nanda' wamba'w napisila lambek Jisasi wa'ol. Ea' kwafalis atis esimbel baloma embel maluwi. * ³⁵ Ae' ati amamba naep ae'api a'ipipa basef ifimba. Ea' basef ifimba ae'afi endilisifi atif. Ae' egawa basef ifimba aga'ipipafi endilisifi a'ipipa ma ipa' wapani pigahapifif.*

³⁶⁻³⁷ Fowa' basef fagail Buk Baibeli fa'ias na'amba fa'i, "Owagama bihitagof ananigufi ina totoweagof, owa'atin."

Ea' anif wapani fa'ias na'amba fa'i, "Owagama esis siti aman anamba sagapisilana wamba'wi."

Amom soldia manda'am na'amba maila basef ifimba atif fagail Buk Baibeli fataga fandawalap endilisi.*

* 19:30: Diu 21:22-23 * 19:34: Jo 21:24 * 19:35: Eks 12:46; Nam 9:12; Sam 34:20; Sek 12:10; Re 1:7 * 19:36-37: Jo 7:13

Amom mawa Jisas matmat bolotaf nagal nagawis otam lu'unai

(Mt 27:57-61; Mk 15:42-47; Lu 23:50-56)

³⁸ Josep Arimateainai anen alipunai Jisasi, apa' anen ombal mahana ma amom Juda. Ea' nahapifana nomonas atis sape sandambaho'. A'i owa' main, anen nafe' nahali' Pailata alop Jisasi, Ea' Pailat na'i aho', a' nafe' nofa'ap nafe'. * ³⁹⁻⁴⁰ Anen Josep nafe' naloma Nikodemus, anamba fowa' nafe' nagati Jisas anomb owambi. Anen nofa'i anin marasin bu'wani sanda'an ifat lawahi, agilima mer naloma alos. Marasin inimba hiani nimanin a'owa', 75 paun. Ea' amom biam mafe' mofa' alop Jisasi manda' luwaguf afitifi faloma marasin inimba mombafana, maila waf esis Judai.

⁴¹ Felefele'ma anamba magandola Jisasa anof aof fape. Aof afamba anona bolotaf nagal si'i matmat dambaitai nape. Anamba esis ina dei' sawa anin epenagon, ata' owa'atin. ⁴² Matmat atamba tape felefele'. Nemaf afamba nemaf esis Juda sa'i sogowando'ma hiahawesafi, ma nemaf sagapoma noma'wafi sa'i sabat felefele'ma fegataga. Ea' mofa' alop Jisasi mawana matmat atamba.

20

Jisas notanima nosafel wapani

(Mt 28:1-8; Mk 16:1-8; Lu 24:1-12)

¹ Akot ata' tail, felefele'ma kuhumbita nemaf Sande Maria Makdalai'wi kosafel kwafe' matmat. Ea' kwati otam ina ata' masopama uta matmati, owa'atin. Anin open nelefatam a' mafe' ma'oh wa'ol. * ² Ea' kotan-ima kwasagih kwafi'mai ae'i Saimon Pita wagapoma, ae' alipuwai Jisasi okom magamagailai. Ea' kwa'ipafa kwa'i,

* 19:38: Jo 3:1-2 * 20:1: Jo 13:23

“Anis safe' sofa' Dembinai nakwaha matmat asafe'. Ea' afa' ina ogawana safe' sambe'ana anima.”

³⁻⁴ Ea' ea' aloma Pita wasagih wafe' wataga matmat atamba. Wasagih wafe', apa' ae' ikila' Pita ali' afa' ataga matmat atamba. ⁵ Ea' indiwa nembawa etawa ati luwaguf atif fa'oh nomon apa' ina awis nomon, owa'. * ⁶⁻⁷ Owa' Saimon Pita nag'i'mi nafi'i nataga ea' nawis matmat bolotaf nomon. Ea' nati luwaguf mogowa'anami atom ma'oh, maloma anef lowaf manda'af mogowa' balagonafi. Lowaf afamba sindiwaf sambe'af fa'oh anagon daiagon. Apa' luwaguf ifimba anif fa'oh dei. ⁸ Ea' ae' ali' agafe' matmat atambai agi'mana awis nomon ati hiahawes isimba a' ahapifana. * ⁹ Nogota atamba afa' ina ogawa basef fagail Buk Baibeli faga'i Jisas noga' notanima nogosafel wapani, owa'. ¹⁰ Ea' afa' biafa utanima wafe' ipat.

Maria Makdalai'wi kwati Jisas
(Mk 16:9-11)

¹¹ Apa' Maria ato'w kwalutu kwalopana matmat ando'. Kwalutu kwalopana atin, kwasisil kwati bolotaf matmat nomon, ¹² akwati ensel biam mala luwaguf afitimi mape anamba alop Jisasi doko' paga'oma. Amom biam anona nape balaga Jisasi gagafe'ma, anona bo'wagah hagafe'ma. ¹³ Ea' mahali'akw ma'i, “Ina' nalopa main?”

Ea' ako'w kwagwamam basef kwa'i, “Anis asofa' Dembinai ae'anai safe' ea' ina egawa anamba safe' sagrambe'anama, owa'atin.”*

¹⁴ Kwa'ipam basef ifimba ma ea', kwandambema owa' kwati Jisas nalutu naloma'w. Apa' ina kogawa anen kwa'i Jisas, owa'.

¹⁵ Ea' Jisas nahali'akw na'i, “Nemata'w, dei' maina ina' nagalef? Ina' newando'ma ami?”

* 20:5: Jo 11:44

* 20:8: Ap 2:24-32; 1 Ko 15:4

* 20:13: Lu 24:16; Jo

21:4

Ako'w okom ma'i owa' anona nanda' maol aofi. Ea' kwa'ipana kwa'i, “Dembina'i, i'i ina' negefa'anama, ni'ipi anamba nefa'ana nafe' nagambe'anama?”

¹⁶ Ea' Jisas na'ipa'w na'i, “Maria.”

Ea' kwandambema kwati anen kwaipana diga Hibru'i kwa'i, “Rabonai.” Basef kofagefa fa'i Dembinai Tisa.*

¹⁷ Ea' anen Jisas na'i, “Ina nigahapila alop ae'api, owa'i. Dei' main? Ae' ina dei' a' itanima afe'ma Ahame gani ilif ata' owa'. Ina' nefel'ma owape ae'ami ni'ipam ni'i, Ae' a' itanima ilita ilifa Ahame ae'anai a Ahamepa ipe'inai, efe'ma God Dembinai ae'anai, a God Dembinai ipe'inai.”

¹⁸ Ea' ako'w kwafe'ma alipumi ananiami magapoma kwa'ipam kwa'i, “Ae' ati Dembinai ea'!”

Ea' kwa'ipama basef ifimba anen naga'ipa'wafi.*

Alipumi Jisasi matolona

(Mk 16:14-18; Lu 24:36-49)

¹⁹ Nema' afamba Sande owamb, afa' alipufai Jisasi wandakolas ondotowalo wape anota ipat nomon. Afa' ombal mahafama amom dembami esis Judai. Owa' Jisas nafi'i nalutu nalomafa na'ipafa na'i, “Nelelemb ipe'ilimbi bepe sa'ombel.”*

²⁰ Na'ipafa basef ifimba ea', nihimba'mafa lagufi lambeh ananisi. Ea' afa' wati Dembinai afa'inai ea', asonahafama anen a'owa'.*

²¹ Ea' na'ipafa wapani na'i, “Ae' a'i nelelemb ipe'ilimbi bepe awanalemb. Ae' dei' a'i esapa'epa pefe' pi'ipasa basef Godi si'i Ahame nasapa'e afi'i aga'ipapa.”

* 20:16: Ro 8:29; Hi 2:11-12 * 20:18: Jo 19:38 * 20:19: Jo 16:22, 19:34;
1 Jo 1:1 * 20:20: Jo 17:18

²² Na'ipafa ifimba ma ea', a' naomafa ambip na'ipafa na'i, "Ipa' pefa' Ambal bu'unai Godi. * ²³ Ama i'li pegak-waha waf awafi epen ami nanda'afi, God wapani a' nok-wahomanaf okom moso'anaf. Apa' i'li ipa' owa' pekwaha waf afamba awafia, God wapani ina atiasi nokwahaf okom moso'anaf, owa'atin."*

Tomas nati Jisas

²⁴ Anona ma afa' 12-pelaifa alipufai Jisasi, Tomas agol wa'agol Didimas. Kofagogola sa'i ma'mam kofolam atifi. Nemaf afamba Jisas nafi'li nagatolofa, Tomas ina nape nalomafa, owa'. ²⁵ Ea' anom alipumi ananimi mafe' ma'ipana ma'i, "Afa' wati Dembinai afa'inai ea'."

Owa' Tomas na'ipam na'i, "I'li ae' owa' ata' iti melegwa lagof ananigufi sagahana nigufa, ma esa faf ae'afi ma niguf fagawisa ea' esapa' lagol ae'agili guwis nomon lambeh ananimbihi, dao' ihapifana. Apa' i'li owa', owa'atin."

²⁶ Nimaguf 8-pelaif fefe'ma ea', afa' wape anota ipat nomon, ondotowalo wape. Afamba Tomas wapani nape nalomafa. Owa' Jisas nawisi nalutu nalomafa na'ipaf na'i, "Nelelemb ipe'ilimbi bepe awanelemb."

²⁷ Ea' na'ipa Tomas na'i, "Dowa faf ine'ifi fifi'li na'a. Ea' niti lagof ae'agufi. Nesapa' lagol ine'igili guwisi lambeh ae'ambihhi nomon. Ina okom bimbafim mopaina, owa'i. Nindahapifi endilisi."

²⁸ Ea' Tomas na'ipana na'i, "O, Dembinai ae'inai, God ae'inai."*

²⁹ Ea' Jisas na'ipana na'i, "Ina' natolowe ea', dei' nahapifi. Apa' epe ami owa' sogatolowaia, sahapifi sonahas endilisi."*

Dei' maina ae' anda' basef ifimba fagail buk akwa'e?

* 20:22: Mt 16:19 * 20:23: Jo 11:16, 14:5; Jo 21:2 * 20:28: 1 Pi 1:8

* 20:29: Jo 21:25

³⁰ Jisas nanda' hiahaom hiami banagami daiam si'i God nanda'ami ma nogohnaep alipufai ananifai. Basefa hiahaom amamba ina anda'ef hi'alef fape buk akwa'e, owa'. * ³¹ Anda' basef ifimba do'wanif atifa hiahaom amamba ma ipa' pigahapifa Jisas anen Nogamana Godi, anen Kraiss, God nandandepana nasapa'ana nagafi'ii. Ma pihapifa agol ananigili pefa' ambal namili pegape namipa dondol lifilafi.

21

Alipumi Jisasi amom 7-pelaim matolona

¹⁻² Jisas naga' nosafel wapani ma ea', alipufai ananifai a' watolona wapani nimaguf bif. A'i owa' main, wagi' watolona wapani. Basef faga'ias na'amba. Jisas nafe'ma afa' gani dumb lu'wambi Taiberias. Anofa afa' ondowa'anima atogon wagapani afamba. Saimon Pita, Tomas agol wa'agol Didimas maloma Nataniel, anen Kenainai, itap lu'upa Galili. Amom maloma nogaopana biam Sebedii maloma amom biam daiam Jisasi ondowa'anima wape atogon.* ³ Ea' Saimon Pita na'ipafa na'i, "Ae' a'i efe' igi agof."

Ea' afa' wa'i, "Olomena ofe' atin."

Ea' wafe' walota anota bot wafe' wa'i ugi agof wafe' wanda'am owamb ambamba laomb danda' apa' afa' ina wagi anol aol, owa'atin.

⁴ Wafilu kuhimbata atota Jisas nafe' nalutu dumb ambamba akata apa' afa' ina ogawa wa'i anen Jisas, owa'.*

⁵ Ea' nofalafa na'i, "Awami sa'upai, ipa' pagi anogof agof a'a owa'?"

Ea' wagwamana basef wa'i, "Owa'atin."*

* 20:30: Jo 3:15; Ro 1:17; 1 Jo 5:13 * 21:1-2: Jo 1:45-51; Jo 20:24 * 21:4:
Jo 20:14; Lu 24:41 * 21:5: Lu 5:4-7

⁶ Ea' na'ipafa na'i, "Ipa' ata' pela anemb bewala bot atamba wa'ol lagol kwahisigilima. Ea' atiasi apiti anogof agof."

Ea' afa' wa'i ola anemb owa', owafai agof hiami. Ea' ina la'ififa ogagiai anemb bilitai begatoma bot nomon, owa'atin. Dei' main? Agof hiami a'owa' mala anemba namba asi'ina.*

⁷ Ae' alipuwai Jisasi okom magamagailai, a'ipa Pita a'i, "Nanumba Dembinai afa'inai."

Saimon Pita doko' natagwaha saket ananitai ta'oh ea' nanda' maol owa', name' basef ifimba nala saket wapani nanda' kopi' nowala embel dumb nopaul nafe' embel. ⁸ Ea' afa' daiafa watoma bot wagi'mana wagi'ai anemb si'inama agof. Afa' ina wail laogona akata, owa'. Si'i 100 mita. ⁹ Wafe' wataga akata, wati anif nif fandif ea' wati anagof agof fasef nif faloma anota bret.

¹⁰ Ea' Jisas na'ipafa na'i, "Ipa' fa'i anagof agof doko' pagagiagufi."*

¹¹ Ea' Saimon Pita nalota bot atamba nagiai anemb bafi'i akata. Anemb ambamba si'imba agof lu'wagufi atogof 153-pelaiguf. Apa' anemb ina pele'atamb, owa'atin.

¹² Ea' Jisas na'ipafa na'i, "Ipa' fi'i ma ata' pea' gwa'aisi." Apa' afa' ina anona banagona ma nohali'ana niga'i, "Ina' ami?"

Owa'atin. Dei' main, afa' ogawa anen Dembinai afa'inai. * ¹³ Jisas nafi'i nofa' bret naso'afa, a agof wapani na'amba atin.*

¹⁴ Fowa' Jisas nogosafel wapani, nali' nafe'ma afa' alipufai ananifai watolona nimaguf bif. A'i owa' main, dei' watolona wapani a' wanif.*

* 21:6: Jo 13:23; Mt 14:29 * 21:10: Lu 5:6 * 21:12: Jo 6:11 * 21:13: Jo 20:19,26 * 21:14: Mt 26:33; Jo 1:42

Jisas na'ipa Pita na'i, "Ina' nese'ama gwa'aisi sipsip ae'ami"

¹⁵ Afa' wa' gwa'aisi ma ea', Jisas na'ipa Saimon Pita na'i, "Saimon nogama Joni, ina' okom maimaili a'owa' nikila' anom alipumi amamba daiam, a'a owa'?"

Ea' anen na'i, "Aho', Dembinai. Ina' negawa ae' okom maimailina."

Ea' Jisas na'ipana na'i, "Ina' nese'ama gwa'aisi sipsip nogami ae'ami."*

¹⁶ Ea' Jisas nahali'ana wapani na'i, "Saimon nogama Joni, ina' okom maimaili endilisi, a'a owa'?"

Ea' nagwamana basef na'i, "Aho', Dembinai. Ina' negawa ae' okom maimailina."

Ea' Jisas na'ipana na'i, "Ina' nimafi sipsip ae'ami."*

¹⁷ Jisas nali' nahali'ana bif ea' dei' nahali'ana wapani a' wanif na'i, "Saimon nogama Joni, ina' okom maimaili a'a owa'?"

Ea' Pita okom iwanim na'ipana na'i, "Dembinai, ina' negawa hiahaom hiami. Ina' negawa ae' okom maimailina."

Ea' Jisas na'ipana na'i, "Ina' nese'ama gwa'aisi sipsip ae'ami. ¹⁸ Endilisi ae' a'ipina, fowa' ina' ata' sa'wina, ina' nowaho' let ea' nafe' mamahagoma nomonas ine'isi sa'i negafe'ma. Apa' owagama ina' negatagama hagen, ina' atiasi nendowa logof ine'igufi ma anom amam daiam mowaho'mena let mohapilina nefe' anamba ina' nindai-wa'magoma."*

¹⁹ Jisas na'ipana na'amba ma nigihimba'mam ufia'w ma soha Pita nogaga' ma epes hiasi sogasa'ma agol Godi lu'wagol.

Ea' dei' Jisas na'ipana na'i, "Nila ae'."*

Basef alipunai Jisas okom magamagailana a'owa'i

* 21:15: Ap 20:28 * 21:16: Jo 13:38, 16:30 * 21:18: Mt 16:24-25; Mk 1:17; 2 Pi 1:14 * 21:19: Jo 13:23-25

²⁰ Ea' Pita nandambema nati ae', alipuwai Jisas okom magamagailai, agi'mam afi'i. Ae' ma'uwi fowa' afa' wape wa' gwa'aisi ma indisi'ah felefele'ma Jisas ahali'ana aga'i, “Dembinaï, atiasi ami ni'ipa boumi ma nigihimba'mama ina' negapoma?”

²¹ Ea' Pita natiti ae', nahali' Jisas na'i, “Dembinaï, aman anamba anaf nope ni'imama?”*

²² Ea' Jisas nagwamana basef na'i, “I'i ae' i'i anen a' nope ambal lopaona nope nefe' nefe' afamba ae' igitanimai, isimba ina maol ine'ini, owa'atin. Ina' nila ae'.”

²³ Ea' basef baso'afi wafifi ifimba fafe'ma afa' alipufai Jisasi fa'ias na'amba fa'i, “Aman anamba anaf ina noga', owa'.”

Apa' Jisas ina na'ipafa basef ifimba esis saga'iefi, owa'. Basef ifimba kwamaifi.

Jisas na'i basef ifimba atif na'i, “I'i ae' i'i anen nope nefe' nefe' ma nemaf ae' igitanimai, isimba ina maol ine'ini, owa'atin.”*

²⁴ Aman anamba alipunai Jisasi ea' ae' ma'uwi. Ae' a'ipipa basef ifimba ma hiahaom amamba Jisas nanda'ami dei' anda'am magail buk akwa'i. Apa' Kristen mogawa basef ifimba endilisifi atif ae' anda'afi.*

²⁵ Jisas nanda' anin maol hiani daian wapani. I'i anis epes sonda' basefa maol Jisasi hi'ilan filai, ae' a'i itap anamba hiagoma owa' anagona buk hianai noga'oha, owa'atin. Asi'igin dog.

Basef ea' ma'uf.

* 21:21: Mt 16:28 * 21:23: Jo 19:35 * 21:24: Jo 20:30

Basef Bu'wafi Godi

The New Testament in the Mufian Language
Nupela Testamen long tokples Mufian long Niugini

copyright © 1998 Wycliffe Bible Translators, Inc.

Language: Mufian

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

PDF generated using Haiola and XeLaTeX on 12 Jun 2019 from source files dated 5 Mar 2019

9d2b07f2-4ac7-545a-943c-e16df691ef3f